

JUAN NAAJIOTASANO JESUCRISTOJINIJI

Pueyaso Rupaa jatasacari pueyanora

¹ Paari Jesucristojiniji niishiyani taamuecateja na Que Pueyasoni. Naaratej, Jesucristoori sesojosaaquiaari “Pueyaso Rupaa”. Nojuajaari tari pueyaracaanu quijia, jiya quiyaquishacarijia. Na Que Pueyasota quijiaari. Pueyaso quijiajahuaj. ² Jiya coteesacari, nojuajaari na Que Pueyasota quiriquiaa. ³ Na Queeri na shipinitiquiaari puetunu casaaajanaa. Puetunu casaaajanaari na shipinishano. Maja tamonu shipininia quiniu socua. ⁴ Nojuajaari quijiajuhnaj. Naaratej, nojuajaari na naata pueya jiujia cuhuatanu, pueyaracaanu rishijia nojori quiniuriajahuaj. ⁵ Jesucristoori cuhuashiqui quijia. Naaratej, na rupaata poojia cuhuataari. Saniniuujia, Sesacaari ninishioui quijia. Naajaa, majaari na naata Pueyaso Rupaa na shocotanu. ⁶ Pueyasoori quiari naataja tamonu pueyano ji-yaroquiaari, Neyanujiniji pohuatariquiano. Na sesa quiquiaari Tiuquinijiona Juan. ⁷ Pueyasoori na ji-yaroquiaari pueya na niishitiniuria cante Jesucristoni, pueya tiuuniuria Jesuucua, nojori jiujia na cuhuatanura. ⁸ Juanri maja pueya jiujia cuhuatana. Nojuajaari Jesucristojiniji pohuataquiaari pueya niishiniuria cante saniya poojia cuhuatana cutarani. ⁹ “Pueyaso Rupaari” seetanu poojia cuhuatanajanaa. Nojuajaari Jesucristo.

Jiyocua niquiaariiri puetunu pueyajanaa niishiniuria cante Pueyasoni.

¹⁰ “Pueyaso Rupaari” mijiria rucuanejojua quiquiaari. Pueyari tama nojori Shipininiaajaaja niishiyaquiaquiaari. ¹¹ Tama na saquiriojosano Israel pueyacua niquiaariiri. Nojoriiri na tamacaquiaari saaja. ¹² Saaja noojiaqueuya pueyari nocua tiuuquiaari. “Pueyaso Rupaari” cuno pueya jiyatequiaari Pueyaso muerasura nojori quiniuria. ¹³ Nojoriiri Pueyaso jatanishano, seetanujuanaa na muerasu nojori quiniuria. Pueyaso saquiriojosano pueyajiniji pueyano supuesacari, cunoori maja na naata na jiyatenu Pueyaso pueyano na quiniuria. Pueyari maja na naata metunu tariucua Pueyaso pueya. Naajuhuaj, pueyanoori maja na naata tama na cuaqueyajaaja jiyatenu Pueyaso pueyano na quiniuria. Pueya cutaraari Pueyaso muerasura jataquiaa Neyanuucua nojori tiuushacari saaja.

¹⁴ “Pueyaso Rupaari” seetanujuanaa pueyanora jataquiaari mijiria na quiniuria. Nojuajaari Jesucristo. Canaata quiquiaariiri. Canaari na cumaacata na miijiosano niquiaariaini. Jiyanolua maninia quiquiaariiri. Na Que Pueyasoori na cumaquijia jiyanolua maninia na miiniuria, Neyanuniyojua na quishacari. Nojuajaari saaja seetanu rupaajanaa sequeja Pueyasojiniji. Jiyanojia quiijaari. ¹⁵ Tiuquinijiona Juanri Jesucristojiniji pohuataquiaari pueya niquiara. Jiyanolua na rupaa paaretaquiaariiri pueya tojitianura nojuaja. Naa sequejaari:

—Janiyacuajaari nojuajiniji nia pohuatajani, janiya jaara nia sequejani: “Tamonu pueyano cua nuhuaji niniutianiya”. Nojuajaari jiyanijiajanaa cutara janiyajiniji. Nojuajaari tari quijia cua quiyaquishacarijia.

Juanri naa pohuataquiaari Jesucristojiniji.

¹⁶ Jiyanijiajanaa Jesucristo quiniuucua, puetunu pajaniyajanaari na jiitiasanojiniji masequiaani. Jiyanohua capora na quiniuucua, nojuajaari pueyaracaanu pa cumaquiquiaa. ¹⁷ Pueyasoori supuetana Moisés naajioequiaari na rootasano pajaniyara. Cunoori maja na cumaquiniu quiquiaari pajaniya. Quiarijia saniniuujia, pa panijia Pueyaso quiniuucua, nojuajaari Neyanujuanaa jiyaroquiaari pocua, pa jiyanooshaanura, naajuhuaj, seetanu rupaajanaa pa niishiniuria nojuajiniji. ¹⁸ Majaari quenaaja tamonu pueyano niquiniu quiitia Pueyaso. Neyanu, cante na Que shuriucua quijacuajani, nojuajaari na Que pa niishitioquiaari.

*Tiuquinijiona Juan pohuatasano Jesucristojiniji
(Mt 3.11-12; Mr 1.7-8; Lc 3.15-17)*

¹⁹ Jerusalén tiacajinijinio canaa Judiocuaca camarucuaari na pueya jiyaramiquiquiaari Tiuquinijiona Juancua, nojori nequesoreenura Juan cante nojuajani. Nojori jiyaramiquishano pueyari quiquiaari supuetana Leví niquiohuacuajinio supueno pueya. Noojiaqueya cuno pojorijinijinioori quiquiaarijuhua pueyacuara secojonaa pueya. ²⁰ Nojori nequesotasacari Tiuquinijiona Juan, nojuajaari maja quenaaja

na seetanu quiquiaari cante nojuajani.
Seetanujuanaa naa nojori sequequiaarii:

—Janiyari maja Pueyaso Jiyarosano Cristoni.

21 Cuno pueyari socua na nequesotarohua:

—¿Canteeri quiajaniyani? ¿Quiaa jiyoteeri
Pueyaso sequencesano caminiuijunia Elías soj? ¿Quiaa
jiyoteeri samiitiarohuacuaa?

Tiuquinijiona Juanri saaja nojori riucuaree:

—Maja. Janiya maja supuetana Elíasni.

Cuno pueyari socua na nequesotarohuacuhuaj:

—¿Quiaa jiyoteeri Pueyaso sequencesano camini-
uijunia, nooj tariucuacaanu sequencesaaquiaari
niriquianotej?

Juanri saaja nojori riucuaree:

—Maja.

22 Cuno pueyari socua na sequeree:

—Canaa quia pohuatareja, ¿cante quiajaniyani?
Canaacua saniniujia canaa camarucua pohuata-
suhanijia.

23 Juanri saaja naa nojori riucuaree:

—Janiyacuajaari noon, cariiquia jiyajinia
nacajatej, taa supuetana Isaías juhuacarijia naa-
jiotaquiaari janiyajinijicuajani: “¡Jiyajinijaacuaji
nia nuunore maninia! ¡Maja shuutiuniu!”

24 Jiyacaritij, Fariseocuaca camarucua
jiyaramiquishano pueyari Tiuquinijiona Juan
nequesotaree:

25 —Quiaa jaara quiyaquiri Cristo, Elíasjuhuaj,
cuno tariucuacaanu sequencesaaquiaari
niriquiano Pueyaso sequenu panishano
caminiuijinatej, ¿casaara pueya quia tiuquinijiya
moojiniacuaraarin?

26 Juanri nojori riucuaree:

—Janiyari nareja moojinia tiuquinijiya pueyani. Saniniujia, tamonuuri niya quiya, nia niishiyaquishoojua. ²⁷ Nojuajaari cua nuhuaji niniutianiya. Nojuajaari Jiyaniijajanaa cutara. Majaari quenaaja cua naata na seru quiniu na sapatu neyocua cua saacatanura nera.

²⁸ Naa cuno pojori nequesoreesacari Tiuquinijiona Juantej, cunoori quiriquiaa Betania jiyanishano tiacajinia, Jordán moo taquijiria, tee cuniqui Juan tiuquinijoriquiaa moojinia pueyacuajani.

Jesu juhua Pueyaso borregoniyojua pocuara mosaaariquiano

²⁹ Tariqui saniniujia, Tiuquinijiona Juanri Jesu niquirii nocua niyano. Juanri naa sequeree canaa niquiara:

—Paari pueyaracaanu mooquiaa borregohuani Pueyaso jiyanooniuria pajaniya. ¡Nia niquiri! ¡Cuno cumaji canujiyani, cunoori Pueyaso Jiyarosano, juhua borrego puetunu pueyacuara mosocoriquiano, seetanujuanaa sesa pa miishanojiniji pa jiyanooshaanura! ³⁰ Janiyacuajaari nojuajiniji nia pohuatajani janiya jaara nia sequejani: “Cua nuhuaji niniutianiysi Jiyaniijajanaa cutara. Nojuajaari tari rishijia cucuaji cua quiyaquishacarijia”. ³¹ Janiyari na niishiyaquijiajuhuaj, cante nojuajani. Naajaa, janiyari parta Israel pueya tiuquinijoquiaa moojiniani, noojia nojori jeenucuanura, Pueyaso Jiyarosano nojori niishiniuria cutara.

³² Tiuquinijiona Juanri pueya sequereejuhuaj:

—Janiyari Pueyaso Sohuanu niquiriuropaani jiyocuacaanuji rosezano nocua juhua mococoona.

Nocua tiuushiiri. ³³ Cuno, cua jiyaroquiaari pueya cua tiuquinijionura moojiniani, nojuajaari cua sequequiaari: “Quia jaara cua Sohuanu niquiri pueyanoocua rosezano, nocua na tiuuniuria, quiocua niishiri, cunocuajaari cua sequesano quiajaniya. Nojuajaari cua Sohuanu tiuquinijionutaniya pueya jiuujiajinia cutara, see-tanujuanaa cua muerasu nojori quiniuria”. Nojuaja jaara naa cua sequeyaquiquiaari, janiya maara na niishiyaquiquianuni. ³⁴ Janiyacuajaari tari na niquiquianuni. Naaratej, janiyari saniniujuja nia pohuataani pueyanaa, jnojuajaari seetanujuanaa Cristo, Pueyaso Niyanu!

Coteenujuanaa Jesu pueyajiniji pohuatasano

³⁵ Tariqui, Tiuquinijiona Juanri tii quishiiquipuhua caapiqui na pueyata. Janiyari niquiriyatu cuno caapiqui pueyanojinijinio quiriquiaani. ³⁶ Tiuquinijiona Juan jaara Jesu niquiquiaari shocoyano, jiyacari canaa sequereeri:

—¡Nia niquiri! Cunoori cua sequesano niajaniya, Pueyaso Jiyarosano pocuara mosocoriquiano juhua borrego, sesa poojia seque jeequesaanura.

³⁷ Naa canaa tojishacari Juan sequesanotej, canaari Jesu nuhuajiquiaarini. ³⁸ Jesuuri canaacua tacateree. Canaa na niquishacari na nuhuaji sacuaano, canaa sequereeri:

—¿Casaa nia paniyani?

Canaari na sequereeni:

—Niishitiojonanaa, ¿tee quia maquequiaacuaani?

39 Jesuuri canaa riucuaree:
—Miji. Nia niquiquii.

Canaari nata quiaareeni. Canaari na quijia niquitiushiini. Tari pananu piriushacariiri quiriquiaa jiyacari. Cunora, canaari tii maquetusee Jesutani.

40 Tiuquinijiona Juan niquitiniuucua Jesu canaa, canaari Jesu nuhuajiquiaarini. Andrésri cua cojiriquiaa. Andrésri tarajanu jiitaja. Na sesaari quijia Simón Pedro. **41** Tariquiicuaji, Andrésri ritia tarajanu Simón pajenuucua quiaquiaari. Na riuriatasacari, na sequereeri:

—¡Cua tarajanunaa, canaari Cristo niquiriquiacuaani, tariucuacaanu Pueyaso sequencesano na jiyarosocoriquianote!

42 Na nuhuaji, Andrésri tarajanu Simón jiyataaree Jesuucua. Jesu niquishacari Simón, na sequereeri:

—Quiaacuajaari Simón, Juan niyanu. Quiarijia saniniuujia, quia sesaari quiniutianiya Cefas.

Griego rupaajinia, nioori sequeya Pedro. Pedroori saniniuujia pueyano rupaajinia sequeya “Saajia”.

Jesu saquiriojosacari Felipe, Natanaelnio

43 Tariqui, Jesuuri Galilea jiyajiniara quiariquiaa. Felipe riuriatamaari. Na sequereeri:

—Cua tarajare cua pueyano quia quiniuria.

44 Felipeeri nata quiaaree. Nojuajaari Betsaida tiacajinijinio quiquiaari. Andrésri tarajanu Pedrota cuno tiacajinijinio quiquiaarijuhuaj. **45** Na nuhuaji, Felipeeri Natanael pajeree. Na riuriatasacari, na sequereeri:

—¡Canaa noo pueyano niquiriini, Moisés nojuajiniji naajioitaquiaari tariucuacaanutej! Tariucuacaanu Pueyaso sequesano caminiujiuniaa pueyari nojuajiniji naajionuutaquiaarijuhuaj. ¡Nojuajaari Nazaret tiacajinijinio Jesu, José niyanu!

46 Natanaelri saa riucuareejaa:

—¡Ja! ¿Na naatate maninia mijiia pueyano supuenuujaara cuno sesa mijiaca Nazaret tiacajiniji?

Felipeeri na sequeree saaja:

—¡Miji! ¡Pa niquishii!

47 Jesuuri Natanael niquirii nocua niyano. Na sequereeri:

—Nio pueyanoori seetanu pa supuetana Israel niquiohuacuajinio supuenojuanaa cutara. Ma-jaari na niishiniu sapojonu.

48 Natanaelri na sequeree:

—¿Taa quia niishiya janiyarini?

Jesuuri na riucuaree:

—Felipe sequeyaquishacarijia quiajaniya cu-
cua quia niniuria, janiyari tari quia niquirii coo-
jiatani, higo naana pajama tateyano.

49 Natanaelri shiriiquirii. Jesu sequereeri:

—Niishitiojonanaa, ¡quiaacuajaqui Pueyaso Niyano! ¡Quiaari parta Israel pueya jiyaniijiaranojuhuaj!

50 Jesuuri na sequeree:

—¿Quiaateeri cucua tiuuquii shusha saaja cua se-
quesacari quiajaniya: “Quia niquirii higo naana
pajama tateyanonijia”? Seetanujuanaa quia se-
queyanijia, quiaari na nuhuaji cua cumaacata cua
mijiosano niquiniutianiya cutara.

⁵¹ Jesuuri cuniqui quiniaa pueya sequeree-juhuaj:

—Seetanujuanaa nia sequeyanijia, niaari jiya cajiniocua niquiniutaniya riateno. Pueyano cua quishacari, niaari Pueyaso seja niquiniutaniya cucua roseetaano, cucuaji taqueetaanojuhuaj.

2

Jesu jatanishacari mohuaca vinora, pueyano camishacari

¹ Jiuujianaraca juuca nuhuaji, tamonu pueyanoori camiquiaari Caná tiacajinia, Galilea jiyajinia. Masuusano pueyari queranacuriquiaa. Jesu nucuaari tii quiriquiaajuhuaj. ² Jesuuri na saquiriojosano pueyata masuusaquiaarijuhuaj, camishacari queranacunura. Janiyari na saquiriojosano pueyano quiriquiaa jiyacari tarijiujuhuaj. ³ Jiyacaritij, mashacaari ritia puequemaa. Na nucuaari Jesu sequeree:

—Sanaa, mashaca tari puequemaa.

Mashacaari quiquiaari uva caaca, vinotuhuaj.

⁴ Jesuuri na nucua riucuaree saaja:

—Maajiniae, ¿casaara quia sequeya janiyani? Juhuanujuaja maja cua poonijiosacari Pueyaso cumaacata.

⁵ Na nucuaari pueya raatojonaa sequeree:

—¡Niocua Jesu tojirijia! Jaara nia sequere, niocua puetunu na sequencesanojuanaa miiri.

⁶ Tii cajitiuriquiaari seis conatu, saajiajiniji quejasano. Canaa Judiocuacaari sequeyarucua shuquiriojua tajinia nojori tiuquishacariuhua, juhua jeequesano nojori quiniuria Pueyaso niquiara. Nojori mohuaca cajitiacojua

quiquiaariiri cuno conaa. Jiyanoqua
puereetucocua quijiaari. Cuno conatuuri setenta
tumococua mishaja mohuacata mishinishano
quijia. ⁷ Jesuuri pueya raatojonaa sequeree:

—Mohuaca nia taquirioore. Niocua nio conaa
mishinijiore.

Pueya raatojonaari conaa mishinijioree. Mo-
huacaari conaa rupaacuma puecacosee. ⁸ Jesuuri
nojori sequeree:

—Quiarijiani, tiji nia shuuri. Queranacunu ca-
maru nia sanitiore coteenu.

Raatojonaari na raatesee. ⁹ Queranacunu ca-
maruuri vinora jatano mohuaca sanirii. Majaari
na niishiniu quiquiaari cuno na ratusanoori mo-
huacajiniji jatanishaaree vinora. Saaja pueya
raatojonaa cutaraari na niishiriquiaa. Nojoricua-
jaari mohuaca mishinijioree cuno conaajinia.
Queranacunu camaru saniniu nuhuaji cuno ratu-
sano, camiyano pueyano piiriiri. ¹⁰ Na sequereeri:

—Pueyaruhuatijia coteenu raateja shocuanacu
vinote. Puetunu masusano pueya jaara tari
raruure queraatia, na nuhuaji raatesano cu-
taraari shaarunacu vino. ¡Quiarijia saniniujia, nio
cua ratusanoni, cunoori socua maniniuniacu vino
coteenu quia raatojotesanojiniji!

¹¹ Naa Jesu jatanishacari mohuaca vinoratej,
cunoori coteenujuanaa na cumaacata na miis-
hano quiquiaari Caná tiacajinia, Galilea jiyajinia.
Nojuajaari naa niquitiquiaari Pueyasojiniji na
cumaaca. Naacuajitij, canaa na saquiriojosano
pueyani, canaari niishiquiaarini Jesuuri seetanu-
juanaa Pueyaso Jiyarosano.

12 Na nuhuaji, Jesuuri Capernaum tiacajinia quiaaree na nucuata, tapueyocuacatajuhuaj, canaa na saquiriojosano pueyanio. Canaari tii camueenuquaari pasajani.

Jesu jaacasacari seja niquitiojonaa Pueyaso Secojojua tiajiniji

(Mt 21.12-13; Mr 11.15-18; Lc 19.45-46)

13 Quera canaa Judiocuaca queranacusacari Pascua juucara Jerusalén tiacajinia, Jesuuri tii canaa jiyataareejuhuaj. **14** Na tiuquishacari, Pueyaso Secojojua tiajinia quiamaari. Tii niquishii pueyari juyaca niquitiojiyano Pueyasoocuara puecoosocoriquiano, borregohua, noseyanio. Pueyari tii na juhuacutucuajinia cajitiuriquiaajuhuaj, pueya na tacatojonura taucuaca cumaneeca, Pueyaso Secojojua tiajinia niquitiosocoriquiano cumaneecara. **15** Naa na niquishacari pueya miyano Pueyaso Secojojua tiajiniatej, Jesuuri seja morojotaja jiyocua tatuscuaree. Na majacutajara na shitiareeri. Cunota, puetunu nojorijiana jaacaree Pueyaso Secojojua tiajinijiiri, puetunu nojori borregohuatajanaa, mariyata puetunu nojori juyacatujanaanio. Cumaneeca rerecojoree jiyocuara juhuacutucuajinijiiri. Naajuhuaj, cumaneeca juhuacutucua caponeetareeri. Pojotaariquiaacuaari. **16** Noseya niquitiojonaa pueya sequereeri:

—¡Niiquiji nia patootare nio noseya! ¿Casaara nia jiyatecanu juhua casami niquitiojosaquiria cua Que tiani?

17 Jiyacaritij, canaa, Jesu saquiriojosano pueyani, canaari niishiqliini, seetanujuanaa tariucuacaanu Pueyaso Rupaajinia naa naajiotasanoori quiya:

“Quia tiaacua juaatishaaree jiyanohuanija, jiyanohua cua panishacari quia tia”.

18 Naa Jesu miiniuuucuatej, narta Judiocuaca camarucuaari Jesu nequesotaturee:

—¿Cante quia sequerucuua naa quia miiniuri-ani? ¡Canaa quia niquitiricuaraja Pueyaso cumaca-ata quia miishano, canaa niishiniuria quiaari seetanujuanaa Pueyaso Jiyarosano!

19 Jesuuri nojori riucuaree miriqui:

—Pueyaso tia nia niyartare, janiyacua saaja jiuujianaraca juucajinia na tucuatarohua tianu tamajaajani.

20 Narta Judiocuaca camarucuaari na riucuaree:

—¡Cuarenta y seis marijaari shoconujuquiaari pueya tucuatanura nio secojojua tia! ¿Quiaateeri jiyaniya quia naata na tianuhua ritia, saaja jiuujianaraca juucajinia? ¡Maja quia naata!

21 Jesuuri tama na cuaqueyajaaja pohuatariquiaa, Pueyaso tia na sequesacari.

22 Naacuajitij, Jesu jaara samiitiaquiaariuhua, canaa na pueyari jiyacari shusha niishiqliaria naa Jesu sequesano miriquini. Naaratej, canaari tariucuacaanu Pueyaso Rupaajinia naajiotasanoocua tiuqliarini, Jesu sequesanoocuanio.

Jesu puetunu jiuujia niishijajanaa cutara

23 Canaari ocho juuca camueenujuquiaari Jesuta Jerusalén tiacajiniani, Pascuara queranacunuusacari. Tii canaa quishacari, tii quiniaa pueyari Jesu cumaacata na mijiiosano niquiquiaari. Naaratej, queraatia pueyari nocua tiuuquiaari. **24** Naajaa, majaari Jesu tiuuniu quiriquiaa seetanujuanaa nojoriicua. Nojuajaari nojori niishiriquiaa, taamueca pueyate nojorini. **25** Tamonu pohuataaquishacarijia nojuaja, nojuajaari tari niishiya taamueca jiuujiaracate pueyani.

3

Nicodemo pocoojosacari Jesuta

1 Niucua, tamonu pueyanoori niquiaari Jesucua. Na sesa quiquiaari Nicodemo. Nojuajaari canaa Judiocuaca camarucuajinijinio quijia, Fariseocuaca maanujinijiniojuhuaj. Tojishano pueyano. **2** Jesuucua na tiuquishacari, naa na sequeseeri:

—Niishitiojonanaa, quia cumaacata quia miniuucua canaa niquiara, canaari cunora niishiyani quiaari Pueyaso jiayrosano, canaa niishitioriquiano. Seetanujuanaa, Pueyaso jaara pueyano naacuyaquiri na cumaacata, nojuajaari maja na naata cusosuhua naatanijionu taa quia miiquiaacuaani.

3 Jesuuri Nicodemo sequeree:

—Seetanujuanaa quia sequeyanijia, pueyano jaara juhua conaaja raaquishaarohua, majaari na naata Pueyaso pueyanora na quiniu, Pueyaso jiitianura nojuaja.

4 Nicodemoori Jesu nequesotaree:

—¿Pueyanotucua taa rasaarohuani, nojuaja jaara tari cumantumaca quiya? Majaari na naata na nucua saracajinia tiuquiniuhua na rasaanuhuara.

5 Jesuuri na riucuaree:

—Seetanujuanaari cua sequesano. Cua tojiri. Paari coteenu rasaaquiaari pueyano pa quiniuriani. Saniniujia, cante quiarinio pueyanora jataniyaquishano Pueyaso Sohuanutani, nojuajaari maja Pueyaso jiitiasanoniyojua na quiniu quiniutaniya. **6** Mijiria pueya muetusanoori saaja pueyano. Saniniujia, cante Pueyaso Sohuanu jatanishano quiarinio pueyano na quiniuriani, nojuajaari Pueyaso pueyano cutara, pueyaracaanu rishiriquiano.

7 Naaratej, majaari quia shiriiquiniu puera, naa cua sequenuucua quiajaniyatej, quiaa cuaara rasuhuara, seetanujuanaa quiarinio pueyano quia quiniuria. **8** Mijiria, paratuuri piyarojoquiaa taa na paniyacuajani. Paari nareja na cojuatunenu tojiquiaani. Majaari pa niishiniu teje na piyarojiyani, tee cunocora na quiaajaaniuhuaj. Naajaariuhuaj, majaari quia niishiniu taa Pueyaso Sohuanu jataniquiaa pueyanoni, quiarinio pueyano na quiniuria.

9 Nicodemoori Jesu nequesotarohuacuhuaj:

—¿Pueyanotucua taa quiarinio pueyanora jatishaarejaarani?

10 Jesuuri na riucuaree:

—¿Majateeri quia niishiniu cua sequesano quiajaniya? Quiaari Pueyaso Rupaa niishitiojonacuaja Israel pueyara. **11** Canaari

seetanujuanaa pohuataquiaa canaa niishishanoni, canaa niquishanojuhuaj. Niaari saniniuujia saaja na cuaracashitiquiaa, canaa pohuatasacari niajaniya seetanu rupaajanaa.

¹² Niaa jaara saaja cuaracashitiquiaa cua pohuatasano mijiria casaajiniji, ¿niaatucua taa niishiriquiani, janiya jaara nia pohuatare jiyocuacaanuji casaani? ¹³ Janiyari jiyocuacaanu quijiani. Majaari quenaaja tamonu pueyano tacanu quiquiaari jiyocuacaanu, saaja tjinio roseno cutara. Nojuacuajaari janiya.

¹⁴ Cariiquia jiyajinia pa supuetanaa Israel pueya rucuanejosacari, Moisésri na shipinishano soconu nujuaretaquiaari macaacua, soconu sasuhua niquishocoriquiano. Na niquiniaa pueyari naatacoquiaariuhua. Naajuhuaj, janiyari macaacua nujuaretasocoriquianoni.

¹⁵ Naacuajitij, puetunu cucua tiuuniaajanaari pueyaracaanu quijiacu quiniutianiya.

Pueyasoori puetunu mijiria quiniaa pueyajanaa panija

¹⁶ 'Jyanohua cua Que Pueyasorpaniniuucua puetunu mijiria quiniaa pueyajanaa, nojuajaari Neyanujuanaa jiyaroquiaari puetunu pueyapueecuarajanaa mosocoriquiano. Puetunu cucua tiuuniaa pueyajanaari saniitioyaquishaanutaniya cutara. Nojori cutaraari pueyaracaanu rishijiaca quiniutianiya Pueyasor shuriucua. ¹⁷ Pueyasoori maja na jiyaronu quiquiaari janiya pueya cua saniitionura. Seetanujuanaa cua jiyaroquiaari cutaraari pueyacuaji Tacuna cua quiniuria.

¹⁸ 'Cante cucua tiuujiani, makaari na saniitiosaanu quiniutianiya. Saniniujia, cante cucua tiuyashijani, nojuajaari tari pueyaracaanu saniitiosocoriquiano jiyatesano quiya. ¹⁹ Janiyari mijiria niquiaarini pueya jiuujia cua cuhuatanura Pueyaso Rupaata. Pueyari saaja na ruuretaquiaa, ninishiqui nojori jiuujia quiniuucua. Sesa miijiaca nojori quiniuucua, makaari nojori paniniu cuhuatasano nojori quiniuria. Naaratej, nojoriiri saniitiosaanutaniya. ²⁰ Puetunu sesa miijiacajanaari cua niquinii paniyashijia, pueya jiuujia cuhuatana cua quishacari. Makaari nojori niniu paniniu cucua, sesa nojori miishano mariqui niishishaareeri. ²¹ Saniniujia, cante maninia miiquiaani taa Pueyaso sequeya na Rupaajiniacuajani, nojoriiri cuhuashiqui quiniu panijiaca cutara. Nojoriiri cucua nijioquiaa na niishishaanura nojori miishano cutaraari puetunu maninajanaa, taa Pueyaso paniyacuajani.

Tiuquinijiona Juan pohuatasacari socua Jesu-jiniji

²² Na nuhuaji, Jesuuri quiojoquiaari canaata Judea jiyajinia, canaa na saquiriosano pueyatani. Tii canaa quishacari Jesuta, canaari pueya tiuquinijioriquiaa moojiniani, pueya tacatosacari noojia sesa nojori miishanojiniji. ²³ Tiuquinijiona Juanri jiyacari pueya tiuquinijioriquiaajuhua Enón tiacajinia, Salím tiaca shuriucua. Juanri tii tiuquinijioriquiaa pueya, queraatia mohuaca quishacari tii. Pueyari nocua quiojoquiaarijuhuaj

tiuquinijiosano nojori quiniuria. ²⁴ Juanri jiyacari nujuatejojuajinia nujuatesoo quiriquiaajaa.

²⁵ Cuno quishacari, Tiuquinijiona Juan pueyari tamonu narta Judio pueyanota pocoojoriquiaa taate pueya naata juhua jeequesano quiniu Pueyaso niquiarani. ²⁶ Nocuaji nojoriiri Tiuquinijiona Juan sequetusee Jesujiniji:

—Niishitiojonanaa, noo pueyano, quiaa nojuajiniji canaa pohuatacanutej, noo quiata quiqianu Jordán moo taquijiriatej, nojuajana pueya tiuquinijiyajuhuaj. Puetunu pueyajanaana nocua quiojiya tiuquinijiosano nojori quiniuria.

²⁷ Tiuquinijiona Juanri nojori riucuaree saaja:

—Saaja Pueyaso cumaquishacari pueyano, pueyano na naata maninia miiniu Pueyasora.

²⁸ Niajaniyacuajaari cua tojiquianu sequeyano: “Janiyari maja Pueyaso Jiyarosano Cristoni. Janiyari nareja nocuaji jeenucuariquiano jiyarosa aquiaarini”. ²⁹ Pueyano rupuena jaara camiya necocuara, quiarijia cutara necocuaari seetanujuanaa saaja nerano. Naajaa, na rupuena quishacari na shuriucua, na timitiaari na tojishacari necota pocoojiyano shuquiriaatia. Naajuhuaj, janiyari cunora shuquiriaatia quiarijia quiyani pueya rupuesacari Jesucristo.

³⁰ Janiyari cunora jiyarosa aquiaaricuajani, pueya cua tojitiniuria nojuaja. Naaratej, pueya cuaara carteera janiya, Cristoocua nojori pacunura saniniuujia, nojori tojiniuria nojuaja. ³¹ Cante jiyocuacaanuji niquiaaricuajani, nojuajaari Jiyanijijajanaa cutara. Janiyari saaja mijiria quiniani. Cunora, cua pohuatasanoori saaja mijiria cua tojishano. Jesucristo saniniuujia,

nojuajaari jiyocuacaanuji ninio cutara. Nojuajaari Jiyaniijiajanaa. ³² Naacuajitij, na pohuatasanoori tama na niquishanojuaaja jiyocuacaanu, na tojishanonio. Pueyari na pohuatasano cuaracashitiquiaa saaja. ³³ Canapuete Jesucristo pohuatasanoocua tiuuijacani, nojoriiri sequeya, seetanujuanaaqui Pueyaso sequencesano Neyanujiniji. ³⁴ Pueyasoori jiyanolhua queraatia na Sohuanu niquitioquiaari na Jiyarosano. Naacuajitij, seetanu Pueyaso rupaajanaa pohuatahari. ³⁵ Pueyasoori jiyanolhua panijia Neyanu. Naaratej, nojuajaari na jiyatequiaari puetunu casaa jiitianarajanaa na quiniuria. ³⁶ Canapuete Neyanuucua tiuuijacani, nojoriiri tari jatanishano pueyaracaanu rishijia nojori quiniuria Pueyasota. Saniniuujia, canapuete Neyanuucua tiuyashijiacani, nojoriiri tariucua Pueyaso juaashano quiya. Nojoriiri saniitiosaanutaniya Pueyasooju nojori quiniuria pueyaracaanu.

4

Jesu pocoojosacari Samaria jiyajinjinio maajitiq

¹ Fariseocuacaari pohuatasaaquiaari, jiyanolhua queraatia pueya Jesuucua quiojiya na tojitianaa nojori quiniuria. Nojoriiri pohuatasaaquiaarijuhuaj, Jesuuri socua queraatia pueya tiuquinijiya Tiuquinijiona Juanjiniji. ² Seetanujuanaa majaari Jesujuanaa tiuquinijionu quiriquiaa pueya. Saaja canaa cutaraari pueya tiuquinijioriquiaani. ³ Jesu jaara niishiquiaari Fariseocuaca naa

pohuatasaarucuaa nojuajinijitij, nojuajaari Judea jiyajiniji jiyataquiaariuhua canaa Galilea jiyajiniara.

⁴ Canaa quiasacari nucuaco, canaari Samaria jiyacuma tajiriquiano quiriquiaani. ⁵ Naa canaa quiasacari nucuacotej, canaari Sicar tiacajinia tiuquishiini, Samaria jiyajinia. Cuniquiji, cateca quiriquiaari supuetana José cuhuariquia, na que Jacobo niquitiosano nojuaja. ⁶ Cuno cuhuariquiajinia quiriquiaari cuari, supuetana Jacobo jiuutiasano tariucuacaanu. Pueyaracaanu Jesu rucuanenuucua nucuamaji, nojuajaari cuno cuari shuriucua cajishii na samareenuta. Panacariiri quiriquiaa. ⁷⁻⁸ Jiyacaritij, canaari tiacajinia quiamaani canaa miaquesocoriquiano canaa masenura casaa. Canaa niyacari, cuno Samaria tiacajinijinio maajiiri cuarimia quiaquiaari mohuaca taquitianura. Jesuuri na sequeree:

—Cua raatere.

⁹ Cuno maajiiri Jesu sequeree:

—Pueyanonaa, ¿casaara quia sequeya Samaria jiyajinijinio maaji raatenura quiajaniyani? Quiaacujaari Judio.

Cuno maajiiri naa sequeree Jesutej, na niishiniuucua Judiocuacacuajaari maja na niquiniu paniniu quijia Samaria jiyajinijinio pueya.

¹⁰ Jesuuri saaja na sequeree:

—Majaari quia niishiniu cante quia sequereeni: “Cua raatere”. Quiaa jaara niishiriquia cassaa Pueyaso jiitiae quiarani, quiaa maara cua sequere cua raatenura quiajaniya. Quiaa jaara cua

masere, janiya maara quia raatere pueya samitianijia mohuacani.

11 Maajiiri na sequeree:

—Jiyaniijianaa, majaari quenaaja quia jiitianu casaa, mohuaca quia taquiriatajara. Nio cuariiri jiyanoehua tucuaa. ¿Quiaatucua teje taquitiare cuno mohuacani, pueya samitianijiani? **12** ¿Quiaateeri jiyaniijiajiana cutara, socua pa supuetana Jacobojiniji? Nojuajaari nio cuari tiujiaquiaari canaara. Nojuajaari niiquiji ratujua quiquiaari necohuata, na seesano seyanio.

13 Jesuuri na riucuaree miriqui:

—Puetunu nio cuarijiniji ratujuacajanaari saaja jiyamuecoquiaa. **14** Saniniuuja, cante cua mohuaca ratunutaniyani, majaari socua na jiyamuenu quiniutianiuhua. Cua mohuacaari juhua samo naca pacartanutaniya pueyaracaanu noojiajinia, shuquiriaatia na rishiniuria pueyaracaanu.

15 Cuno maajiiri Jesu sequeree:

—¡Pueyanonaa, cuno mohuaca cua niquitiore cua ratusocoriquiano, maja socua cua jiyamuenura, naajuhuaj, maja pueyaracaanu cua taquiriojonura nio cuarijiniji!

16 Jesuuri na sequeree:

—Miji quia niyaca quia sequecoo coteenu.

17 Maajiiri na riucuaree:

—¿Janiyate niyacaracajaaranai, quiaa jaara naa cua sequere?

Jesuuri na sequeree:

—Quiaacuajaari seetanujuanaa cua sequeree: “Niyacaajunijia”. **18** Seetanujuanaari. Quiaari tari cinco niyacaaraca quiquiaari. Mariyata cuno,

quiarijia quiata quiyani, majaari quia niyacajujuaj.

19 Naa cuno maaji tojishacari Jesu sequesanotej, Jesu sequereeri:

—Jiyaniijianaa, iquiaaqui Pueyaso sequenu panishano caminiujiunia! **20** Canaa supuetanaa pueyari niya nio tuhuananuucua Pueyaso secojonuujuja tarrijia. Niajaniya saniniuujia, Judiocuacani, niaari sequequiaa Pueyaso cuaara secojosaaria saaja Jerusalén tiacajinia.

21 Jesuuri na riucuaree:

—Seetanujuanaa quia sequereera maajiniae. Cua sequesanoocua quia tiuuri. Quera quiniutianiari Pueyaso nia secojosacari puetunu tiquiyocua nia quishacarrijianaa. Majaari tari Pueyaso secojosaanu quiniutianiya saaja Jerusalén tiacajinia, nio tuhuananuucuajuhuaj, taa quia sequereecuajani. **22** Niajaniyari maja nia niishiniu cana nia secojoquiaani. Canaa Judiocuacani, canaa cutaraari niishiyani cana canaa secojoquiaani. Pueyasocuajaari canaa Judiocuaca supuetanaa niishitioquiaari pueyacuaji Tacunaari supuenutaniya tama canaa Judiocuacajinijinojuaaja. **23** Quiarijia cutara, cante seetanujuanaa Pueyaso shuquiritiajacani, nojoriiri na Que Pueyaso secojonutaniya puetunu noojiatajanaa, seetanujuanaa na tojijiaca nojori quishacari. Pueyasoori naa paniya pueya secojonura nojuaja, cante na secojonuujuacacuajani. **24** Pueyasoori sohuanu. Naaratej, cante Pueyaso shuquiritiniu panijiacani, nojori cuaara secojoora Pueyaso

puetunu noojiatajanaa, Pueyaso Sohuanu tojijiaca nojori quishacari.

²⁵ Cuno maajiiri Jesu sequeree:

—Janiyacuajaari niishiyani Pueyaso sequencesano Cristo mijiria na jiyarosocoriquianoori niniutianiya. Nojuaja jaara tiuquiri, nojuajaari puetunu maninia pa pohuatanutaniyajanaa.

²⁶ Jiyacaritij, Jesuuri maatia na sequeree:

—Janiyacuajaari cunoni, quiata pocoojiyacua-jani.

²⁷ Jiyacaritij, canaari Jesuucua tiuquijiorohuani. Canaari jiuujiatequiaarini canaa niquishacari Jesu pocoojiyano cuno maajitia. Majaari quenaaja canaa nequesotanu quirii Jesu, casaa cuno maaji paniriquiaani, mariyata casaajiniji nojori pocoojoriquiaani. ²⁸ Cuno maajiiri cuniquijia na pataco tiujiaquee. Na tiacajinia quiaarohuari. Na tiuquishacari, na tiacajinia quiniaa pueya sequencesuhuari:

²⁹ —¡Miji pueyanaa, nia niquiquii pueyano! ¡Nojuajaari cua sequeree puetunu cua miishanojanaa! ¿Majate Cristoni, tariucuacaanu Pueyaso sequencesano pocua na jiyarosocoriquianotej?

³⁰ Pueyari cuno tiacajiniji Jesuucua nijioquiaari. ³¹ Cuno maaji quiasacari na tiacajiniohua, jiyacaritij, canaari Jesu mianuutenu paniriquiaa juucuani. Canaari na sequeriquiaani:

—¡Niishitiojonanaa, quia miaquere!

³² Jesuuri saaja canaa sequeree:

—Janiyacuaja miaquesanoracani, cuno miaquesanoori nia niishishoo.

³³ Canaa, Jesu saquiriojosano pueyani, canaari naa tama nequesoreetoorreejaanijia:

—Pa niyacari miaquetesaaquee jiyotucuaa-jaari.

³⁴ Jesuuri miriqui canaa sequeree:

—Cua miishacari cua Jiyarona panishano, cunoori cua miaquesano, naajuhuaj, cua tucuatasacari na panishano. ³⁵ Niaari sequequiaa: “Cuaara shocojoorajaara cuatro raca. Pueyari jiyacari shusha coteenutaniya na nataacuaca carojotanu”. Janiyara, maja naatej. Seetanujuanaa nia sequeya cutaranijia, nia namijia nia riatare maninia nia niquiniuria. Nataacuacacuaja tari noshiquia, carojotasocoriquiano. ³⁶ Na carojotanaari na poonijionu sami niquitioshiya. Na carojotasanoori pueyaracaanu quiriquiano. Naacuajitij, cuhuariquia natoonaari jatiqui shuquiriniutianiya nataacuaca carojotanaata.

³⁷ Naaratej, seetanujuanaari nio tariucuacaanu sequencesano. Naa sequeyari: “Tamonuuri saaja nareja nataja. Na nuhuaji, tamonuuri saniniuujia na carojotaja”. ³⁸ Janiyari saniniuujia nia jiyaramiquiquianuni nataacuaca nia carojotanura quenaaja nia poonijiyaquishoo cuhuariquiajinia. Cunoori tamasaca poonijiosano quiquiaari. Niaari juhuajaniya tamasaca poonijiosanojiniji carojotaquiaa shuquiriaatia.

³⁹ Queraatia pueya cuno Samaria tiacajinijinioori Jesuucua tiuuquiaari, nojori tojishacari naa cuno maaji sequencesanotej: “Cua sequeree puetunu cua miishanojuanaani”. ⁴⁰ Naaratej, cuno pueya

jaara Jesuucua tiuquijioquiaari, nojoriiri na masuuquiaari tii na camueenujunura nojori tiacajinia quenaaja. Naaratej, canaari Jesuta tii camueequiaari caapiqui juucani. ⁴¹ Socua querataa cuno pueyajinijinoori Jesuucua tiuquiaari, nojorijiana jaara Jesu tojiquiaari Pueyaso rupaa pohuataano. ⁴² Naaratej, nojoriiri cuno maaji sequeturee:

—Quiarijiani, majaari canaa tiuuniu Jesuucua, saaja canaa quia pohuatanuucua nojuajiniji. Quiarijia cutara, canaacuajaari tama canaa numaatajaaja tojirii na pohuatasanoni. Naaratej, canaari quiarijia niishiyani, Jesuuri seetanujuanaa Pueyaso jiyanootiriquiano pajaniya, puetunu mijiria quiniaa pueyajanaanio.

Jesu naatanishacari jiyaniijia Herodes pueyano niyanu

⁴³ Caapiqui juuca Jesu camueetanu nuhuaji canaa, Samaria pueya tiacajinia, nojuaajaari cu-niquiji canaa na pueya jiyataaree Galilea jiyajiniara. ⁴⁴ Jesuuri tarijia sequequiaari: “Nio tar-iucuacaanu sequesandoori seetanujuanaa sequesano. Naa sequeyari: ‘Pueyaso sequenu panishano caminiujiuniaari maja tojishano quijia tama na jiyajiniajaaja’”. ⁴⁵ Naajaa, Jesu jaara canaa tiuquitiasseequiaari jiyacari Galilea jiyajinia, cu-niquijinio pueyari maninia na tiuquitiquiaari saaja. Nojoriiri naa maninia na tiuquitiquiaari tari nojori niquiniuucua Jesu miishano na cumaacata Jerusalén tiacajinia, Pascuara nojori queranacusacari tii.

⁴⁶ Galilea jiyajinia canaa quishacari, Jesuuri canaa jiyataaree Caná tiacajinia, tee na

jataniquiaari mohuaca vinoracuajani. Jiyacaritij, Capernaum tiacajinia quiquiaariiri tamonu pueyano, Galilea jiya jiyaniijia jiyatesano camarnura. Cuno pueyano niyanuuri jiyanohua cusosu matariquiaa. ⁴⁷ Cuno camarnu jaara niishiquiaari Jesu tari tiuquiriohua Judea jiyajiniji, nojuajaari jiyacari niquiaari Capernaum tiacajiniji Jesuucua, Caná tiacajinia. Na tiuquishacari Jesuucua, na sequeseeri:

—¡Jiyaniijianaa, cucua quia taraajere! ¡Cua niyanu quia naataniquii, quera cusoyano!

⁴⁸ Jesuuri na riucuaree:

—Niaa jaara cua cumaacata cua miishano niquiaquiri, niaari cucua tiuyaquiquiaa.

⁴⁹ Cuno camarnuuri saaja Jesu sequeree:

—¡Jiyaniijianaa, mijijijaj, jati pa quiaare cua tiajinia, quiyanu cusoyaquishacarijia!

⁵⁰ Jesuuri na sequeree:

—Quia quiaarohua. Quia niyanucuaja tari naatarohua.

Cuno camarnuuri Jesu sequencesanoocua tiuuri. Quiaarohuari. ⁵¹ Jiyacari na tiajinia, na seyari niquiaari camarnu niyanuuri seetanujuanaa maninia naatarohua. Naaratej, nojoriiri quijoquiaari na camarnu numootenuucua. Nojori quiojosacari, na camarnu naacuturee saaja nuu cajiniocuaari. Nojoriiri na sequeree:

—¡Quia niyanu tari naatarohua!

⁵² Nojori camarnuuri nojori nequesotaree:

—¿Taacari na cusionu tajiyatemohuacuaani?

Nojoriiri na riucuaree:

—Naseeca nocuaji tajimiohuacuaa shusha pananu mueecosacari nio niniriquiacuaani.

⁵³ Cusosu queeri niishiquii, Jesucuajaari jiyacari na sequeriquiacuua: “Quia niyanu tari naatarohua”. Naaratej, camarnuuri necocuataja Jesuucua tiurii, puetunu necohuatajanaanio.

⁵⁴ Judea jiyajiniji Jesu tiuquishacariuhuaj, naa na naatanishacari cuno cusosutej, cunota tari caapiqui quiquiaariiri na cumaacata na miishano Galilea jiyajinia.

5

Jesu naatanishacari cumatacuruhuana cusosu Betzata cuari shuriucua

¹ Tamacariuhua, socua canaa Judiocuaca queranacusacari quiquiaari Jerusalén tiacajinia. Naaratej, canaari Jesuta nocua quiojoquiaarijiuhuaj. ² Jerusalén tiacaari puetunujuanaa puereetuua sohuacajiniacuma quiya. Tohuateyacaari quiya tiuquitiajara. Tamonu tohuateya sesa quiquiaari “Borregohua tiuquitiaja”. Na shuriucua quiyari cuari. Canaa Judiocuaca rupaajiniani, cuno cuariiri sesojosaaquiaari “Betzata”. Cinco suhuorotucuaari quijia cuno cuari shuriuquioco.

³ Queraatia cusosuhuari tii matacojua cuno cuari shuriuquioco. Cuno cusosuhuari quiquiaari cariyojuarujuri, shipiiniquiuniaa, cumatacuruhuana cusosuhuanio. Nojoriiri mohuaca sashijia cuaara queyaquetesaaria.

⁴ Pueyaso seruuri noojiaqueya rosequiaari mohuaca na queyaquetenura. Cuari queyaquesacari, cante coteenujuanaa rosequiaari tiini, nojuajaari naataquiaariuhua na cusionujiniji.

⁵ Tamonu cusosuuri tii narta cusosuhua tajinia

matariquiaajuhuaj. Tari na shoconujuquiaariiri treinta y ocho marijia, pueyaracaanu na matasacari. ⁶ Jesuuri na niiquiquiaari mataano. Noojiajinia niishirijiaariuhuaj cuno pueyano tari shocotejoquiaari queraatia marijia, naa pueyaracaanu na matasacari. Nocuaji Jesuuri na sequeree:

—¿Quiaate naatanu paniya?

⁷ Cusosuuri na riucuaree:

—¿Cantucua cua naacure cuarijinia cua rosenu-rani, mohuaca jaara queyaquetesaarecuua? Janiya jaara rosenu paniquiaa juucuani, cuarta cusosuuri saaja cua shocotaquiaani.

⁸ Jesuuri na sequeree:

—¡Quia sanere! Quia matu quia pataarohua.

⁹ Jiyacaritij, cusosuuri ritia jeequequee. Na matu pataarohuari. Cuno juucaari Sábado quiriquiaa, canaa Judiocuaca samaatenu juuca Pueyaso niquirara. ¹⁰ Canaa Judiocuaca camarucua jaara cusosu niiquiquiaari na matu pataano, na juaatiuriiri. Naa na sequetureeri:

—¿Majateeri quia niishiniu, quiarijiaari Sábado?

¡Maja quia matu quia patanujuaj!

¹¹ Cusosu naatanohuari nojori riucuaree:

—Cua naataniniacuaja cua sequereeno: “Quia matu quia pataarohua”. Janiyari cunora na pataani.

¹² Narta Judiocuaca camarucuaari na nequesotaree:

—¿Cantejaara naa quia sequereeni?

¹³ Nojori riucuareeri:

—Johuaj. Maja cua niishiniu canaquitijia cua naataniriitij.

Jesu naatanishacari cuno pueyano, queraatia pueyari namitia tii quiriquiaa. Naacuajitij, Jesuuri ritia tajiniocuareequiaari pueya tajinia, na naatanishano pueyanoocuaji. ¹⁴ Na nuhuaji, Jesuuri na riuriataquiaari cuno juucaja Pueyaso Secojojua tiajinia. Jiyacari na sequereeri:

—Quiaacuajaari tari naatanishaarohua. Quiarijia cutara tama quia cuaqueyajaaja quia cojuare maja sesa quia miiniuhuara socua, quiaa mariqui socua taraatia miiriiri.

¹⁵ Naacuajitij, cuno pueyanoori Jesu niishirii. Cunora, canaa Judiocuaca camarucuaacua quiaareeri. Nojori sequeseeri:

—Jesuqui cunocuaja cua naataniriini.

¹⁶ Naa Jesu miiniuucua samaatenu juucatej, narta Judiocuaca camarucuaari na quiatunu panijia juucua. ¹⁷ Jesuuri saaja nojori sequeree:

—Cua Queeri pueyaracaanu poonijiya. Janiyari cunora poonijiyajaacuhuaj.

¹⁸ Naa Jesu sequencesacari nojoritij, narta Judiocuaca camarucuaari jiyanolhua na monu paniriquiaa. Nojoriiri maja na monu paniniu quiriquiaa saaja samaatenu juuca na poonijionuucua. Socua jiyanolhua na motunu paniriquiaari Jesu jiyatenuucua tama na cuaqueyajaaja juhua Pueyaso, Pueyaso na jiyaniquishacari na Queta.

Jesuuri Jiyaniijajanaa, Pueyaso Niyanu na quishacari

¹⁹ Nocuaji Jesuuri narta Judiocuaca camarucua sequeree:

—Seetanujuanaa nia sequeyanijia, Pueyaso Niyanu cua quishacari, maja cua naata casaa

miiniu tamajaaja. Janiyari saaja miiquiaani taa cua Que cua niiququia miyanocuaani. Casaa cua Que miiquiaacuaani, janiyari naa miiquiaajaacuhuaj. ²⁰ Cua Queeri cua panijia. Cunora, nojuajaari puetunu na miishanojuanaa cua niishitiojoquia. Naajuhuaj, cua niishitiojonutaniyari socua jiyajeneta casaa tariucua cua miishanojinijicuaa. Niaari nocuaji shiriiquitiuniutaniya. ²¹ Cua Queeri macunucua samiitianijoquia, pueyaracaanu rishijia nojori quiniuria. Naajuhuaj, janiyari pueya samiitianijoquiaani, cana cua samiitianiniu paniyacuajani. ²² Cua Queeri maja na nequesoreenu quiniutaniya pueya. Nojuacuajaari tari cua niquitiocanu na cumaaca, puetunu pueyajanaa cua nequesoreenura. ²³ Nojuajaari naa miiquianu puetunu pueyajanaa quiniuria cua tojitiajaca, naatej, taa cua Que na tojitiatuquiaacuaani. Cante cua ruuretajani, cunoori cua Que ruuretajahuaj, nooj, cante mijiria cua jiyaroquiaaricuajani.

²⁴ 'Seetanujuanaa nia sequeyanijia, cante cua sequesano tojijiani, mariyata cante cua Jiyaron-aacua tiuyaaniuhuaj, nojuajaari pueyaracaanu Pueyasota rishiriquiano cutara. Nojuajaari maja na saniitiosaanu quiniutaniya. Nojuacuajaari tari samiitianishaarohua juhua macu na quiniujiniji Pueyasooju na quishacari. ²⁵ Seetanujuanaa nia sequeyanijia, quera quiniutaniyari juhua macunucua quiijaca samiitiacosacari. Seetanujuanaa quiarijiaari, juhua macunucua quiijacaari cua rupaa tojitianutaniya. Cua rupaa tojitiajacaari samiitiaconutaniya, pueyaracaanu rishiji-

aca nojori quiniuria. ²⁶ Cua Queeri quijiajuhnajaj. Majaari na naata shaajenu. Nojuajaari naa quijiara cua jiyatequiaarijuhuaj, juhua nojuarajujuaj. Naacuajitij, cua naata pueya jiyatenu naa quijiarajujuaj. ²⁷ Pueyanora cua quiniuucua, na cumaaca cua niquitioreeri cuarta pueya cua nequesoreenura, nojori cua saniitionurajuhuaj. ²⁸ Cua tojitiare. Majaari nio seque-sanoocuaji nia shiriiquiniu. Tamacari, puetunu macunucuajanaari cua rupaa tojitiuniutianiya. ²⁹ Macunucua tojitiushacari cua rupaa, nojoriiri samiitiaconutaniya, na jamacajiniji nojori tohua-reetanura. Cante maninia miijiaca quiquiaarini, samiitiaconutaniuhuari pueyaracaanu shuquiriaatia quijiaca nojori quiniuria Pueyasota. Sanini-uuja, cante sesa miijiaca quiquiaarini, puetunu nojorijianaari quejoosaanutaniya pueyaracaanu saniitiosocoriquiano.

Jiyaniijiajanaa na quiniuucua, Jesu tama nojua-jiniji pohuataajaaja

³⁰ 'Pueyaso Niyanu cua quishacari, naajaa, majaari cua miiniu tama cua panishanojuaaja. Janiyari sesa miijiaca juaaquiaacuajani, saaja cua Que niishitishacari janija, nojori miishanoori sesa. Tama cua panishanojuaaja miyashijia cua quiniuucua, janiyari namitiajanaa nojori juaaquiaani. Janiyari pueyaracaanu miiquiaa saaja cua Jiyarona panishanon. ³¹ Pueyano jaara tama nojuajinijiaaja pohuataa narta pueyano, na pohuatasanoocua maja tiuushano. Naaratej, janija jaara tama janijainiji pohuatariquia nia niquierani, tama cua pohuatasanojuaaja maara

najuhuana quiriquiaj. ³² Naajaa, quiarijia cutara nia naata niishiniu cua pohuatasanoori seetanujuanaa. Tamonucuajaari janiyajiniji pohuataa seetanujuanaa. Nojuajaari cua Que. Cunora, niishiyaniija na pohuatasano janiyajinijiiri maja najuhuanaaj.

³³ 'Niaari nia pueya jiyarocanu Tiuquinijiona Juanca, nojori nequesotanura janiyajiniji. Nojuajaari saaja seetanujuanaa nia pohuatacanu janiyajiniji. Majaari na seetanu quiquianu janiyajiniji. ³⁴ Nojuaja jaara seetacanu janiyajiniji niajaniya, quiria, naajaa. Janiyacuajaari niishiyani seetanujuanaari cua pohuatasano niajaniya tama janiyajinijiaaja. Tiuquinijiona Juanri seetanujuanaa pohuatacanu janiyajiniji niajaniya. Niaa cuaara na pohuatasanoocua tiuria, Pueyaso jiyanooniuria niajaniya. Janiyari saaja cunora nia pohuataa Tiuquinijiona Juanjiniji. ³⁵ Nojuajaari juhua samaritiu noshitishano nia tajinia na quishacari. Niaari rupaquijia na timitiacanu, juhua na cuhuatasacari niajaniya. Niaari najuhuana tojiquianu na pohuatasano. ³⁶ Tiuquinijiona Juan pohuatasano janiyajinijiiri seetanujuanaa. Niaa jaara na pohuatasanoocua tiuuniu paniyashijiaca quiyajaa, naajaa. Cua cumaacata cua miishacari, cunora seetanujuanaa nia niishiri, cua Que Pueyasoori cua jiyarquiaari. Nojuacuajaari cua sequequiaari naa cua miiniuriatej. ³⁷ Cua Quejanaari cua jiyarquiaari. Nojuajaari janiyajiniji niishitioquiaari pueya. Naajaa, majaari quenaaja nia tojiniu quiquiaari na pocuanu. Nojuajaari nia niquishoojuhuaj. ³⁸ Majaari quenaaja na rupaa quiniu nioo-

jiajinia, nia tiuyaquishacari na Jiyarosanoocua. ³⁹ Niaari suraatia serojoquiaa tariucuacaanu naajiosano Pueyaso Rupaa. Niaari jiyaniya niaa jaara Pueyaso Rupaa niishijiaca quiri, niaari naa pueyaracaanu quijriara quiniutianiya. Seetanujuanaa majaari naatej. Cuno Naajioneejinia, tiiri janiyajiniji naajiotasano quiyacuaja. ⁴⁰ Niaari saaja cucua niniu paniyaquiquiaa cua jiyatenura niajaniya pueyaracaanu quijiacara cutara.

⁴¹ 'Maninia cua miishanoori maja pueya sequenura janiya: "Quiaari maninia pueyano". Janiyari saaja cua Que shuquiritiquiaa cutarani. ⁴² Janiyari seetanujuanaa nia niishiyani. Niaari Pueyaso shuquiritiaashijiaca, nia paniyaquishacari nojuaja. ⁴³ Cua Quecuajaari cua jiyaroquiaari cua niishitiojonura niajaniya nojuajiniji. Quiarijiani, majaari nia tojiniu paniniu janiya. Saniniuu{jia, tamonu jaara tama na cuaqueyajaaja jiyateya juhua Pueyaso Jiyarosanora na quiniuria, niaa maara cuno tojiri cutara, nojuaja jaara niaacua nimia na niishitiojonura niajaniya tama na niishishanoju{aaja. ⁴⁴ Majaari nia naata cua pohuatasanoocua tiuuniu, niaa jaara saaja niarta pueya shuquiritiasano quiniu paniquiaa, maja Pueyaso shuquiritiasano. ⁴⁵ Majaari nia jiyaniniu janiya niaacuara tonujunutaniya cua Queni. Tama Moiséscuajaari niaacuara tonujunutaniya, cua tojitiaashijiaca nia quiniuucua. Niaari jiyaniya niaa Pueyaso muerasu, juhua Moisés tojijiaca nia quishacari. ¿Niaateeri seetanujuanaa Moisés tojijiaca? ¡Maja! ⁴⁶ Nojuacuajaari janiyajiniji naajiotaquiaari. Naacuajitij, niaa

jaara seetanujuanaa na naajiotasanoocua tiuuriquia, niaa maara cucua tiuuriijuuhua.
47 Nocuaji, niaa jaara Moisés naajiotasanoocua tiuyaquiquiaa, ¿niaatucua taa tiuuri quiarijia cua pohuatasanoocuani?

6

*Jesu mianuutesacari cinco mil canuu
(Mt 14.13-21; Mr 6.30-44; Lc 9.10-17)*

1 Na nuhuaji, canaari Jesuta niuutiaquiaari Galilea caminia taquijiriani. Galilea caminia sesa quiquiaarijuhua Tiberias caminia. **2** Jiyanolhua queraatia pueyari Jesu niquiquiaari tari, cusosuhua na naatanijiosacari. Naaratej, nojoriri Jesu neteyotariquiaa caminia shuriuquioco. **3** Canaa shiitiasacari caminia taquijiria, Jesuri canaa tacatamaa tuhuananuucua. Tii cajitiasee canaari. **4** Jiyacaritij, quera Pascuara queranacusacariiri quiriquiaa. **5** Jesu niquishacari jiyanolhua queraatia pueya nocua niyano, canaa cojinia Felipe sequereeri:

—¿Tee pa masenutaniya queraatia pan nio pueyaraarini?

6 Naa Felipe nequesotareeri nareja na saninuria. Jesuuri tari niishiriquiaa taa nojuajanaa mianuutenutaniya cuno pueyani. **7** Felipeeri na riucuaree:

—¡Paa jaara cumaneeca jiitiare doscientos juuca pa poonijiosanojiniji pan pa masetajarani, cuno maara najuhuana seaja quiri puetunu nojoririajanaa!

⁸ Jiyacaritij, canaa cojinia Andrésri Jesuucua nimiaa. Andrésri Simón Pedro tarajanu. Nojua-jaari Jesu saquiriojosano pueyanojuhuaj. Jesu sequeseeri:

⁹ —Jiyanijianaa, caya samijia niya cinco pan jiitiae cebada cashojuajiniji shipinishano, caapiqui sapitiaajanio. Naajaa, cunoori najuhuana puetunu cuno pueyarajanaa.

¹⁰ Jesuuri saaja canaa na saquiriojosano pueya sequeree:

—Puetunu pueyajanaa nia sequere cuaara caji-tiuuria.

Cuniqui, canaa tii quiriquiaani, shanohua jiyasocuaari quiriquiaa, maninia cajitiujia. Naaratej, pueyari cajitiurii. Puetunu cuno pueya maanujinijiniojuanaani, saaja canuuri quiriquiaari cinco mil pueya. ¹¹ Jiyacaritij, Jesuuri cuno pan pataree. Pueyaso secojoree nocuaraari. Na nuhuaji, canaa na serotaniriiri. Canaari cajitiuyano pueya puetunu na panishanojuanaa niquitijoreeni nojori miaqueniusocoriquiano. Jesuuri naa miirii sapitiaajahuaj. ¹² Puetunu pueyajanaa jaara tooquioquiaari, Jesuuri canaa na saquiriojosano pueya sequreeni:

—Puetunu miaquesano raquiquajanaa nia reraterohua, maja najuhuana na niitiasaanura.

¹³ Canaari cuno cinco panjiniji pueya miaquesano raacua reratereeni. Canaa reratesacari, canaari doce canaasatu mishinijoreeni. ¹⁴ Pueya niquisacari naa Jesu miishano na cumaacatatej, nojoriiri sequeturiquiaa:

—¡Nio pueyanoqui seetanujuanaa Pueyaso sequenu panishano caminiujiunia, nooj, tariucua-caanu sequesaaquiaari pocua niriquianote!

¹⁵ Jesuuri niishirii cuno pueyari na quianu paniriquiaa, nojori jiyatenura nojuaja puetunu Israel pueyajanaa jiyanijia na quiniuria. Nocuaji, Jesuuri tamajaaja tacaquee socua jiyaconaja tuhuananuucua.

Jesu rucuanesacari mohuaca caco

(Mt 14.22-27; Mr 6.45-52)

¹⁶ Tariucua pananu tiuquishacari, canaa, Jesu saquiriosano pueyani, canaari rosetaarohua caminiajiniarani. ¹⁷ Canaari botejinia tacataseeni, cuniquiji Capernaum tiacajiniara canaa niuutianura caminia taquijiria. Tariucua ninishiuiiri quiriquiaa. Majaari Jesu tiuquiniu quiriquiohua juhuanojuaja canaacua. ¹⁸ Tari canaa niuutiasacari, paratuuri jiyanohua piyarojoriquiaa. Caminiaari cunora jiyanohua cajiniuucuariquiaa. ¹⁹ Canaari tari caminia jiuujiajinia quiriquiaani, seis kilómetroruhua canaa ruparetasaquiji. ¡Canaari jiyacari casaa niquirii canaacua catecanoyanoni! ¡Mohuaca caco canujuriquiaari! ¡Canaari nocuaji shiriiquitiurii jiyanohuani! ²⁰ Jiyacaritij Jesuuri canaa sequereeni:

—¡Maja pueretunu! ¡Janiyacuajanija!

²¹ Na rupaa canaa tojishacari, canaari shuquiriaatia na tacanitiurii botejiniani. Canashiyaquiji boteeri ritia shiitiasee terara canaa quiariquiaacuajani.

Jesu mianuutesano pueya pajesacari nojuaja

22 Jaara juhuaquequiaari, Jesu mianuutesano pueyari na pajenuunu coteequiaari tee canaa quiriquiaa caminia taquijiriacuajani. Nojoricuajaari tenacari niquiquiaari saaja niquiriyatu boteeri shiitiariquiaa. Saaja canaa, Jesu saquiriojosano pueyani, canaari cuno botejinia quiaquiaariuhua nojori niquiarani. Majaari Jesu quianu quiriquiaa cutara canaata.

23 Jiyacaritij, Tiberias tiacajiniji boteeri tiuquijioquiaari catecaja nojorijiniji, tee Jesu mianuutequiaari nojoricuajani. **24** Cuno pojori niishishacari maja Jesu quiniu quiriquiaa tari tii, canaa na saquiriojosano pueyahuaj, nojoriiri cuno boteyajinia tacataquiaari. Nojoriiri Capernaum tiacajinia nijioquiaari cuno boteyajinia, tii nojori pajenura Jesu.

Jesucristo juhua poojia miaquesano

25 Cuno pojori tiuquijiosacari caminia taquijiria, Jesu riuriatatuseeri. Na nequesotatureeri:
—Niishitiojonanaa, ¿taacari quia niyaro-huacuaarin?

26 Jesuuri saaja nojori sequeree:

—Janiyari seetanujuanaa nia sequeyani, majaari nia pajenu janiya nia niquiniuucua cua cumaacata cua miishano. Niaari cua pajenuya saaja cua mianuutenuucua niajaniya, taa nia tooquierucuaacuajani, cua mianuutesacari niajaniya. **27** Maja saaja miaquesanoocua nia tacaaniu, nia cuaqueya nia cumaquitiajara. Cunoori maja na jiyatenu quiniutianiya niajaniya pueyaracaanu rishijiara. Saaja nia tacaari cutara nioojia samiitianijia

miaquesanoocua, pueyaracaanu rishijia nia quiniuria. Janiyacuajaari cuno nia niquitioriquianoni, pueyano cua quiniuucua. Cua Quecuajaari cunora cua jiyaroquiaari. Cunora, cua Queeri cua miitiquiaa cua miishano na cumaacata, nia niishiniuria janiyari na jiyarosanoni.

28 Cuno pueyari Jesu nequesotaree:

—¿Casaa canaa miiniutianiyani Pueyaso panishano canaa miiniuria, Pueyaso shuquiritiasano canaa quiniuriajuhuaj?

29 Jesuuri nojori riucuaree:

—Pueyaso Jiyarosanoocua nia tiuuri. Saaja naa nia miishacaritij, Pueyasoori nia shuquiritianutaniya.

30 Cuno pueyari Jesu sequeturee:

—Canaa niquiara quia cumaacata casaa quia miircuarajaj, canaa niishiniuria quiaari seetanujuanaa Pueyaso Jiyarosano. ¿Casaa canaa quia niquitiniutianiya canaa tiuuniuria quiocuani? **31** Canaa quia niquitiricuaraja quia cumaacata quia miishano, taa Moisés niquitiquiaari canaa supuetanaacuaani. Nojuajaari jiyocuacaanuji pan tiniquiaari pueyaracaanu nojoriria, cariiquia jiyajinia nojori rucuanejosacari. Naa naajiotasano quiyacuajaari tariucuacaanu Pueyaso Rupaajinia:

“Nojuajaari nojori mianuutequiaari jiyocuacaanuji tinio pan”.

Naacuajitij, canaari niishiyani Moiséscuajaari Pueyaso jiyarosano quiquiaari.

32 Jesuuri nojori riucuaree:

—Seetanujuanaa nia sequeyanijia, cuno jiyocuacaanuji panni, cunoori maja Moisés tinishano quiquiaari. Majaari seetanujuanaa jiyocuacaanuji pan na quiniu quiquiaarijuhuaj. Quiarijia cutara, cua Queeri niaacua jiyarorucuaa seetanujuanaa jiyocuacaanuji panjanaa cutara.
³³ Cuno, Pueyaso niquitiosano pan jiyocuacaanuji rosenoni, cunoori puetunu mijiria quiniaa pueyajanaa samiitianijoja cutara.

³⁴ Naaratej, cuno pueyari Jesu sequeree:

—Jiyaniijiana, quiocua pueyaracaanu canaa niquitiorquia cuno pan!

³⁵ Jesuuri nojori sequeree:

—Janiyacuajaari cuno panni, pueya samiitianijojuani. Cante cucua niyani, majaari na miaajenu quiniutianiya socua. Cante cucua tiuuriijaaniuhuaj, majaari na jiyamuenu quiniutianiya-juhuaj. ³⁶ Taa cua sequeree tari niajaniyacuajani, niaari juucua cua niquiya. Majaari quenaaja cucua nia tiuuniu. ³⁷ Naajaa, puetunu cua Que niquitiosanojuanaa janiyani, nojoriiri cucua niya. Cuno pojori, cante cucua nijiyani, majaari cua ruuretanu nojori. ³⁸ Majaari jiyocuacaanuji cua roseu quiquiaari cua miiniuria tama cua miiniu panishanojuaja. Mijiria niquiaarinijia saaja cua Que panishano cua miiniuria, cante cua jiyarquiaaricuajani. ³⁹ Majaari cua Jiyarona paniniu cua juurequetenura quenaaja niquiriyatujua na niquitiosanojiniji janiya. Nojuajaari paniya cutara, nojori cua samiitianijionura jiya puequesacari. ⁴⁰ Canapuete cucua tiuuijacani, nojori nishishacari janiya Pueyaso Niyanuni, cua Queeri

puetunu cuno pojorijiana paniya pueyaracaanu rishijiaca nojori quiniuria. Naacuajitij, janiyari nojori samiitianijionutaniya jiya puequesacarini.

⁴¹ Jesu sequenuucua, “Janiya jiyocuacaanuji roseno panni”, tii quiniaa narta Judiocuacaari cunora juaaquioree. ⁴² Sequetureeri:

—¿Majate nio pueyano Jesucuaja, José niyanutej? ¡Paacuajaari na queya niishiyani! ¿Casaara quiarijia na sequeyari: “Jiyocuacaanuji rosenonijia”?

⁴³ Jesuuri nojori sequeree:

—¡Tariucuaja! ¡Maja nia juaaquionu!

⁴⁴ Pueyanoori maja na naata tiuuniu cucua tamajaaja, cua Que jaara noojiajinia pooni-jiyaquiri. Janiyari puetunu cucua tiuuniaajanaa samiitianijionutaniya jiya puequesacarini.

⁴⁵ Tariucuacaanu pueyara Pueyaso sequencesano caminiujiunia naajiotasanocuajaari naa sequeya: “Pueyasocuajaari puetunu nojorijiana niishitijo-
jonutaniya”.

Naacuajitij, cante cua Que niishitiosano tojija seetanujuanaani, nojuajaari cucua tiuya.

⁴⁶ ’Cua Queeri maja pueya niquishano quenaaja. Saaja na niquinia cutaraari janiya cante Pueyasojiniji niquiaaricuajani.

⁴⁷ Seetanujuanaa nia sequeyanijia, cante cucua tiuujiani, nojuajaari tari pueyaracaanu rishijiara jatanishaaree. ⁴⁸ Janiyacuajaari pueya samiitianijia panni. ⁴⁹ Cariiquia jiyajinia nia supuetanaa camarucuneejotasacari, nojoriiri cuno jiyocuacaanuji tinio pan miaquenuuquiaari juucua. Naajaa, saaja

cusonuuquiaariiri. ⁵⁰ Saniniujia, cante quiarijia seetanujuanaa jiyocuacaanuji roseno pan miaqueyani, majaari Pueyaso shaajamu quiniutianiya nojuaja. ⁵¹ Janiyacuajaari cuno samiitianijia panni, jiyocuacaanuji rosenoni. Cante nio panjiniji miaquejani, nojuajaari pueyaracaanu quijia quiniutianiya. Nio pan, janiya na niquitionutaniya puetunu mijiria quiniaa pueyacuarajanaani, cunoori tama cua cuaqueyajaaja.

⁵² Jiyacaritij, tii quiniaa narta Judiocuacaari naa sequetooree tamajaaja na juaniutia:

—¿Nio pueyanotucua taa miaquetera tama na cuaqueyajaaja pajaniyani?

⁵³ Jesuuri jiyacari nojori sequeree miriqui:

—Seetanujuanaa nia sequeyanijia, niaa jaara miaqueyaquiri cua shu, niaa jaara ratuyaquiri cua nanacajuhuaj, majaari samiitianijiosano nia quiniu quiniutianiya, pueyaracaanu quijiaca nia quiniuria. ⁵⁴ Cante cua shu miaquereeni, cante cua nanaca ratureejaaniuhuaj, nojuajaari tari naatarohua shuquiriaatia na quiniuria pueyaracaanu. Jaara cusoyare, naajaa, janiyari na samiitianiniutianihuia jiya puequesacarini.

⁵⁵ Cua shuuri seetanujuanaa miaquesano cutara. Naajuhuaj, cua nanacaari seetanujuanaa ratusano cutara. Cunoori maja juhua mijiria nia miaquesano. ⁵⁶ Cante cua shu miaquenani, cante cua nanaca ratunajaniuhuaj, nojuajaari coojia rupueja. Janiyari noojia rupuejahuaj, pueyaracaanu rupuetootesano canaa quiniuria. ⁵⁷ Cua Jiyarona cua Queeri seetanujuanaa quijia cutara. Cua Que rupueja cua quishacari,

janiyari cunora shaajeyashijiani. Naaratej, cante cua miaquenani, nojuajaari pueyaracaanu quijia quiniutianiyahuaj, na rupuesacari janiya. ⁵⁸ Janiyari maja juhua nia supuetanaa miaquesano panni. Nia supuetanaari cuno pan miaquenuuquiaari najuhuanaj. Naajaa, saaja cusonuuquiaariiri. Janiyari seetanujuanaa jiycuacaanuji roseno pan cutaraní, nia miaquesocoriquiano. Cante cua miaquejani, jaara cusoyare, naajaa, samiitianutaniuhuari pueyaracaanu quijia na quiniuria.

⁵⁹ Jesuuri puetunu niojuanaa pohuataquiaari pueya niquiara Pueyaso secojojua tiajinia Caper-naum tiacjinia.

Queraatia Jesu nuhuajiniae pueya cartesacari nojuaja

⁶⁰ Naa pueya tojishacari Jesu niishitiosan-otej, queraatia na nuhuajiniae pueyari naa sequetooquiaari tamajaaja:

—Cuno na sequencesanoori jiyano hua jiyajeneta pa miiniuria puetunu juanaa. Maja pa naata. ¿Cantucua na tojirijaarajaaranijia?

⁶¹ Jesuuri naa nojori sequencesano niishirii noojia-jinia. Nocuaji nojori sequereeri:

—¿Niaateeri naa cua sequenuecua juaya?

⁶² ¿Niaatucua taa sequere socuani, niaa jaara cua niquiri tacaano jiyocuacaanuhua, teje cua niquiaaricuajani? ⁶³ Cua shu maja cuma acaraca pueya na samiitianiniuria. Saaja cua Sohuanu cutaraari pueya samiitianijia, pueyaracaanu rishijiaca nojori quiniuria. Niaa jaara cua sequencesanoocua tiuuri, cunoori

cumaacaraca cutara na samiitianiniuria niajaniya.⁶⁴ Noojaqueya niajaniyajinijinioori cucuaji taacanuyaaja.

Jesuuri tarijia niishijia cante nocua tiuyashiji-acani, mariyata cante na paraa na quiatenu-taniyani.

⁶⁵ Naa sequeree socua cuno pojoriiri:

—Janiyacuajaari cunora nia sequereeni: “Maja pueyano naata cucua tiuuniu, cua Que jaara noojajinia poonijiyaquiri”.

⁶⁶ Jiyacaritij, queraatia Jesu nuhuajiniaa pueyari na cartequiaari. Nojoriiri maja tari Jesuta na rucoojonu quijia. ⁶⁷ Nocuaji, Jesuuri jiyacari canaa na saquiriojosano pueya nequesotaree:

—¿Niajaniyariuhuaj, niaateeri cua cartenutaniyajacuhuaj?

⁶⁸ Simón Pedroori Jesu riucuaree:

—¡Maja Jiyaniijiajanaa! ¿Canaatucua tamonu jiyaniijiaacua pacuren? Canaa quia pohuatasanocuajaari na naata canaa jataniniu pueyaracaanu rishijia canaa quiniuria.

⁶⁹ Canaacuajaari tari quiocua tiuuquianuni, canaa niishishacari quiaari Pueyaso Niyanu, saa maninia miijaja.

⁷⁰ Jesuuri canaa sequeree:

—Niaacuajaari tama cua saquiriojosano doce pueyajaaja. Saniniuujia, niquiriyatu niajaniyajinijinioori sesaaca.

⁷¹ Naa Jesu sequesacaritij, Judasjiniji queriquiaari, Simón Iscariote niyanuni. Nojuajaari seetanujuanaa niquiriyatu canaajinijinio Jesu doce saquiriojosano

pueyajinjinio quiquiaari. Naajaa, tama na Jiyaniijiaaja tacartariquiano quiriquiaquiiri.

7

Tama Jesu tapueyocuacajaaja Jesuucua tiuyashijiaca quiquiaari

¹ Na nuhuaji, Jesuuri Galilea jiyajinia rucuanejoriquiaa. Canaari na cojiriquiaani. Majaari na quiniu paniniu quiriquiaa Judea jiyajinia, tii quiniaa Judiocuaca monu panishacari nojuaja. ² Jiyacaritij, quera socua canaa Judiocuaca queranacusacariiri quiquiaari Jerusalén tiacajinia. Cuno queranacusacariria pueyari ocho juuca shocotejoquiaari suhuorotucuajinia nojori quishacari. Naa miitiuquiaariiri puetunu marijarajanaa canaa niishiriojonura, canaa supuetanaa Israel pueyari saaja suhuorotucuajinia quijaca quiquiaari, pueyaracaanu nojori camarucuneejotasacari cariiquia jiyajinia nojori quishacari. ³ Jiyacaritij, tama Jesu tapueyocuacajaarijia naa Jesu sequeturee nojori macaatiniuria nojuaja:

—¡Majaari niyaja quia jateenu! Quiocua queranacunuucua Judea jiyajinia quiaarejuhuaj. Quiocua tii miijiosee quia cumaacata, quia jiyopue niquiniuria puetunu quia miishanojuanaa. ⁴ Pueyano jaara puetunu pueyajanaa tojiniu panishano pueyano quiniu paniri, ¿maatucua casaara jiyasohuaja miijiore na cumaacatani? Naatej, taa niya quia miijioquiaa quia cumaacatacuaani, naa quia

mijjiosee puetunu pueya niquiarajanaa Jerusalén tiacajinajuhuaj.

⁵ Majaari quenaaja tapueyocuaca tiuuniu quijia Jesuucua. Cunora naa na sequetureeri. ⁶ Jesuuri saaja nojori riucuaree:

—Juhuanojuaja maja cua quiasacari cua miiniuria taa nia sequeyacuajani. Niaa jaara quianu paniri, niama juhuajaniya quiaaretej. ⁷ Niarta mijiria quijiaca pueyari maja na naata juaaniu niajaniya. Janiya cutaraari nojori niquiniu paniyaquishooni. Cua niquitiuniu paniyaquiaari, nojori cua niishitishacari nojori miishanoori sesa. ⁸ Nia quiojiyare queranacunuucua. Janiya cutaraari maja cua quianu quiniutianiya juhuanojuaja. Quiarijani, puer a juhuacariciaari cua miiniuria taa nia sequeree janiyacuajani.

⁹ Naa nojori na sequenu nuhuajitij, Jesuuri cuniquija jiyojeree Galilea jiyajinia.

Jesu quishacari cuno queranacunuunujinia

¹⁰ Na tapueyocuaca jaara quiojoquiaaricuaa Jerusalén tiacajiniara tii queranacunuunura, Jesuuri jiyasohuaja quiaaree nojori nuhuajijiuhuaj. ¹¹ Queranacunuusacari, narta Judiocuaca camarucuaari Jesu pajenuuriquiaa. Nojoriiri naa sequeturiquiaa:

—¿Tee cuno pueyano quiyarini?

¹² Puetunu pueyajanaari Jesujiniji sasacojotooriquiaa. Noojiaqueyari sequeriquiaa:

—Jesuuri maninia pueyano.

Tamasacaari saniniuujia sequeriquiaacujua:

—¡Maja maninia pueyano! ¡Pueya sapojosua na-juhuana!

¹³ Puetunu pueyajanaari naa sasacojo-tooriquiaa jiyasohuaja, nojori pueresacari narta Judiocuaca camarucua.

¹⁴ Jiuujianaraca juuca jaara tari shocojoquiaari nojori queranacunuusacari, Jesuuri jiyacari shusha tiuquiquiaari Pueyaso Secojojua tiajinia. Tii coteeree pueya niishitiojonuuri. ¹⁵ Canaa Judiocuaca camarucuaari jiuujiatequiaari nojori tojishacari Jesu niishitiosano. Naa sequetureeri:

—¡Cuno pueyanoori maja quenaaja na serojonu quiquiaari! ¿Taa na niishiya pueraarini?

¹⁶ Jesuuri nojori sequeree:

—Cua niishitiosanoori maja tama cua niishishanojuaaja. Cunoori cua Jiyarona niishithano janiya. ¹⁷ Cante Pueyaso panishano miiniu paniyani, nojuaja cuaara miiria taa cua niishitiojiyacuaani. Naacuajitij, nojuajaari jiyacari niishiniutianiya, cua niishitiosanocuajaari Pueyasojiniji seetanujuanaa, maja tama cua niishishanojuaaja. ¹⁸ Cante tama na niishiriosanojuaja pohuatajani, nojuajaari saaja naa miiquiaa juhua tojishano pueyano na quiniuria. Jiyano pueyano cuaara tojiyaquishaaria. Saninuuja, cante na jiyarona niishitiosano pohuataa pueyani, pueya tojiniuria na jiyarona, cuno pueyano pohuatasano cutaraari seetanujuanaa. Cuno pueyanoori maja pueya sapojosua.

¹⁹ ¿Niaateeri seetanujuanaa supuetana Moisés Rootasano tojitiajaca? Majaruhua. Majaari quenaaja niquiriyatu niajaniyajinijino na

rootasano tojijia. ¿Casaara nia monu paniya janiyani? ¿Supuetana Moiséste naa nia niishitiojiya na naajjoneejinia?

20 Nojoriiri Jesu riucuaturee na juaaniutia:

—¡Quiaqui samaruraca! ¿Cante quia monu paniyani? ¡Canaa quia sequeretoj!

21 Jesuuri nojori sequeree:

—Puetunu niajaniyajanaari shiriiquitiuquianu samaatenu juuca cua miishacari niquiriyatu casaaniyojua cua cumaacata. **22** Supuetana Moisescuajaari nia rootaquiaari nia mueya cararaatiuuquia co nia miatenura, ocho juuca jaara na shocojore na rasaanujiniji. Seetanujuanaa, nio niishishanoori maja tama Moisés niishishanojuaaja. Cunoori tariucuacaanu pa supuetanaa niishishano Moisés niyacarijia. Pueyari naa rootasaaquiaari naa nojori miiniuria necohua, seetanujuanaa Pueyaso saquiriojosano Israel pueya nojori quiniuriajuhuaj. Naaratej, jaara quiri samaatenu juuca, naajaa, niaari naa nia niquiohua cararaatiuuquia co miatejoquiaa. **23** Naa nia miishacari samaatenu juucatej Moisés Rootasano nia tojiniuria, ¿casaara nia juaya janiyani, cua naataniniuucua cusosu samaatenu juucani? Niaari saaja shiitianiyojua miatejiya, maninia nia niquiohua quiniuria Pueyaso niquiara. Janiya cutaraari puetunu cuno cusosu cuaqueyajanaa jeecacanuni. **24** Naaratej, maja ritia pueya juaajia nia quiniu, nia niishiyaquishacari maninia. Jacaria niishiriojojua nia quiri, niaa mariqui najuhuana pueya juaariiri na miishano jaara sesa quiyaquiri.

Jesu pohuatasacari tama nojuajinijijaaja

²⁵ Jiyacaritij, noojiaqueya Jerusalén tiacajini-jinio pueyari tama sequetooreejaaja:

—¿Majate nio pueyano pa camarucua pajesanocuaja na mosocoriquianotej? ²⁶ ¿Taateni? Noocuajaruhua juhuajaniya pohuataa pueya niquiaratej. Majaari quenaaja pa camarucua tenujununoj. ¿Pa camarucuate jiyanaya soj, nojuaja seetanujuanaa Cristo, tariucuacaanu sequesano pocua jiyarosaariquianotej? ²⁷ Paacuajaari nio pueyano niishiyani, tejenote nojuajani. Saniniuujia, Cristojuanaa jaara tiuquiri, majaari quenaaja na niishishaanu quiniutianiya cutara tejenote nojuajani.

²⁸ Jesuuri jiyacari niishitiojoriquiaa Pueyaso Secojojuajinia. Naa na tojishacari pueya sequesanotej, naa na rupaa paaretareeri:

—¿Naatee? ¿Niaateeri cua niishiya? ¿Niaateeri niishiyajuhuaj, tejenote janiyani? Naajaa, majaari cua niniu quiquiaari tama cua panishacar-ijiaaja. Janiyari jiyarosanoni. Cua Jiyaronaari seetanujuanaa quijajuhuanajaj. Nojuajaari nia niishishoo. ²⁹ Janiyari na niishiya cutarani. Janiy-acuajaari tiji ninioni. Nojuajaari cua jiyarquiaari.

³⁰ Nojoriiri jiyacari Jesu quiatunu panirii. Naajaa, majaari quenaaja tamonu naata quiriquiaa na quianura. Majaari na naata quianu quishaquiaari, juhuanojuaja na monu juuca quiyaquishacarijia. ³¹ Saniniuujia, queraatia cuniqui quiniae pueyari Jesuucua tiuquiaari. Nocua tiuuniaari naa sequetuquiaari:

—¿Cristojuanaa jaara tiuquiri, nojuajatucua socua jiyajeneta casaa miiri na cumaacata nio pueyano miishanojiniji?

Fariseocuaca quiatenu panishacari Jesu juucua

³² Fariseocuacaari cuno pueya tojiquiaari naa nojori maniniuhuaqueetaano Jesu. Naaratej, cuno Fariseocuaca, pueyacuara secojonaa camarucuanio, puetunu nojorijanaari Jesuucuara roojotooquiaari. Na nuhuaji, nojoriiri Pueyaso Secojojua tia cojuanaa pueya jiyaramiquiquiaari Pueyaso Secojojua tiajiniara, tii nojori quianura Jesu. ³³ Jesuuri jiyacari nojori sequeree:

—Janiyari saaja rupaquijia niaata quiniutianiyyani. Na nuhuaji, janiyari cua Jiyaronaacua riujuuniutianiuhuani. ³⁴ Niaari cua pajenuunutaniya najuhuanaj. Majaari nia riuriatanu quiniutianiyya janiya. Majaari nia naata quianu quiniutianiyya tee cua quiniutianiyyacuaani.

³⁵ Nocuaji, cuno Judiocuacaari tama sequetoreejaaaja:

—¿Tee na quianutaniyyajanojoni naa pocuaaniquitij, na riuriataaquishaanurajuhuaj? ¿Parta Judiocuacaacua quianutaniya soj, noo pojoriicua Griegohua tajinia niyaquejoquiaaritij? ¿Tii nishitiojonutaniya cuno taucuaca soj? ³⁶ ¿Casaa na sequenu paniya pajaniyarini na sequencesacari: “Niaari cua pajenutaniya najuhuanaj. Majaari nia riuriatanu quiniutianiyya janiya”, na sequencesacarijiuhuaj: “Maja nia naata quianu quiniutianiyya tee cua quiniutianiyyacuaani”?

Jesu pohuatasano miriqui Pueyaso Sohuanujiniji

³⁷ Siete juuca jaara tari shocojoquiaari, queranacunuunu puequesacari juucajanaari juhuaquequiaari. Cuno juucaari quiquiaari socua Pueyaso timitiasaanu juuca. Jiyacaritij, Jesuuri nujuquaquiaari pueya niquiara. Jiyanolhua na rupaa paaretareeri. Naa sequereeri:

—¡Cante jiyamueyani, nojuaja cuaara niiria cucua, na ratunura janiyajiniji! ³⁸ Cucua na tiushacari, nera quiniutianiyari taa na naajiotasaaquiaari tariucuacaanu Pueyaso Rupaajinicaujani. Naa sequeyari:

“Cante cucua tiuyani, pueyano samiitianijiojua mohuacaari noojiajiniji jaatenutaniya”.

³⁹ Naa Jesu sequencesacaritij, nojuajaari Pueyaso Sohuanujiniji pohuatariquiaa miriqui. Jiyacaritij, Pueyaso Sohuanuuri juhuanojuaja maja na quiniu quiriquiaa mijiria, Jesu tacaaquishacariija Jiyaniijiajanaa na quiniuria. Naaratej, tii quiniaa pueya sequeriquiaari, cante quiarijia nocua tiuyani, nojoriiri Pueyaso Sohuanu masenutaniya na nuhuaji, nojuaja jaara na jiyarosee jiyocuacaanuji.

Pueyajuaatioosacari Jesuucua

⁴⁰ Jesu jaara pohuatanu puecaquiaari, tii quiniaa pueyari tama pocoojoriquiaajaaja. Noojaqueya nojorijinijinioori sequeree:

—¡Nio pueyanoqui seetanujuanaa Pueyaso sequenu panishano caminiujiunia, nooj, tarijia sequesaquiaari pocua niriquianotej!

41 Tamasacaari saniniujia naa se-queriquiaacujua:

—¡Nojuacuajaari Cristo, Pueyaso Jiyarosano pocua!

Tamasacaari saaja nojori riucuaree:

—¿Cristoteeri Galilea jiyajiniji supuenutaniya? ¡Maja! **42** Tariucuacaanu Pueyaso Rupaajinia naajiotasanojiniji, paari niishiyani, Cristoori pa supuetanaa jiyaniijia David niquiohuajiniji supuenutaniya. Belén tiacajinia rasaanutaniyari, supuetana David tiacajinia.

43 Naacuajitij, puetunu pueyajanaari Jesuucua juayonuutaquiaari. **44** Tamasacaari saniniujia Jesu quianu paniriquiaa juucua. Naajaa, majaari na quiatunu quirii.

Judiocuaca camarucua tiuyaquishacari Jesuu-cua

45 Pueyaso Secojuela tia cojuanaa pueyari Jesu tojitiariquiaa juhuajaniya. Na nuhuaji, socua quiojiyarohuari na jiyaramiquiniae pueyacua. Nojori jiyaramiquiniae pueyari quiquiaari Fariseocuaca, pueyacuara secojonaa camarucuanio. Nojori jiyaramiquiniae nojori sequeree:

—¿Casaara Jesu nia jaatucuyaquimiohuani?

46 Nojori jiyaramiquishano pueyari saaja nojori riucuaree:

—¡Majaari quenaaja tamonu pueyano pocuanu juhua cuno pueyanojua, seetanu rupaajanaa po-huataja cutara!

47 Fariseocuacaari cunora nojori juaarii:

—¿Niaateeri niaacua na shanacuree na saponjura niajaniyajuhuaj? ⁴⁸ ¿Tamonu pa camarucuajinijiniote nocua tiuurii, canaa Fariseocuacajinjiniojuhuaj? ¡Maja! ⁴⁹ ¡Cuno pojori Jesuucua tiuujiacani, nojoriiri Moisés Rootasano niishiyashijaca! ¡Nojoriiri sesoriquia seque!

⁵⁰ Nicodemoori narta Fariseocuacata tii quiriquiaa. Nojuajaari noo Nicodemo quiriquiaa Jesuucua niquiaari niucuatej. Nojuajaari narta Fariseocuaca sequeree:

⁵¹ —Pueyanaa, supuetana Moiséscuajaari pa rootaquiaari maja najuhuana pa sesacanura pueyano, paa jaara coteenu na nequesoreyaquirini casaa na miiriini.

⁵² Narta Fariseocuacaari Nicodemo juaarii saaja:

—¿Quiaateeri narta Galilea jiyajinijinio pueyanojuhuaj? ¡Jacaria quia pajere tariucuacaanu Pueyaso Rupaajinia! ¡Quiocua jiyacari niishiri majaari quenaaja niquiriyatu Pueyaso sequencesano caminiuijunia pueyano supuenu quiniutianiya Galilea jiyajinia!

⁵³ Na nuhuaji, puetunu cuno pojorijianaari na tiajinia quiojiyarohua.

8

Jesujiyanooshacari maaji

¹ Jesuuri saniniujuja Olivo cuhuariquiajinia quiaaree. ² Jesuuri tariquiicuaji tiuquiriohua Pueyaso Secojoua tiajinia. Canaari nata quiriquiaajuhuaj. Pueyari nocua rerejoquiaari.

Nojuajaari cajirii pueya na niishitiojonura juucua.

³ Moisés Rootasanojiniji niishitijonaa, mariyata Fariseocuacanio, cuno pojoriiri jiyacari maaji jaatucumaa Jesuucua. Cuno maajiiri riuriatasaaquiaari numuetucushiyano. Nojoriiri cuno maaji nujuateree pueya tacoji. ⁴ Jiyacari Jesu sequetureeri:

—Niishitijonanaa, nio maajiiri quiasaaree numuetucushiyano. ⁵ Moisés Rootasanojiniji paari niishiyani, jiyano maaji cuaara mosaaria saitia jacusano. ¿Quiajaniyarijiataj, taa quia sequeyanijia?

⁶ Judiocuaca camarucuaari naa Jesu nequesotaree najuhuanaj, nojori tojiniuria casaa na sequenutaniyani. Jesu jaara nojori sequere maja nojori miiniuria Moisés Rootasano, nojori maara nocuara saquiriojotare nojori jiyaniijianucua. Jesu cutaraari maja quenaaja nojori na riucuanu quirii. Nojuajaari saaja jojoree, jiyajinia na naajionura na juaashiquiata. ⁷ Pueyaracaanu nojori nequesoreesacari nojuaja, Jesuuri socua sanerohua. Nojori sequereeri:

—Teyano niajaniyajinijiniote sesa miyashijiani, nojuaja cuaara na coteetaara janu.

⁸ Jesuuri jojorohuacuhua socua na naajionura jiyacua. ⁹ Cuno pojori tojishacari naa Jesu sequesanotej, puetunujuanaari sanaa quiojorohua. Juhuacatecara quiononu coteequiaariiri socua saaquiapue, na nuhuaji, socua naatujoori nojorijiniji. Nojoriiri naa quiojoquiaariuhua puetunujuanaa. Saaja Jesuuri jateequee cuno maajitia. ¹⁰ Jiyacaritij, Jesuuri sanerohua. Maaji sequereeri:

—¿Teete quiocuara saquiriojotanaani? ¿Majate quenaaja tamonu cureenu quirii na jacunura quiajaniya saitia?

11 Maajiiri Jesu riucuaree:

—Shaaqui puetunujuanaa, Jiyaniijiana.

Jesuuri maaji sequeree:

—Janiyari quia jiyanoya cutarani. Juhuajaniya quia quiaarohua. Majaari sesa quia miiniu socua.

Jesuuri pueya jiuujia cuhuatana

12 Nojori nuhuaji, Jesuuri pueya niishitiojonu coteerohua. Nojori sequereeri:

—Janiyari pueya jiuujia cuhuatanani. Cante cucua tiuuriini, majaari tari ninishiqui quijia na quiniu quiniutianiya. Pueyaracaanu cuhuashiqui quijia quiniutianiya cutaraari.

13 Tii quinia Fariseocuacaari naa Jesu juaarii:

—¡Quiaacuajaari tama quia cuaqueyajiniji pohuataa! ¡Puetunu quia pohuatasanojuanaari maja tojishano!

14 Jesuuri nojori riucuaree:

—Tama cua cuaqueyajinijiaaja cua pohuatasacari, cunoori maja najuhuana pohuatasano. Cua pohuatasanoori seetanujuanaa cutara. Janiyacuajaari niishiyani teje cua niquiaarini, tee cua quianutaniuhuani. Niaari saniniuu{jia niishiyaquiyacujua teje cua niquiaarini, tee cua quianutaniuhuani.

15 Niaari pueyacuara saquiriojotaquiaa saaja nia niquishanojiniji, nia tojishanojinijiuuhuaj. Janiya cutaraari maja cua saquiriojotanu pueyacuara. **16** Janiya jaara juaari sesa miijia cutarani, cua sequesano cutaraari seetanujuanaa,

niquiriyatujua cua quiyaquishacari. Cua Jiyarona cua Quecuajaari cua cojiquiaa cuata na juaaniuria sesa miijiaca. ¹⁷ Niaacuajaari Moisés Rootasanojiniji niishitiojoquiaa: “Caapiqui pueyano pohuatasano jaara juhua tarajanu pohuatasano quirijiuuhuaj, cuno cutaraari seetanujuanaa”. ¹⁸ Naajuhuaj, canaari caapiquinini. Tama cua cuaqueyajaaja cua pohuatasacari, cunoori seetanujuanaa, cua Jiyarona cojishacari janiya. Nojuajaari cua Que.

¹⁹ Fariseocuacaari na nequesotaree:

—¿Teeteeri quia queni?

Jesuuri nojori riucuaree:

—Majaari nia niishiniu janiya, cua Quejuhuaj. Niaa jaara cua niishiriquia, niaa maara cua Que niishirijiuuhuaj.

²⁰ Jesuuri puetunu nio pohuatariquiaajanaa Pueyasora niquitiosano cumaneeca racataja shuriucuaji, Pueyaso Secojoua tiajinia. Naajaa, majaari pueya quianu quiriiquinioj, juhuanojuaja na monu juuca quiyaquishacarijia.

Jesuucua tiuyashijiacaari jiyanoyaquishaanutaniya

²¹ Jesuuri cuno Fariseocuaca sequero-huacuhuaj:

—Janiyari quianutaniyani. Niaari cua pajenuunutaniya juucua. Niaari cusionuunutaniya sesa miijiaca, jiyanoooshoo nia quishacarijia, cucha nia tiuyaquiniuucua. Naaratej, majaari nia naata quianu quiniutaniya tee cua quianutaniyacuaani.

22 Naa Jesu sequesacaritij, cuno narta Judiocuacaari tama sequetooreejaaja:

—¿Casaara na sequereecuaraarini: “Maja nia naata quianu quiniutianiya tee cua quianutaniyacuaani”? Tama na cuaqueyajaaja miaquenutaniya jiyoteeri.

23 Jesuuri nojori sequeree:

—Niaari ninishiqui quiquiojinijinio. Janiya cutaraari jiyocuacaanujinijioni. Niaari saaja mijiria quijiaca. Janiya cutaraari maja niiquijioni. **24** Janiyacuajaari cunora nia sequereeni, niaari jiyanooshoojua cusionuunutaniya nia cuarcashitiniuucua janiyari maja Pueyaso Niyanuni, taa cua sequequiaa niajaniyacuajani. Cunora niaari jiyanooshoo quiniutaniya, pueyaracaanu saniitiosano nia quiniuria.

25 Nojoriiri Jesu nequesotaree:

—¿Canteeri quiajaniyani?

Jesuuri nojori riucuaree:

—Janiyari najuhuana niaata pocoojiyani. Majaari nia tojiniu janija. Janiyacuajaari tari nia sequereeni cante janiyani. **26** Janiyari queraatia jititiaajaa cua sequencesocoriquiano niajaniyani. Niaajaara nocua tiuyaquiri, niaari pueyaracaanu saniitiosaanutaniya. Puetunu cua sequencesanojuanaa niajaniyani, cunoori seetanujuanaa. Cua pohuatasano mijiria, cunoori cua Jiyarona sequencesano janija. Na sequencesanoori seetanujuanaa cutara.

27 Majaari nojori niishiniu quiriquiaa Jesuuri na Que Pueyasojiniji pohuatariquiaa na sequencesacari “cua Jiyarona”. **28** Jesuuri cunora nojori sequeree:

—Niaa jaara cua teetere, niaari shusha jiyacari niishiniutianiya, janiyari Pueyaso Niyanuni. Niaari niishiniutianiyyajuhuaj, majaari tama cua niishiriojosanojuaaja cua miiniu quijia. Janiyari saaja cua Que niishitiosano pohuatajani. ²⁹ Cua Jiyaronacuajaari cuata quiya. Majaari cua Que cartenu janiya, pueyaracaanu cua miiniuucua na panishano.

³⁰ Naa Jesu pohuatasacari pueya niquiaratej, queraatia pueyari jiyacari nocua tiuuri.

Pueyaso pueyajiniji pohuatasano, Sesaaca pueyajinijinio

³¹ Jesuuri shusha nocua tiuuniaa narta Judiocuaca sequeree:

—Niaa jaara seetanujuanaa cua pohuatasano tojijiaca quiri pueyaracaanu, niaari cua pueya quiniutianiya. ³² Niaa jaara naa miiritij, niaari seetanu rupaajanaa niishijiaca quiniutianiya. Naacuajitij, niaari seetanujuanaa juhua cartesano pueya quiniutianiya, juhuajaniya quijiaca nia quiniuria.

³³ Narta Judiocuacaari Jesu riucuaree:

—Canaacuajruhua supuetana Abraham juhuacuajinio supueno pueyani. Majaari quenaaja canaa quiniu quijia tamasaca poonijotesano pueya. ¿Casaara naa quia sequeya canaarini, canaa quiniuria cartesano pueyani?

³⁴ Jesuuri nojori sequeree:

—Seetanujuanaa nia sequeyanijia, cante sesa miijiacani, nojoriiri juhua poonijotesano pueya quiya. Majaari na naata maninia mijiia na quiniu.

³⁵ Poonijotesano pueyanoori maja seetanuju-naa na quiniu juhua na camarnu niyanu. Maja na naata sequenu: "Janiya pueyaracaanu quiniutianiya cua camarnutani". Na camarnu jaara na paniyaquiri, na naata na jatanu na panishacari. Camarnu niyanu cutara, na queeri maja na jatanu quijia, neyanu na quiniuucua. ³⁶ Naajuhuaj, janiya jaara nia jaariuutiare nia poonijotena-jinijini, niaari seetanujuanaa cartesano pueya quiniutianiya, Pueyaso muerasura nia quiniuria cutara. ³⁷ Janiyacuajaari niishiyani, niaari see-tanujuanaa pa supuetana Abraham jiuhuacua-jinio supueno pueya. Naajaa, niaari cua tojiniu paniyaquia. Niaari cunora cua monu paniya. ³⁸ Janiyari nia pohuatariquiaa cua Quejiniji cua niquishanoni. Niaari saniniuujia nia que seque-sano miiquiaacujua.

³⁹ Nojoriiri Jesu sequeree:

—¡Abrahamcuajaari canaa shipininio!

Jesuuri nojori riucuaree saaja:

—Abraham jaara seetanujuanaa nia shipininio quiri, niaa mariqui maninia mijiaca quiricuara, taa Abraham quiquiaaricuaani. ⁴⁰ Saniniuujia, niaari cua monu paniya saaja cua pohuatantu-ucua seetanu rupaajanaa, cua tojishano Pueyasojiniji. Abrahamri maja naa na miiniu quijia cutara. ⁴¹ Niaari saaja sesa mijiaca taa nia que miiquiaacuaani.

Nojoriiri Jesu juaarii:

—¿Casaa quia sequeyani? ¡Canaari maja saa maaji rasanojuani! ¡Pueyasocuajaari canaa Que, maja tamonu!

⁴² Jesuuri nojori sequeree:

—Pueyaso jaara nia Que quiri seetanujuanaa, niaa mariqui cua paniricuara, Pueyasojiniji ninio cua quishacari. Majaari tamajaaja cua niniu quiquiaari. Cua Que Pueyasocuajaari cua jiyaroquiaari. ⁴³ Cua rupaa nia tojiniu paniyaquishacari, niaari cunora cua pohuatasano niishiyaque. ⁴⁴ Seetanujuanaa, nia quecuajaari Sesaaca, samaruhua jiyanijia. Niaari cunora miiniu paniquiaa na panishano. Nojuaja jaara shushajanaa coteequiaari sesa miiniuria, nojuajaari naajuhuanajaj, mona. Nojuajaari maja na niishiniu sequenu seetanujuanaa. Pueyaracaanu sapojojuaari. Na sapojosacari, naa miyari sapojojua na quiniuucua. Sapojonu niishiniuni, cunoori nojuajiniji supuequiaari. Niaari cuno nia que tojijiaca. Nocuaji niaari naa sapojonuujuacahuaj. ⁴⁵ Saniniuujia, cua pohuatasacari seetanu rupaajanaa niajaniya, majaari cucua nia tiuuniu quiquiaa. ⁴⁶ ¿Casaa cua miiquianu sesani? Cante na niishiyani cuaara sequeera. Saniniuujia, janiya jaara sesa miyashijia quirini, ¿casaara cucua nia tiuyaquiyacuaraarini, seetanu rupaajanaa cua pohuatasacari niajaniyani? ⁴⁷ Cante Pueyaso pueyani, nojoriiri Pueyaso rupaa tojiquiaa cutara. Niajaniya saniniuujia, niaari na rupaa tojinyaquiya, na muerasu nia quiyaquishacari.

*Jesucristoori tariucuacaanu quijajuhuanaja
Abrahamjiniji*

⁴⁸ Narta Judiocuacaari naa Jesu juaarii:

—¡Canaacuajaquiiri maninia sequeriquiaa quiajanijajiniji, quiaari Samaria jiyajinijinio tahue, samaruraca pueyanotuhuaj!

49 Jesuuri nojori riucuaree:

—Majaari janiya samaruracani. Janiya cutaraari saaja cua Que tojiquiaani. Niaari saniniuuja cua rerequetequiaacujua. **50** Naajaa, majaari cua tacaaniu naa nia sesacasacari janiya. Tamonu cutaraari quiya, nojuajaari paniya pueya tojiniuria janiya. Nojuajaari cua rerequetejaca saniitioriquiano. **51** Seetanujuanaa nia sequeyania, cante cua rupaa tojijiani, nojoriiri maja na shaajenu quiniutianiya.

52 Narta Judiocuacaari na sequeree:

—¡Quiarijia cutara canaari niishiyani quiaari seetanujuanaa samaruraca! Canaa supuetana Abrahamri cusoquiaari, mariyata puetunu Pueyaso sequenu panishano caminiujiuniaajanaanio. Quiaari saniniuuja quiarijia sequeyacujua: “Cante cua rupaa tojijiani, majaari na shaajenu quiniutianiya”.

53 ¿Quiaateeri jiyaniya quiaa socua cutara pueyano canaa supuetana Abrahamjiniji? ¡Maja! Nojuajaari shaajequiaari. Mariyata puetunu Pueyaso sequenceso caminiujiuniaa pueyajanaari shaajequiaarijiuhuaj. ¿Canteeri quiajaniyani naa quia sequenuratej?

54 Jesuuri nojori riucuaree:

—Janiya jaara tama cua cuaqueyajaaja jiyatenu paniri juhua jiyaniijiarani, cunoori na juhuana. Seetanujuanaa, cua Quecuajaari cua jiyatequiaari Jiyaniijiarajanaa. Nojuajaari nia sequenceso nia Pueyasota. **55** Niaari seetanujuanaa

na niishiyashijiaca. Janiya cutaraari cua Que Pueyaso niishiyani. Janiya jaara nia sequereni, maja cua niishiniu nojuaja, janiya maara sapojoua quirini taa nia quiyacuaani. Janiya cutaraari na niishiyani. Janiyari cunora na rupaa tojijiani. ⁵⁶ Nia supuetana Abrahamri timiquiaari na niishishacari janiya mijiria supuenutaniyani. Nojuaja jaara cua niquiquiaari mijiria quiyano tari, jiyanohua timiquiaariiri.

⁵⁷ Narta Judiocuacaari Jesu juaarii. Naa na sequetureeri:

—Jaj! Majaruhua juhuanojuaja cincuenta marijia shocojonu quiajaniya. ¿Taa quia sequeyarini quiaa canaa supuetana Abraham niquiquiaari?

⁵⁸ Jesuuri nojori riucuaree:

—Janiya nia sequeya seetanujuanaani, Abraham raaquishacarijia, janiyari tari quijiani.

⁵⁹ Naa nojori tojishacari Jesu sequencesanotej, narta Judiocuacaari sai pajenuuree Jesu na jacutajara juucua. Jesuuri nojoriicuaji jamaarii saaja. Pueyaso Secojojua tiajiniji tohuatamaari.

9

Jesu jeecasacari cariyojuaru namijia, naa rasanojuhuhanajaj

¹ Tamacari Jesu rucuanejosacari canaata, canaari cariyojuaru pueyano niquiriini, naa rasanojuhuhanajaj. ² Canaari cunora Jesu nequesotareeni:

—Niishitiojonanaa, ¿casaara naa cuno pueyano rasaaquiaari cariyojuaruni, na queya miiniuucua sesatee, tama sesa na miiniuucuajaaja soj?

³ Jesuuri canaa riucuaree:

—Maja. Maja cunora naa na rasaanu quiquiaari. Naa rasaaquiaarii Pueyaso cumaca niishishaanura, na namijia jaara jeecasaare niquijiara na quiniuria. ⁴ Juuca quishacarijia, pa tucuatare miiniu cua Jiyarona sequesano cua miiniuria. Paa quera niniyani. Jaara niniquii, majaari pa naata poonijionu quiniutianiya tari. ⁵ Mijiria cua quishacarijia, janiyari pueya jiuujia cuhuatanani.

Jesu sequencesacari: “Paa quera niniyani”, nojuajaari pa shaajenujiniji sequeriquiaa miriqui.

⁶ Naa Jesu sequenu nuhuajitij, nojuajaari jiyocua riocoree. Na riacauta coniquioreeri. Coriyacau mara ruporohua cariyojuaru namijiaacuaari.

⁷ Cariyojuaru sequeroahuari:

—Siloé cuarimia quia jeequesee quia namijia. Hebreo rupaajinia, Siloé cuariiri sequeya “Pueyaso Jiyarosano cuari”. Cariyojuaruuri cuarimia quiaaree. Tii na namijia jeequeserri. Tariucua niquijaari na tiajinia tiuquiriohua. ⁸ Cariyojuaru na quishacarijia, nojuajaari na miahajau na masetajara cumaneeca mashiniquijiojua quiquiaari. Puetunu pueyajanaari na niquitiujia naa na mashiniquijiosacari. Naacuajitij, nojuaja jaara niquijiara quiquiaari, tarijia na niquiniaapueyari, mariyata na shuriucua quiniaapueyanio, nojoriiri tama sequetooquiaariajiaaja:

—¿Cante cuno pueyanojaarani? ¿Majate noocuaja tarijia cumaneeca mashiniquijiojuate?

⁹ Noojiaqueya pueyari sequeree:

—¡Taaquiriirinij, nojuajacuaj!

Tamasacaari saniniuujia sequereecuja:

—Nojuajaquinio naasucua. Juhua nojuaja niquishiyacuaj, makaari seetanujuanaa nojuaja.

Tarrijia quijia cariyojuaruuri saa sequereejaa:

—Taaquiriirinij, janiyacuaaquiniatejaj.

10 Naaratej, pueyari na nequesotaree:

—¡Quiaacuaja cariyojuaru quijiaruhua! ¿Taa niquijara quia quiriohuarini?

11 Nojuajaari pueya riucuaree:

—Cuno, Jesu jiyانishano pueyanoni, nojuajaari mara coniquioree cucuara. Cua namijiaacua na ruporohuari. Na nuhuaji, cua jiyaroreeri Siloé cuarimia cua jeequenura cua namijia. Janiyari quiaareeni. Cua namijia cua jeequesacari, ijaniyari niquijara quiqiini!

12 Pueyari na nequesotaree:

—¿Teeteeri quia namijia jeecana pueyanoni?

Nojori riucuareeri:

—Johuaj. Maja cua niishiniu.

Fariseocuaca nequesoreesacari na namijia jeecasano pueyano

13 Pueyari Fariseocuacaacua jiyataaree Jesu jeecasano cariyojuaru pueyano. **14** Jesu jaara mara coniquioquiaari na jeecanura cuno pueyano namijia, cuno juucaari Judiocuaca samaatenu juuca quiquiaari. **15** Nocuaji Fariseocuacaari tarrijia cariyojuaru quijia nequesotaree taa niquijara na quiriini. Nojuajaari nojori riucuaree:

—Jesu cua namijiaacua rupojorucuua marani. Na nuhuaji, janiyari cua namijia jeequeseeni. Naacuajitij, janiyari quiarijia niquijia quiyani.

16 Noojaqueya cuno Fariseocuacajinjinioori saa sequereejaa:

—Cuno pueyano, nio pueyano namijia jeecarucuaani, nojuaja maja Pueyaso Jiyarosano. ¡Nojuajaari Moisés Rootasano tojiyashija, naa na miiniucua samaatenu juuca!

Tamasacaari saniniuuja sequeriquiaacujua:

—Jaara sesa miijia quiri, ¿maatucua casaara poonijiore Pueyaso cumaacatacuaraarini?

Naa nojori juayonuutanuucuatej, nojoriiri juhua raquitiirii. **17** Nocuaji tarijia quijia cariyojuaru nequesotaturohuariuhuaj:

—Niquijia quia quishacari quiarijia, ¿taa quia sequeya Jesuni? ¿Maninia miijiatee?

Nojuajaari saaja Fariseocuaca riucuaree:

—Janiyara, nojuajaari Pueyaso sequenceso caminiuijiunia.

18 Tii quiniaa Judiocuacaari na cuaracashitirii saaja. Nojoriiri jiyaniquiaari maja naasucua seetanujuanaa cariyojuaru cuno pueyano quiniu quijia. Nocuaji nojoriiri na queya sequeturee nojoriicua na niniuria. **19** Nojori tiuquishacari, cuno Judiocuacaari nojori nequesotaree:

—Canaa nia sequere, ¿nio pueyanote seetanujuanaa nia niyanu, nia sequenceso cariyojuaru rasanojuhuanani? ¿Taa quiarijia niquijiara na quiriohuarini?

20 Na queyari cuno pojori riucuaree:

—Taaquiriirinij, nojuacuaaquinateja canaa niyanujuaj. Naa cariyojuaru rasaaquiaariiri.

21 Majaari canaa niishiniu cutara taa na quiriohua niquijiari. Majaari canaa niishiniujiuhuaj, cante na namijia jeecarucuaani. Nojuaja

nia nequesotare, tari cumantumacacuaja. Nojuajanaa cuaara nia pohuataara cutara.

²² Na queyari naa riucuaquiaari narta Judiocuaca camarucuatej, na pueretusacari nojori. Judiocuaca camarucuaari tari sequetuquiaari: “Cante Jesu sequeyani nojuaja seetanujuanaa Pueyaso Jiyarosano, naa sequejaca pueya cuaara tenuusaaria maja Pueyaso secojojua tiajinia na tiuquiniuria socua”.
²³ Naaratej, na queyari naa narta Judiocuaca riucuaquiaari: “Nojuaja nia nequesotare, cumantumacacuaja”.

²⁴ Cunora cuno Judiocuacaari socua piiriohua na namijia jeecasano pueyano. Nojoriicua na nishacari, na sequetureeri:

—¡Paacuajaari Pueyaso niquiara niya quiyani! Naaratej, ¡seetanujuanaa canaa quia pohuatare cuno pueyanojinji! ¡Canaa cutaraari niishiyani cuno pueyanoori sesa mijiia!

²⁵ Na namijia jeecasano pueyanoori nojori riucuaree:

—Naajaa, jaara sesa mijiia quiri, jaara maninia mijiia quirijiuuhaj, maja cua niishiniu cuno. Janiya cutaraari niishiyani, ijaniyari tarijia niquiyashijia quiquiaarini! ¡Janiyari saniniuuja quiarijia niquijia quiya cutarani!

²⁶ Nojoriiri na nequesotarohuacuhuaj:

—¿Taa na miiriucuaa quijanijayaarani, niquijia quia quiniuriani?

²⁷ Narta Judiocuaca camarucua sequeree saa-jaari:

—Janiyacuaja tari nia pohuatareeni. Majaari nia tojiniu paniniu janiya. ¿Casaara nia paniya

socua cua pacutenura sequenu niajaniyani? ¿Ni-aate na pueyara quiniu paniya soj?

²⁸ Naa na sequencesacari nojoritij, cuno Judiocuaca camarucuaari na sesacaturee. Naa na seque-tureeri:

—¡Quiaari cuno pueyano tojijiacuaja! ¡Canaa cutaraari supuetana Moisés Rootasano tojitiajaca! ²⁹ ¡Canaa cutaraari niishiyani Pueyasojua-naari Moiséscua muetaquiaari na rootanura no-juaja! ¡Saniniujia cuno pueyanoorijiataj, makaari quenaaja pa niishiniu teje na supuequiaarini!

³⁰ Na namijia jeecasano pueyanoori nojori riucuaree:

—¡Niaaqiiri mosanucua seetanujuanaa! ¿Maja-teeri nia niishiniu teje na supuequiaarini? ¡No-juajaari cua namijia jeecarucuaa! ³¹ ¡Paacuajaari niishiyani Pueyaso maja na tojinu quijia sesa mi-ijiaca secojosano! ¡Saaja na timitajaca secojosano tojiya cutaraari, cante na panishano miiquiaacua-jani! ³² ¡Majaari quenaaja pa tojinu quijia tamonu pueyanojiniji, cante cariyojuaru namijia jeeca-jani, naa cariyojuaru rasanojuhuhanaj! ³³ Cuno pueyano jaara Pueyaso Jiyarosano quiyaquiri, ¿taa cua namijia na jeecarucuaacuaraarini?

³⁴ Cuno pojoriiri na juaaniutia na sequeturee:

—¡Quiaari sesa miijia rasaaquiaari! ¿Quiaateeri jiyanojuua canaa niishitiojonu paniyaruhua?

Naaratej, narta Judiocuaca camarucuaari na tenujuteree maja socua na tiuquiniuria Pueyaso secojojua tiajinia. Naacujitij, cuno pueyanoori juhua taanuusano pueyano quiquiaari narta Pueyaso timitajaca pueyajiniji.

Jesu tojitiaashijiaca pueya juhua cariyojuaru

35 Jesuuri niishiquiaari cuno pueyanoori tenujusaarucuaa. Jaara na riuriataquiaari, Jesuuri na sequeree:

—¿Quiaate Pueyaso Niyanuucua tiuujia?

36 Jesu sequereeri:

—Jiyaniijianaa, cua sequere canteeri nojuajani, nojuaja cua niishiniuria nocua cua tiuuniuria.

37 Jesuuri na sequeree:

—Quiaacuaja na niquiyaruhua. Nojuajaari cunocuaja, quiata pocoojiyani.

38 Jiyacaritij, pueyanoori Jesu cariquimiaji mojoquetaree. Na sequereeri:

—¡Quiocua tiuyanijia, cua Jiyaniijianaa!

39 Na nuhuaji, Jesuuri cuniqui quiniaa pueya niquiara sequeree:

—Janiyari mijiria niquiaarini juhua cua raquiriojotanura mijiria quiniaa. Naacuajitij, cante niishiyani nojuaja juhua cariyojuaru quiya, nojuajaari juhua namijiaraca quiniutianiya cucua na tiuushacari. Saniniuujia, cante jiyaniyani nojuaja niquijia cutara, nojuajaari juhua cariyojuarura tari jiyatesaaree, cucua na tiuyaquiniuucua.

40 Tii quiniaa Fariseocuaca jaara tojiquiaari naa Jesu sequesanotej, nojoriiri Jesu sequeree:

—Naa quia sequencescaritij, ¿quiaateeri sequeya canaari cariyojuarujurijuhuaj?

41 Jesuuri nojori riucuaree:

—Niaa jaara tama nia cuaqueyajaaja jiyatere juhua cariyojuarura cucua nia tiuuniuria, Pueyaso maara nia jiyanoori. Quiarijiani, tama nia sequenuucuajaaja, “Canaa niquijia

cutarani”, niaari jiyanoo shoojua nioojia nia tacatoya quiniuucua.

10

Jesu pohuatasano miriqui borrego cojuanajiniji

¹ Jesuuri socua pohuatarohua pueya niquiara. Naa sequereeri:

—Seetanujuanaa nia sequeyanijia, cante borrego mataca tohuateyaco tiuquiyajijiani, nojuaja jaara tamocoji tiuquimia, cunoori nohuasejojua. ² Saniniuu jia, cante tohuateyaco tiuquijia cutarani, cunoori borregohua camarujuanaa cutara. ³ Tohuateya cojuanaari tiotiu riataquiaa nocuaji. Borregohua camaruuri puetunu na seya sesacajanaa jiyaniquija. Na borregohuari na rupaa niishijia. Na camaruuri naa na tohuatani jiojua puetunu juanaa na matacajiniji. ⁴ Puetunu na borregohuajanaa jaara tohuareetama, na camaruuri na puetaja. Na seyari na nuhuaji sacuaja, na camaru rupaa nojori niishishacari. ⁵ Saniniuu jia, borregohuari maja na nuhuajiniu quijia na niishiyaquishoo pueyano. Saaja nocuaji cocuatejaari na niishishacari cunoori maja na camaru rupaa.

⁶ Jesuuri naa pohuataquiaari miriqui nojori niquiara. Nojoriiri saaja niishiyaquiquiaari casaa na niishitiojonu paniriquiaa nojorini.

Jesucristo, maninia pa cojuana

⁷ Nocuaji Jesuuri naa nojori sequerohua maatia:

—Seetanujuanaa nia sequeyanijia, janiyari juhua tohuateyani, cua borregohua tiuquitianura cua Que Pueyasoocua. ⁸ Cante cua niyacarijia

nijioquiaari coteenuni, nojoriiri sesa miijiaca quiquiaari, nohuasenuujuaca. Cua borregohuari namitia nojori numueejushiquiaari. ⁹ Janiyari juhua tohuateyani. Cante janiyajiniji tiuquiya cua Queecuani, nojuajaari Pueyaso pueyanora jiyatesaanutaniya cutara. Cuno pueyanoori maninia cojuasano juhua borrego. Janiyari na tiuquininiutaniyani, tii na quiniuria maninia cojuasano. Janiyari juuca na tohuatenutaniyani, jiyasocua cua miaquetenura carijiniacuma.

¹⁰ 'Nohuasejojaari saaja tiuquijia borregohuacua na nohuasenura, na puecoonorajuhua. Naa na shaajaaja puetunujuanaari. Janiyari saniniujia niquiaarini cua borregohua cua jiyatenura pueyaracaanu quijiacara, seetanujuanaa jiyanohua shuquiriaatia quijiacaca nojori quiniuria. ¹¹ Janiyari maninia cojuanani, maja tamonu. Pueyano jaara maninia na seya cojuana maniniu quiri, tama na cuaqueyajaaja panitija na seyacuaari. ¹² Saniniujia, borregohua camarujuanaa jaara tamonu cojuateya na seya, cuno pueyano jaara niquiri sare nocua canuijiano, nojuajaari na puerenuta neteja. Borregohua tiujiacheeri. Naa mijiari cuno borregohua quiyaquiniiucua na seyajanaa. Naacuajitiij, sareeri borregohua soojua. Naa na cocuatajaari. ¹³ Cuno borregohua cojuanaari naa neteja sareecuaji na tacayaquishacari seetanujuanaa cuno borregohuacua. Nojuajaari saaja paniya na poonijiosano sami na niquitiosaanura.

¹⁴ 'Janiya cutaraari maninia cojuaja borregohuani, na camarujuanaa cua quishacari. Janiyari

puetunu cua seyajanaa niishijiani. ¹⁵ Nojoriiri cua niishiyajuhuaj, taa cua Que niishiya janiyacuaani, mariyata taa cua niishiya cua Quejanihuaj. Janiyari tama cua cuaqueyajaaja panitiaja cua borregohuacuarani. ¹⁶ Janiyari socua borregohua jiitiaani. Nojoriiri maja nio cua borregohua maanujinjinio. Janiyari nojori ríjionutaniya niyarajuhuaj. Nojoriiri cua tojitiariquiano. Naacuajitij, puetunu cua borregohuajanaari jatiqui quiriquiano, niquiriyatu cojuanaracajuhuaj.

¹⁷ Cua Queeri cua paniya naa cua panitiasacari tama cua cuaqueyajaaja cuno borregohuacuara. Janiyari tama cua panishacariciaaja mosaanutaniyani, na nuhuaji cua samiitianuhuara, pueyaracaanu quijia cua quiniuhuara. ¹⁸ Majaari quenaaja tamonu naata monu janiya cua paniyaquishacari. Janiyari cua panishacari cusonutaniya cua borregohuacuarani. Janiyari cumaacaracani nojoriicuara cua cusonura. Janiyari cumaacaracajuhuaj cua samiitianuhuara. Cua Quecuajaari naa cua miiniuria cua jiyaroquiaari mijiria.

¹⁹ Narta Judiocuaca jaara tojiquiaari naa Jesu sequesanotej, nojoriiri socua tama juayonuutaquiaariaaja Jesuucua. ²⁰ Queraatia pueyari jiyacari sequeree:

—¡Cuno pueyanoori samaruraca! ¡Maja na tojiniu, pueyanaa! ¡Najuhuana pocuaano!

²¹ Tamasacaari saniniuuja sequeriquiaacujua:
—¿Samaruraca pueyanoteeri maninia casaa pohuatajajaara juhua nio pueyanojua? ¡Maja!

¿Pueyanoteeri na naata samaru cumaacata jeecanu cariyojuaru namijiaara? ¡Maja na naata!

*Judiocuaca camarucua niquiniu
paniyaquishacari Jesu*

²² Tamacari, Jerusalén tiacajiniaari querancausaariquiaa. Cunoori quiriquiaa pueya niishirijojonura nojori juhua cuno juucajinia Pueyaso Secojojua tia jiyatequiaariuhua seetanujuanaa juhua Pueyaso quiquirora na quinihuara. Jiyacariiri shuniya quiriquiaa. ²³ Jesuuri tii quiriquiaajuhuaj. Pueyaso Secojojua tiajinia quiriquiaari. Nojuajaari pueya jiyaniquishano tariucuacaanu jiyaniijia Salomón canujuucojojuajinia riujiuniuquiojoriquiaa. ²⁴ Jiyacaritij, canaa Judiocuaca camarucuaari tii na cosesee. Naa na nequesotatureeri:

—¿Taacari canaa quia sequenutaniya socuaari cante quiajaniyani? ¡Quiaa jaara seetanujuanaa Pueyaso Jiyarosano quiri, quiarijia canaa quia sequere!

²⁵ Jesuuri nojori riucuaree:

—Janiyacuaja tari nia sequecanuni. Niaari saaja na cuaracashitiquianu. Niaa cuaara niishiuria cante janiyani, nia niquishacari cua miishano cua Que sequesano janiya. ²⁶ Niaari saaja cucua tiuyaquiquiaa cua borregohua maanujinijino nia quiyaquishacari. ²⁷ Cua borregohuari cua rupaa tojijia cutara. Janiyari nojori niishiyajaaniuhuaj. Nojoriiri cunora cua nuhuajiquiaa. ²⁸ Janiyari pueyaracaanu quihiara nojori

jiyatequiaani. Majaari nojori juurequenu quiniutianiya. Majaari quenaaja tamonu naata jaariuutianu quiniutianiya nojori janiyajiniji. ²⁹ Cua Queeri cua borregohua cua niquitioquiaari. Nojuajaari socua jiyanohua cumaacaraca tamasaca cumaacaraca quiijacajiniji. Naacuajitij, maja quenaaja tamonu naata cua borregohua jaariuutianu cua Quejiniji. ³⁰ Janiya cua Queta, canaari juhua niquiriyatuni.

³¹ Jiyacaritij, canaa Judiocuaca camarucuaari sai rijorohuacuhuaj, Jesu na jacutajara juucua. ³² Jesuuri saaja nojori sequeree:

—Janiyari queraatia maninia casaa miiquianu saaja cua Que cumaacata nia niquiarani. ¿Teyanoocua nia jacunu paniya janiyani?

³³ Nojoriiri Jesu riucuaree:
—Majaari canaa jacunu quiniutianiya quiajaniya maninia quia miiniuucua. ¡Canaari quia jacunutaniyani sacuaraatia quia pocuanuucua Pueyaso niquiara! ¡Quiaari tama quia cuaqueyajaaja jiyateya juhua Pueyasora! ¡Cunoori jiyanohua sesa! ¡Quiaacuajaari pueyano, juhua canaaajuaj!

³⁴ Jesuuri nojori sequeree:
—Niaacuajaari tariucuacaanu naajiosano Pueyaso Rupaa jiitiaa. Pueyaso sequesanoori naa naajiotasano quiya tii:

“Janiyacuajaari nia sequequiaarin, niaari pueyasoohua”.

³⁵ ’Paacuajaari niishiyani, Pueyaso Rupajinia naajiotasanoori maja na naata cuaracashitishaanu. Pueyasojuanaari pueya jiyaniquiquiaari “pueyasohuata”, noo

pojori, teyano nojuaja jiyatequiaari Israel pueya jiitianaaracuajani. ³⁶ Naajuhuaj, Pueyasocuajaari cua saquiriojoquiaari mijiria na jiyarosocoriquiano. Naa Pueyasojuanaa Jiyarosano cua quishacaritij, ¿niaatucua casaara sequereni janiya Pueyaso niquiara pocuaree sesani, cua sequencesacarijaniya Pueyaso Niyanuni? ³⁷ Janiya jaara cua Que panishano miyaquiri na cumaacatani, janiya maara nia juayaquirini cucua nia tiuyaquiniuucua. ³⁸ Niaacuajaari cua Que cumaacata cua miishano niquiquiaa. Niaa jaara cua pohuatasanoocua tiuuniu paniyaquiri, naajaa, cua Que cumaacata cua miishanoocua nia tiuuri quenaaja. Niaa jaara niishiri puetunu cua miishanojuanaari cua Que Pueyaso cumaacata miishano, niaa maara niishiri Pueyasoori coojia rupueja, janiyari noojia rupueyajaaniuhuaj.

³⁹ Jiyacaritij, nojoriiri socua Jesu quiatunu paniriohuacuhuaj. Jesuuri saaja nojoriicuaji mashiquii.

⁴⁰ Jesuuri canaa jiyataarohua Jordán moo taquijiria tee Juan tiuquinijioquiaari tarijia pueyacuajani. Canaari tii quishiini. ⁴¹ Queraatia pueyari Jesuucua nijioquiaari tee canaa quiriquiaacuajani. Nojoriiri tama sequequiaariajiaaja Jesujiniji:

—Tiuquinijiona Juanri maja quenaaja na miniu quijia casaa Pueyaso cumaacata. Naa jaa, puetunu nio pueyanojiniji na sequencesanojuanaquijiri seetanujuanaa quijia.

⁴² Naacuajitij, queraatia pueyari Jesuucua tiuquiaari tii, tee canaa quiriquiaacuajani.

11

Lázaro shaajenujiniji pohuatasano

¹ Jiyacaritij, tamonu pueyanoori cusosu matariquiaa. Na sesa quiquiaari Lázaro. Nojuajaari Betania tiacajinijiniojuanaa quiquiaari, Judea jiyajinia. Na rimiatushua quiquiaari María, Martanio. Nojoriiri cuno Betania tiacajinijinio quiquiaarijuhuaj. ² Lázaro rimiatushua Mariáni, nojuajaari noo maajicuaja Jesu niohuaca sacuanijiaquiaari na muecacatatej, nocua na totanu nuhuaji na shanohua jaanutaja. ³ Lázaro matasacari cusosu, na rimiatushuari pueyano jiyarotuquiaari Jesu numootenuucua. Naaratej, cuno pueyano tiuquishacari Jesuucua, nojuajaari naa caminiujuquiaari Lázaro rimiatushua sequesano nojuaja:

—Jiyanijianaa, quia panishano pueyanona cusosu mataa.

⁴ Jesu tojishacari naa cuno pueyano sequesantej, tii quinia pueya sequereeri, canaa juhuaj:

—Nojuajaari maja na cusionu quiniutaniya na shaajenura puetunujuanaa. Cuno cusionu na jiitiasanojinijini, pueyari Pueyaso cumaacata miishano niquinutaniya. Pueyari cunora Pueyaso Niyanu maniniuhuaqueetanutaniya, cua Que Pueyasojuhuaj.

⁵ Marta, María, Lázaronio, nojoriiri Jesu panishano pueya quijia. ⁶ Naajaa, Jesu jaara numoote-saaquiaari Lázarojiniji, majaari nocua na quianu quiquiaari ritia. Caapiqui juuca camueeree cuniquijaaraari, tee canaa quiriquiaacuajani. ⁷ Na nuhuaji, canaa na saquiriojosano pueya sequereeri:

—Judea jiyajinia pa quiaarohuacuara socua.

⁸ Canaari Jesu sequereeni:

—Niishitiojonanaa, cuniquijinio Judiocuacacuajaari shusha naataja tii quia jacunu paniquianu. ¿Casaara socua tii quia quianu paniuhuariniuhuaj?

⁹ Jesuuri canaa riucuaree miriqui:

—Janiyara, juuca juhuanojuaja. Juucaari maninia seetanujuanaa pa rucuanejonura. Paa jaara pananu tiuquiaquishacarijia rucuanejoreni, paari maninia niquiya pocuajini. Majaari pa tiuriiniu. ¹⁰ Paa jaara ninishiqui rucuanejore saniniunjia, paari tiurijiani cuhuashiqui na quiyaquishacari.

Jesuuri naa queriquiaa miriquitij, nera, maja puereeta na quiniu quiriquiaa Judiocuaca niquiara na rucuanejonura, na mosaanu juuca quiyaquishacarijia. ¹¹ Na nuhuaji, Jesuuri naa canaa sequeree socua:

—Pa rupuena Lázaroori tari maquequee. Janiyari na niucuajanuucua quianutaniyani.

¹² Canaari Jesu sequereeni:

—Jiyaniijianaa, nojuaja jaara maqueya, maniniacuajaqui. Naacuajiti paari niishiyani naatanutaniuhuacuajaaqui. ¿Paatucua casaara najuhuana nocua quiaareni?

¹³ Naa Jesu pohuatasacari canaa Lázarojinijitij, canaa queriquiaa juucuari Lázaro tari macu quiriquiaa. Canaari saniniujia jiyanciriquiaani Jesu naasucuaari canaa pohuatariquiaa Lázaro nareja maqueriquiaa. ¹⁴ Nocuaji Jesuuri maatia canaa sequeree:

—Lázaro tari cusoyarucuaa. ¹⁵ Janiyari timiyani tii cua quiyaquiniuucua Lázaro quishacarijia saminio. Naa quiarijia macu na quishacaritij, niaari socua jiyajeneta casaa cua miishano niquinutianiya, seetanujuanaa cucua nia tiuuniuria cutara. Quiarijia cutara, nocua pa quiaare.

¹⁶ Jiyacaritij, Tomásri canaa narta saquiriosano pueya sequeree:

—Pa Jiyaniijiata pa quiaarejuhuaj, nata pa cojiritiasaanura puecoonu.

Cuno Tomásri pueya sesojosano quiquiaari “Caapueya muetusano”.

Jesu, macunucua samiitianijojua

¹⁷ Canaa jaara tiuquijioseequiaarini, Jesuuri pohuatasaaquiaari Lázaro tari cuatro juuca shocotejoriquiaa raaco na niasaanujiniji.

¹⁸ Betania tiacaari catecaja Jerusalén tiacajiniji. (Nareja media hora paa jaara ritia rucuaneyaren). ¹⁹ Naaratej, queraatia narta Judiocuacaari quiojoquiaari Marta, María tiajinia, nojori na cumanijianura na nanu nuhuaji. ²⁰ Marta jaara niishiquiaari Jesu shusha tiuquiriquiaa, nojuajaari nocua tohuataquiaari canaa na naacunura. Majaari María niniu quiriquiaa cutara. Tiajiniaja quiriiri. ²¹ Canaacua Marta tiuquishacari, nojuajaari Jesu sequesee:

—Jiyaniijianaa, ¡quia jaara niya quiqianu, cua nanu maara shaajeyaquiaquianu! ²² Naajaa, janiyari niishiyani quia jaara Pueyaso secojore, Pueyasoori quia secojosano tojiniutianiya.

²³ Jesuuri Marta sequeree:

—Quia nanucuaja samiitianutaniuhua.

²⁴ Martaari na riucuaree:

—Taaquiriirinij, janiyacuaja niishiyani nojuajaari samiitianutaniuhua macunucua samiitiacosacariuhua jiya puequesacari.

²⁵ Jesuuri na sequeree:

—Janiyacuajaari macunucua samiitianijojuani. Cante cucua tiuujiani, jaara cusoyare, naajaa, samiitianutaniuhuari. ²⁶ Cante cucua tiuurii saminio na quishacarijiani, nojuaja jaara cusoyare, naajaa, majaari na shaajenu quiniutianiya seetanujuanaa. ¿Quiaate cua sequesanoocua tiuya Martanaa?

²⁷ Nojuajaari Jesu riucuaree:

—Jaa, Jiyaniijianaa. Janiyacuaja niishiyani quiaari Cristo, Pueyaso Niyanu, nooj tariucuacaanu sequesaquiaari mijiria niriquianotej.

²⁸ Naa Marta riucuanu nuhuaji Jesutej, na tiajinia quiaarohuari. Naa María numaama sasacahuari:

—Niishitiojona jati quiya. Quia sequeyano nocua quia quianura.

²⁹ Naa María tojishacari Marta sequesanotej, ritia sanequeeri. Jesuucua nimiaari tee canaa quiriquiaacuajani. ³⁰ Jesuuri juhuanojuaja majana tiuquitianu quiquiaari canaa cuno tiacajinia. Canaari tiaca shuriucua quiriquiaajaani tee Marta naacuquiaari canaacuajani, Jesuucua na nishacari. ³¹ Nojori cumanijianaa pueya jaara María niquiquiaari ritia tohuataano tiajiniji, nojoriiri na jiyaniquiaari na nanu raajinia nujuquenuuucua quiaa naasucua. Naaratej, nojoriiri na nuhuaji quiaaree.

³² María tiuquishacari canaacua, Jesu cariquimiaji mojoquetaseeri. Naa na sequereeri:
—Quiaa jaara niya quiquianu, cua nanu maara shaajeyaquiquianu.

³³ Jesu niquishacari María nujuqueyano, mariyata nata quiniaa nujuqueyanojuhuaj, Jesuuri nojori taraajetaree. ³⁴ Jesuuri pueya nequesotaree:
—¿Tee na nasaarucuaani?

Pueyari Jesu sequeree:
—Miji, Jiyaniijianaa. Quia niquiquii. Niya nasaarucuaano.

³⁵ Jesuuri nujuquesee. ³⁶ Tii quiniaa Judiocuaca niquishacari Jesu nujuqueyano, tama sequetooreejaarija:

—¡Nia niquiri! Jiyanoohua Lázaro panijiaquiiri.
³⁷ Noojiaqueya cuno pojorijinijinioori sequeriquiaajuhuaj:

—Jesu jaara cariyojuaru namijia jeecacanucuaa, maara Lázaro naataniquianujuhuaj maja na shaajenura.

Jesu samiitianishacari Lázaro

³⁸ Jesuuri jiyanoohua na taraajenuta raa jiyajiria catecanoquiaari, canaaajuahuaj. Raari puereetuca saajiata mishiquiosano quiriquiaa. ³⁹ Jesuuri pueya sequeree:

—¡Saajia nia ruutiniri tamocora!
Martaari Jesu sequeree:
—¡Jiyaniijianaa, cuatro juuca tari na shoconujiya!
¡Tari mocuaatia jaaniuya naasucua!

⁴⁰ Jesuuri Marta sequeree:
—Janiyacuaja tari quia sequereeni, quiaa jaara cua sequencesanoocua tiuuri, quiaari Pueyaso cumaacata cua miishano niquiniutianiya.

⁴¹ Jiyacaritij, pueyari saajia ruutinirii tamocora. Jesuuri jiyocuacaanu mauree. Naa Pueyaso sequereeri:

—Cua Quenaa, quia timitiaanijia. Quiaari tari cua sequencesano tojiriucuaacuaja. ⁴² Janiyari niishiyani quiaari pueyaracaanu cua tojiquiaa. Janiyari naa quia sequereeni, niya quiniaa pueya niishiniuria quiaari mijiria cua jiyaroquiaari.

⁴³ Naa Jesu sequenu nuhuajitij, jiyanolhua na rupaa paaretareeri. Naa sequereeri:

—¡Lázaronaa, quia tohuatama!

⁴⁴ Macuuri tariucua saminio tohuatamaa. Na juashiquiaca, na niohuacaari jiuniocosano quiriquiaajaa. Na nacaari puetunu na jiquiocotajanaa mishquiosano quiriquiaajuhuaj, toquerauta morosano. Jesuuri pueya sequeree:

—Nia saacatare, cuaara rucuaneera.

Judiocuaca camarucua roojotoosacari na monura Jesu

(Mt 26.1-5; Mr 14.1-2; Lc 22.1-2)

⁴⁵ Naa Jesu samiitianishacari Lázarotej, queraatia narta Judiocuacaari nocua tiuuquiaari, noo pojori canapuete Maríacula nijioquiaari na cumanijianuracuajani. ⁴⁶ Noojiaqueya cuno Judiocuacajinijinioori Fariseocuacaacua quiojoquiaari nojori pohuatanura Jesu miishano.

⁴⁷ Naaratej, Fariseocuaca, pueyacuara secojonaa jiyaniijianucuanio, nojoriiri rerejoquiaari puetunu Judiocuaca camarucuatajanaa. Nojoriiri sequetuquiaari:

—¿Taa pa miiniutianiyani? Cuno pueyanoori queraatia casaa miiquiaa na cumaacata pueya

niquiara. ⁴⁸ Paa jaara nareja na shanacure naa na miiniuriatej, ¡puetunu pueyajanaari na pueyara quiniutianiya, nocua nojori tiuushacari! Nojoriiri na jiyaniijiara socua na jiyatenutaniya. Naaratej, pa jiitiana Romano pueyari pocua nijionutaniya Pueyaso Secojojua tia nojori niyartanura, pa pueya na puecoonurajuhuaj.

⁴⁹ Caifásri tii quiriquiaajuhuaj. Nojuajaari canaa pueyacuara secojonaa jiyaniijiajanaa quiriquiaa cuno marijiara. Jiyacaritij, nojuajaari narta camarucua sequeree:

—¡Niaaquiiri niishiyashijiaca seetanujuanaa!
⁵⁰ ¿Majateeri nia niishiniu? Maninia cutaraari niquiriyatu pueyano cusionura pa niti, maja najuhuana puetunu pa pueyajanaa puecoosaanura.

⁵¹ Caifás sequencesanoori maja tama na sequencesanojuaja quiquiaari. Pueyacuara secojonaa jiyaniijiajanaa na quishacari, Pueyasoori naa na pohuateree taa Jesu cusionutaniya puetunu Judiocuacaacuarajanaani. ⁵² Seetanujuanaari. Jesuuri maja cusoriquiano quiquiaari saaja Judiocuacaacuara. Nojuajaari cusoriquiano quiquiaari puetunu tariucua Pueyaso saquiriojosano pueyapueecuarajanaajuhuaj, tee tiquiyocua niyaquejonus na muerasurano quiyacuajani. Nojuajaari cusoriquiano puetunu cuno pojorijianaa na rerejotenura, jatiqui na quitiuniuria juhua niquiriyatu maanu. ⁵³ Naacuajitij, cuno juucajiniji, cuno Judiocuaca camarucuaari roojotooriquiaa taa nojori monutaniya Jesuni.

⁵⁴ Nocuaji, Jesuuri maja tari na rucuanejonu quijia narta Judiocuaca niquiara. Cunora

tamaquiria canaa jiyataquiaariiri. Canaari nata quishii cariiquia jiya shuriucua tamonu tiacajiniani. Cuno tiaca sesa quiquiaari Efraín.

⁵⁵ Jaara quera quiquiaari tari canaa queranacusacari Pascua juucara, queraatia pueyari quiojoriquiaa Jerusalén tiacajiniara tama na tiacajinijijaaja. Nojoriiri quiojoriquiaari juhuacaricia nojori jeenucuanura na cuaqueya nojori puecoosacari tama na seyajaaja nojoriicuara. Nojoriiri naa miiquiaari jiyanooshano nojori quiniuria Pueyaso niquiara, taa supuetana Moisés rootaquiaaricuajani. Nojoriiri naa miiquiaari juhuajaniya nojori queranacunura Pueyaso niquiara Pascua juuca.

⁵⁶ Pueyari tii Jesu pajenuuriquiaa. Pueyaso Secojojua tiajinia nojori quishacari, nojoriiri tama nequesoreetooriquiaajaaja:

—¿Taa nia sequeyani? ¿Pa queranacunujinia niniutianiyatenojotij, maja soj?

⁵⁷ Pueyacuara secojonaa jiyajijianucua, Fariseocuacanio, nojoriiri tari pueya rootaquiaari, tamonu pueyano jaara niishiri tee Jesu quiyaní, cuaara nojori numooteera nojori quiatenura Jesu.

12

María totasacari na shanohua jaanutaja Jesuu-cua

(Mt 26.6-13; Mr 14.3-9)

¹ Seis juuca jaara cureeriquiaajaa Pascua juucara, canaari jiyacari Jesuta Betania tiacajinia quiaareeni, Lázaro quijia tiacajinia, teyano Jesu samiitianiquiaaricuajani. ² Cuno tiacajinijinio

Jesu rupuenaa pueya timitiasacari Jesu, nojoriiri sumatunuquiaari nojori miaquenuunura cuno niucua Jesuta. Martaari miaquesano patootariquiaa pueyara. Lázaroori Jesuta miaquenuuriquiaa narta masuusano pueyata, canaatanio. ³ Jiyacaritij, Maríari Jesuucuara pataree na shanohua jaanutaja. Cunoori “nardo” jiyanishano nataujiniji shipinishano quiquiaari. Jiyanohua queraatia cumaneecata masesano. Puereetuca motiquio cajiniocua puecariquiaari cuno shanohua jaanutaja. Maríari Jesu niohuacaacua na totaree. Na nuhuaji, na sacuanijiarohua na muecacataari. Puetunu tiacojuanaari shanohua jaanuriquiaa. ⁴ Naa María miishacaritij, niquiriyatu canaaajinijinio Jesu saquiriojosano pueyanoori juaarii. Nojuajaari Judas Iscariote quiriquiaa, na nuhuaji Jesu quiatequiaari na paraani. Nojuajaari naa sequeree:

⁵ —¿Casaara cuno shanohua jaanutaja niquitioy-aquishaaree queraatia cumaneecarani, casamijiuniucua pueya niquitiosocoriquianoni? ¡Jaara masenu panishaare, maara niquitiosaare juhua niquiriyatu marijiara pueyano poonijionu sami!

⁶ Naa Judas sequencesacaritij, majaari seetanujuanaa na taraajenu quiriquiaa casamijiuniucua pueyacua. Naa sequereeri saaja cumaneecaacua jiaatiaja na quiniuucua, nohuasejojua na quishacari. Judasri cumaneeca quiquiero cojuatana quijia puetunu canaarajanaa. Naacuajitij, nojuajaari tiji nohuasejojua, pueya niquitiosanojiniji canaara. ⁷ Jesuuri saaja Judas sequeree:

—Nareja quia niquiri. Nojuajaari nio shanohua jaanutaja cojuataja pueyaracaanu, juhuacarijia na jeenucuatajara cua cuaqueya, pueya niaaquishacarijia janiya raajinia, janiya jaara mosaareni. ⁸ Casamijiuniucua pueyari pueyaracaanu niaata quiriquiano cutara. Saniniujia, janiyari maj a pueyaracaanu niaata quiriquianoni.

Pueyacuara secojonaa jiyanijianucua roojotoosacari Lázaroocuara

⁹ Queraatia canaa Judiocuacaari niishiquiaari Jesu Betania tiacajinia quiriquiaa. Cunora, nojoriiri nocua quojoquiaari na niquinuucua, Lázaro niquinuucuajuhuaj, teyano Jesu samitianiquiaaricuajani. ¹⁰⁻¹¹ Jesu samitianiniucua Lázaro, queraatia canaa Judiocuacaari Jesuucua tiuquiaari, na pueya nojori quiniuria. Cunora, canaa pueyacuara secojonaa jiyanijianucuaari roojotooquiaari Lázaro na motunurajuhuaj.

Juhua Jiyanijajanaa Jesu tiuquishacari Jerusalén tiacajinia

(Mt 21.1-11; Mr 11.1-11; Lc 19.28-40)

¹² Cuno queraatia pueya, tari Jerusalén tiacajinia quiriquiaacuaa Pascua juucara queranacunurani, nojoriiri niishiquiaari Jesu tariqui tiuquiniutiani yahuaj. ¹³ Nocuaji, nojoriiri tucuru piyotaree. Na nuhuaji, nijiyareeri Jesu naacunuucua, na tucuru shiinotanuriquiaari. Naa nacooriquiaajaariuhua nojori shuquiritiasacari Jesu:

—¡Pocuaji Tacuna! ¡Pocuaji Tacuna!
¡Cuaara shuquiriaatia quiiria pa Jiyaniijia,

teyano Pueyaso jiyaroquiaari pocuacuajani! ¡Nojuacuajaari Israel pueya Jiyaniijiajanaa!

¹⁴ Jesuquiiri jiyacari burro niquiojua riuriata-maa. Tari na nijinia cajiriquiaari, taa tariucuacaanu Pueyaso Rupaajinia naajiotasano quiyacuajani. ¹⁵ Naa sequeyari:

“¡Sión tuhuananuucua quiniae pueyanaa, maja puerenu! ¡Nia niquiri! ¡Nia Jiyaniijia cumaji niya niaacua! ¡Burro niquiojua nijinia cajiyari!”

¹⁶ Jiyacaritij, majaari canaa niishiniu quiriquiaa naa canaa tiuquitishacari canaa Jiyaniijia Jesutej, canaari nio tariucuacaanu Pueyaso Rupaajinia naajiotasano tohuateeriquiaani. Pueyaso jaara Jesu samiitianiquiaariuhua, canaari jiyacari shusha niishiquiaarini cuno naajiotasanoquiiri Jesujiniji quiquiaari.

¹⁷ Cuno pueya, Jesu samiitianishacari Lázaro niquiquiaarini, nojoriiri pueya pohuatariquiaa taa Jesu jiiquiooquiaari Lázaro na raacoji na tohutanurani. ¹⁸ Queraatia pueya niishishacari naa Jesu miishano na cumaacatatej, nojoriiri Jesu naacunuucua nijiyaree. ¹⁹ Nocuaji, Fariseocuacaari tama sequetooriquiaajaaja:

—¡Canaacuajaari cunora nia sequequiaani pa morejanaa! ¿Niaate na niquiya? ¡Puetunu pueyajanaari cuno pueyanoocua pacuree, na pueya nojori quiniuria!

Grecia jiyajinijinio taucuaca pocoojonu panishacari Jesuta

20 Grecia jiyajinijinio taucuacaari Jerusalén tiacajiniara nijioquiaarijuhuaj Pueyaso niquiara nojori queranacunuunura Pascuara. **21** Cuno pojoriiri canaa cojinia Felipeecua catecanoquiaari. Felipeeri Betsaida tiacajinijinio quiquiaari. Cunoori Galilea jiyajinia tiaca. Cuno Griegohuari Felipe sequeturee:

—Pueyanonaa, canaa quia Jiyaniijia Jesuta pocoojonu paniyani.

22 Jiyacaritij, Felipeeri Andrés sequesee cuno pojori sequencesano nojuaja. Na nuhuaji, Andrésri Felipeta quiaaree Jesuucua. Nojoriiri Jesu pohuatasseejuhuaj. **23** Jesuuri naa nojori riucuaree:

—Quiarijiani, tama janiyajaarijia mosaanutaniya pueya nitini. **24** Seetanujuanaa nia sequeyanijia, sohuajajau jaara raama jataaquishaare, pueyaracaanu niquijiajau quiniutianiyari. Saniniuujia, jaara natasaare juhua na moquenura, saaja moritianutaniyari queraatia na muetunura. **25** Naajuhuaj, cante tama na cuaqueyajaaja panijia puerani, nojuajaari puetunu shaajenutaniyajanaa. Saniniuujia, cante tama na cuaqueyajaaja panitiaja na tojiniuria janiya mijiriani, nojuajaari pueyaracaanu shuquiriaatia rishijiara jiyatesaanutaniya. **26** Cante quiria poonijionu paniyani, cuaara seetanujuanaa cua tojijia quiria. Tee cua quiniutianiyacuaani, cua tojitiajacaari tii quiniutianiyajuhuaj. Cua Queeri cua tojijiaca timitianutaniya. jjyanohua maninia nojori miiniutianiyajaarijuhuaj!

Jesu pohuatasacari nojuaja mosaanutaniya

27 'Quiarijiani, janiyari jiyanohua tacayani. ¿Casaa cua sequeyarini? ¿Janiyate sequeya soj: "Cua Quenaa, maja naquiya cua miitiniu"? Maja. Maja naa cua sequenu quiniutianiya. Janiyacuajaari cunora niquiaari mijiriani. **28** ¡Cua Quenaa, janiya cuaara miishiiriaqui taa quia paniyacuajani, pueya niishiniuria quiaari jiyanohua maninia!

Jiyacaritij, Pueyasoori tojishaaree pocuaano jiyocuacaanuji. Naa Neyanu sequereeri:

—Janiyacuajaari naa niishitirii pueyani, pueyaracaanu quia miishacari cua panishano. Janiyari socua pacutenutaniuhua pueya niishitiniuni, quiaa jaara nojoriicuara mosaare.

29 Cuno pueya, canaata tii quiriquiaa Jesutani, nojori tojishacari Pueyaso pocuaano, nojoriiri sequeturee:

—¡Miacanacuaja cuno tojishaareeni!

Tamasacaari saniniujia sequereecujua:

—¡Pueyaso serucuaja nocua pocuareeno!

30 Saniniujia, Jesuuri canaa sequeree:

—Cuno rupaa niaa na tojiriini, majaari quiria na quiniu quiriquiaa. Cunoori nia tojishocoriquiano quiriquiaa, nia niishiniuria cua Queeri cua tojiquiaa cua secojosacari nojuaja.

31 Quiarijiani, mijiria quiniaa miishacari naquiya janiya, nojoriiri saniniujia saniitiosocoriquiano jiyatesaaree tari. Naajuhuaj, mijiria jiyaniijia Sesaacaari jatasaanutaniyajuhuaj, maja cumAACaraca na quiniuria socua. **32** Janiya jaara nujuaretasaareni, janiyari puetunu pueyapuejanaa nijiotenutaniya cucuani.

Nojoriiri juhua jaatiasaanutaniya cucua, cucua nojori tiuuniuria, nojori ruuretanura janiya soj.

³³ Naa Jesu sequesacaritij, canaa niishitiriiri taa pueya monutaniya nojuajani. ³⁴ Tii quiniaa pueyari na riucuaree:

—Canaacuajaari tariucuacaanu Pueyaso Ruppaajiniji niishiyani, Pueyaso Jiyarosocoriquiano Cristoori pueyaracaanu rishiriquiano cutara. Quiajaniyarijiataj, ¿casaara quia sequeyarinija, Pueyaso Jiyarosanoori nujuaretasaanutaniya tii na cusionura? ¿Canteeri cuno pueyanoni, quiaa na sequeya Pueyaso Jiyarosanoni?

³⁵ Jesuuri nojori sequeree saaja:

—Janiya, nioojia cuhuatanani, janiyari niaata quiniutianiyajaara rupaquijiani. Nocua nia tiuuri juhuacarijia, ninishi quiyaquishacarijia. Cante ninishi quiyuacarua nia tiuuri, niaata cua quishacarijia, seetanujuanaa cuhuashiqui quijiaca nia quiniuria.

Naa Jesu sequenu nuhuaji cuno pojoritij, quiacuhuari. Nojoriicuaji jamaashiiri.

Judiocuaca tiuyaquishacari Jesuucua

³⁷ Jesuuri jiyanoqua queraatia jiyajeneta na cumaacata miishano miiquiaari pueya niquia. Nojoriiri saaja nocua tiuyaquiaari.

³⁸ Naacuajitij, tariucuacaanu Pueyaso sequenu panishano caminiuijunia Isaías pohuatasanoori tohuateequiaari, nojuaja jaara naa sequequiaari:

“Jiyaniijianaa, ¿cante canaa pohuatasanoocua tiuriini, canaa pohuatasacari quia Jiyarosocoriquianojinijini? ¡Shaaqui! ¿Cante niishirijiaaniuhuaj, jiyajeneta casaa nojori niquishanoori seetanujuanaa quia cumaacata mishano quiriquiaa? ¡Shaaqui!”

³⁹ Naacuajitij, majaari nojori naata tiuuniu quiquiaari Jesuucua. Isaásri naa naajiotaquiaari-jiuhuaj:

⁴⁰ “Pueyasoori nojori jiyateree juhua nimishi-
tiuria, maja nojori niquiniuria na nami-
jiata. Nojori niishitiaja cushitioreejaari-
uhuaj, maja nojori niishiniuria nojori jiuu-
jiata. Naa nojori miiriiri maja nojori tac-
tonura nojori jiuujia, cua jiyanooniuria no-
jori, quiarinio pueyara cua jataniyaquini-
uria nojorijiuhuaj”.

⁴¹ Supuetana Isaásri naa caminiujuquiaari Pueyaso niishitishano nojuajatej, Jesu na niquiniuucua na shacantuaca cumaacajinia quiyano. Naa na pohuatasacaritij, nojuajaari juhuacarijia Jesujiniji pohuatariquiaa.

⁴² Naajaa, queraatia narta Judiocuacaari Jesuucua tiuuquiaari. Queraatia canaa jiyaniijianucuaari nocua tiuuquiaarijiuhuaj. Cuno jiyaniijianucuaari maja na pohuatanu quijia pueya niquiara, Jesuucua tiuuijaca nojori quishacari. Nojoriiri na pohuataaquijia, Fariseocuaca na pueretusacari, Fariseocuaca mariqui nojori tenujureeri maja socua nojori tiuquitianura Pueyaso secojojua tiacajinia. ⁴³ Nojoriiri saaja narta pueya

shuquiritiasano pueya quiniu panijia, maja
Pueyaso shuquiritiasano cutara.

Pueya tojitiaaquiniuucua Jesu sequesano, no-joriiri saniitiosaariquiano

⁴⁴ Jesuuri jiyanohua na rupaa paaretaree. Naa sequereeri:

—¡Cante cucua tiuuriini, majaari saaja na tiuuniu cucua! ¡Cua Queecua tiuuriijaariuhuaj, cante cua jiyaroquiaaricuajani! ⁴⁵ ¡Cante cua niquiriini, nojuajaari cua Jiyarona niquirijiuhuaj! ⁴⁶ Janiyari mijiria niquiaarini cua cuhuatanura niajaniya. Naacuajitij, cante cucua tiuuriini, majaari tari na quiniu ninishiqui. ⁴⁷ Pueyano jaara cua rupaa tojiriquia najuhuanaj, janiyajanaari maja nocuara cua saquiriojotanu quiniutianiya na saniitiosaanura. Majaari cua niniu quiquiaari mijiria, pueya cua saniitionura. Janiya cutaraari niquiaarini nojoriicuaji cua tacunura. ⁴⁸ Cante cua ruuretaja saajani, cua sequesano tojiyaquiyajaariuhuaj, nojuajaari tari nocuara saquiriojotana jiitiae na saniitiosaanura. Nojoriria cua sequesano cutaraari tama nojoriicuara saquiriojotariquianojuaaja nio jiya puequesacari. ⁴⁹ Cua pohuatasanoori maja tama cua niishishanojuaaja. Cua Jiyarona cua Quecuajaari cua niishitiquiaa casaa cua sequenutaniyani, mariyata casaa cua niishitiojonutaniyani. ⁵⁰ Janiyari niishiyani cante cua Que rupaa tojijani, nojuajaari pueyaracaanu quijia quiniutianiya cutara. Naaratej, janiyari seetanujuanaa saaja

na sequenceso caminiujiuquiaani, taa na niishitiquiaa janiyacuajani.

13

Jesu jeequejosacari na saquiriojosano pueya niohuaca

¹ Jesuuri canaa na saquiriojosano pueyata rerejoquiaari Pascuaacuara juucajinia. Jesuuri jiyacari niishiquiaari tari quiquiaariiri quera na tiujiasacari canaa mijiria, na Queecua na tacanuhuara. Nojuajaari canaa paniriquiaajaa, taa canaa na paniquiaari pueyaracaanucuajani, mijiria na quishacari canaata.

² Cuno niucuaja, Jesuuri canaa na saquiriojosano pueyata miaqueriquiaa. Sesaacaari tari Judas Iscariote niishitirii noojajinia, nojuaja cuaara Jesu quiateera na paraa, na mosaanura. Cuno Judasri tamonu Simón jiyanishano pueyano niyanu quiquiaari. ³ Jesuuri niishijia nojuaja seetanujuanaa Pueyasojiniji niquiaari. Naajuhuaj, nojuajaari niishiquiaari, na Que Pueyasoori na jiyatequiaari Jiyaniijiarajanaa, puetunu casaa jitianajanaa na quiniuria. Niishiriquiaajaariuhua nojuajaari quera na Queecua tacanutaniuhua. ⁴ Jiyaniijajanaa na quishacari, naajaa, nojuajaari miaquejajiniji sanequiaari. Na tucuaque toque jocuareeri. Na nuhuaji na cajiniocua camarucuteree cuaqueya tuujutajaari. ⁵ Na nuhuaji, mohuaca shuurii tohuatashijiniaari. Canaa niohuaca jeequejoriquiaari juhua tiaco seru. Na nuhuaji, na sacuanijiariquiaajaariuhuaj na cajiniocua na camarucutesano cuaqueya tuujutajata.

6 Na jeequenu panishacari Simón Pedro niohuaca, Pedroori saaja Jesu sequeree:

—Jiyaniijianaa, ¿taa quia miyani? ¿Quiaateeri cua niohuaca jeequenutaniya?

7 Jesuuri Pedro riucuaree:

—Quiarijiani, majaari quia niishiniu casaara naa cua miyani. Naajaa, quiaacuaja na nuhuaji niishiniutaniya.

8 Pedroori Jesu sequeree:

—¡Cua Jiyaniijianaa, janiya cutaraari maja que-naaja cua shanacunu quiniutaniya cucua quia-janiya, cua niohuaca quia jeequenura!

Jesuuri na riucuaree:

—Janiya jaara quia niohuaca jeequejiyaquirini, majaari cua pueyano quia quiniu quiniutaniya.

9 Simón Pedroori na sequeree:

—¡Jaara naa quiritij Jiyaniijianaa, maja saaja cua niohuaca jeequenucuarajaj! ¡Quia jeequerejuhua cua juaashiquiaca, cua nacanio!

10 Jesuuri na sequeree:

—Cante shusha nanajani, saaja na niohuacaari jeequeshiya cutara. Na cuaqueyacuajaari tariucua jeequesano quiya. Puetunu niajaniyajanaari tari jeequejosano quiyacuaja. Saa niquiriyatujuari jeequesoo quiya saniniuuja.

11 Jesuuri tari niishiquiaari cante na quiatenutaniya na paraani. Nocuaji sequeriquiaari: “Niquiriyatu pueyanoori jeequesoo quiya cutara”.

12 Canaa niohuaca na jeequejonu nuhuaji, Jesuuri na toque cushiriohua. Miaquejajinia cajirio-huari. Canaa nequesotareeri:

—¿Niaate niishiya casaara naa cua jeequejoree nia niohuacani? ¹³ Niaacuajaari cua sequequiaa “Niishitijonata”, nia “Jiyaniijiatanio”. Seetanujuanaa nojuacuajanija, taa nia jiyaniquipiaa janiyacuajani. ¹⁴ Naaratej, janiya jaara jeequejoree nia niohuacaculaani, nia Jiyaniijia cua quishacari, nia Niishitijonajuahuaj, naa nia miriquia niarta Pueyaso muerasujuhuaj. ¹⁵ Janiyari naa miiriini, cua niishitijonura niajaniya, naa nia miitioonurajuhuaj taa cua miirii niajaniyacuanaani. ¹⁶ Seetanujuanaa nia sequeyanijia, seruri maja socua tojishano quijia na camarnujiniji. Naajuhuaj, jiyarosano pueyanoori maja socua tojishano quijia na jiyaronajiniji. ¹⁷ Niaa jaara cua rootasano niishiri, niaari shuquiriaatia quijiacu quiniutianiya niaa jaara na tojijiaca quiri.

¹⁸ 'Shusha cua sequesano niajaniyani, cunoori maja puetunu niajaniyaranojuanaa. Janiyacuajaari niishiyanai canapue cua saquiriojoquiaarini, taamueca pueyate niajaniyani. Naacuajitij, tariucuacaanu Pueyaso Rupaajinia janiyajiniji naajiotasanoori tohuateenutaniya. Naa sequeyari:

“Tama cuata miaquenajaarijia cua paracara quirii”.

¹⁹ Janiyari juhuacarrijia nia toyani. Naacuajitij, cua pohuatasano jaara tohuateere, niaari niishiniutianiya janiyari seetanujuanaa Pueyaso Niyununi. ²⁰ Seetanujuanaa nia sequeyanijia, cante cua jiyaramiquishano pueya tojijiani, nojuajaari cua tojiyajuhuaj. Cante cua tojijiara quirini, nojuajaari cua Jiyarona tojijiara quirijiuhuaj.

Jesu pohuatasacari, Judascuajaari na paraa na

*quiateriquiano**(Mt 26.20-25; Mr 14.17-21; Lc 22.21-23)*

21 Naa Jesu sequenu nuhuaji canaatej, jiyanohua na taraajenuta naa canaa sequereeri:

—Seetanujuanaa nia sequeyanijia, niquiriyatu niajaniyajinijinioori cua paraa cua quiatentutaniya.

22 Canaari jiyacari tama niquitiooreejaanijia. Majaari canaa niishiniu quiriquiaa canajiniji naa Jesu sequeriquiaani. **23** Jiyacaritij, janiyari na shuriucuaji cajiriquiaa miaquenuujuajiniani, na panishano pueyano cua quiniuucua. **24** Naaratej, Simón Pedroori cua mashiniquirii sanaa cua nequesotanura Jesu, canajiniji naa na sequereeni. **25** Naarate janiyari Jesuucua tatereeni, jiyashuaja cua nequesotanura nojuaja. Janiyari naa na sasacareeni:

—Jiyanjianaa, ¿canteeri naa quia miiniutaniyani?

26 Jesuuri cua riucuaree:

—Janiyari pan rau piquionutaniya caacajiniani. Cana cua niquitionutaniyani, nojuajaari cuno.

Jesuuri jiyacari pan rau piquojoree. Judas Iscariote na niquitioreeri. Nojuajaari tamonu Simón jiyanishano niyanu. **27** Judas masesacari cuno pan rau, Satanásri noojiajinia tiuquiquii. Jesuuri jiyacari Judas sequeree:

—Cuno, quiaa na niishiriojiya miiniuni, quiocua ritia miirinioj.

²⁸ Canaa na saquiriojosano pueya nata mi-aquenuuriquiaani, makaari quenaaja canaa ni-ishiniu quiriquiaa casaara naa Jesu sequeree Judasni. ²⁹ Judasri canaa cumaneeca cojuatana quijia. Naaratej, noojiaqueya canaa jinijinioori jiyaniroquiaani Jesu naasucua na jiyaroriquiaa socua casaa na masenura canaa queranacunuutajara, casamijiuniucua na niquitiojonura cumaneeca soj. ³⁰ Judas jaara masequiaari Jesu niq-uitiosano pan, jiyacari tohuataqueeri. Tariucua niucuaari quiriquiaa.

Jesu rootasano quiarinio

³¹ Judas tohuatanu nuhuaji, Jesuuri canaa se-queree:

—Quiarijia cua miishanojiniji, janiyari maniniuhuaqueetasaanutaniyani. Pueyasoori jiyanoehua maniniuhuaqueetasaanutaniyajujuhaj, naa cua miishanojiniji. ³² Pueyasoo jaara maniniuhuaqueetasaare naa maninia cua miiniuucuatej, nojuajaari cua jiyatenutaniya cumaacaraca quijia cua quiniuria na shuriucua. Quera naa cua miiniutianiyari. ³³ Quiquoohuanijojuanaa, janiya rupaquijia niaata quiniutianiyajaarani. Taa cua sequecanu parta Judiocuacaculaani, janiyari naa nia sequeyajaaniuhuaj. Niaari cua pajenuunutaniya juucua. Majaari nia naata quianu quiniutaniya cucua, tee cua quianutaniyacuaani. ³⁴ Quiarijia nia niishitiriiria nio quiarinio rootasano. Nia tojiri. ¡Panitioojuaca nia quiri! Naatej, taa cua paniquiaacuaa niajaniyani, naa nia panitioorejahuaj. ³⁵ Niaa jaara naa panitioojuaca

quiri, puetunu Pueyaso niishiyashijiaca pueyajanaari naacuaji niishiniutianiya, niaari cua tojitiajaca pueya.

Jesu pohuatasacari Pedro nocuaji seetantu-naniya

(Mt 26.31-35; Mr 14.27-31; Lc 22.31-34)

³⁶ Simón Pedroori jiyacari Jesu nequesotaree:

—Jiyanijianaa, ¿tee quia quianutaniyani?

Jesuuri na riucuaree:

—Tee cua quianutaniyacuaani, majaari quia naata nuhuajiniu janiya. Naajaa, quiaari na nuhuaji quiariquiano.

³⁷ Pedroori na sequeree:

—Jiyanijianaa, ¿casaara quia sequeyarini, quiarijia cutara maja cua naata quianu quiata? Janiyacuaja tama cua cuaqueyajaaja tarinijotaaree quiocuarani.

³⁸ Jesuuri na riucuaree:

—¿Naatee? ¿Quiaate tama quia cuaqueyajaaja tarinijotaaree cucuara? Janiyari seetanujuanaa quia sequeyani: juhuaquenu panishacari caacaraja niunijiyaquishacarijia, quiaari jiyacari cucuaji seetanu pacutejonutaniya tari.

14

Jesuuri juhua nuu Pueyasooocua

¹ Jesuuri naa canaa sequeree socua:

—Maja nia tacaaniu, pueyanaa. Nioojia nia cajitiri. Saaja Pueyasooocua nia tiuuri. Cucua nia tiururijiuhuaj. ² Cua Que tiaari puereetuca. Queraatia quiquoori tii quiya. Cunora, janiyari coteenu nia puetanutaniyani, niaacuaji cua jeenucuanura

nia quijiara. Jaara naa quiyaquiritij, janiya maara nia sequeyaquirini janiya nia puetanutaniyani, niaacuaji cua jeenucuanura. ³ Cua jeenucuanu nuhuaji nia quiquiora, janiyari niaacua tacatenu-taniuhuani, cua rijionuhuara niajaniya, cuata nia quiniuriajuhuaj tee cua quiniutaniyacuaani. ⁴ Niaacuajaari cua quiquojiniara neteja nuu niishiya, tee cua quianutaniyacuaani.

⁵ Tomásri Jesu sequeree:

—Jiyaniijianaa, ¡maja canaa niishiniu quenaaja tee quia quiaani! ¿Canaatucua taa cuno nuu niishirini, quiaa na sequeyani?

⁶ Jesuuri na riucuaree:

—Janiyacuajaari cuno nuuni, Pueyasooocua nia quianura. Janiyacuajaari seetanujuanaa Pueyaso Rupaani. Janiyari pueya samiitianijiajuhuaj. Majaari pueya naata Pueyaso rupuenu tamajaaja. Saaja janiya cutaraari pueya rupueteja Pueyasoni, nojori tiuushacari cucua. ⁷ Niaa jaara see-tanujuanaa cua niishiquiaaricuua, niaa maara cua Que niishirijiuhuaj. Seetanujuanaa, niaari tari na niishiyacuaja. Niaari na niquipuiaajuhuaj.

⁸ Felipeeri na sequeree:

—Jiyaniijianaa, quiaa jaara canaa niquitiri quia Que Pueyaso, canaacua panaatia quiriohuani.

⁹ Jesuuri Felipe riucuaree:

—Felipenaa, janiyacuajaruhua pueyaracaanu niaata quiquiaa juucuani. ¿Majateeri juhuanojuaja quia niishiniu janiya? Cante cua niquipuiaani, cua Que niquipuiaajaariuhuaj. ¿Casaara quia sequeya cua niquitiniuria cua Que niajaniyarini? ¹⁰ ¿Majateeri quia tiuuniu cucua cua sequesacari quiajaniya, janiyari cua Que jiuujiajinia

quiyaní, cua Queeri saniniuuja coojiajinia quiyacujua? Canaari maja rimiajatani. Nio, cua sequesano niajaniyani, cunoori maja tama cua niishishanojuuaaja. Cua Que, coojiajinia quiyaní, nojuajaari na panishano miitiquiaa janiya. ¹¹ Cucua nia tiuuri cua sequesacari niajaniya, janiyari cua Que jiuujiajinia quiyaní, cua Queeri saniniuuja coojiajinia quiyacujua. Niaa jaara cua sequesanoocua tiuuniu paniyaquiri, cucua nia tiuuri qui na cumaacata cua miiniuucua nia niquiara. ¹² Seetanujuanaa nia sequeyanijia, cante cucua tiuujiani, nojuajaari puetunu cua miishanojuanaa miiniutianiyajuhuaj. Cua tacasacariuhua cua Que shuriucua cua quiniuhuara, cucua tiuujacaari cua cumaacata seetanujuanaa socua jiyajeneta casaa miiniutianiya cua miishanojiniji. ¹³ Seetanujuanaa nioojiajinia cua quishacari, janiyari niaara miiniutianiyani puetunu nia masesanojuanaa nia secojosacari cua Que. Naacuajitiij, pueyari cua Que timitianutaniya, nojori niishishacari cua Queeri jiyahua maninia mijia. ¹⁴ Nioojia rupuetosacari coojiata, janiyari puetunu nia masesanojuanaa miiniutianiya niaarani.

Jesu sequesacari, nojuaja Pueyaso Sohuanu ji-yaronutaniya mijiria

¹⁵ 'Niaa jaara seetanujuanaa cua panijiaca quiri, niaari cua rootasano tojitiajaca quiniutianiya. ¹⁶ Naajuhuaj janiyari cua Que secojonutaniyani, niaacua na jiyaronura tamonu cua niti mijiria, nia cumaquiriquiano.

Nojuajaari pueyaracaanu niaata quiriquiano.

¹⁷ Nojuajaari Pueyaso Sohuanu, seetanu rupaa jiitianajanaa. Pueyaso tojiyashijiaca pueyari maja na naata cuno Sohuanu na jiitianu, nojori niquiyaquiniuucua nojuaja, na niishitiuyaquiniuucua nojuajuhuaj. Niaa cutaraari na niishijiaca. Nojuajaari niaata quiyacuaja. ¡Pueyaracaanu nioojajinia quiriquianojaariuhuaj!

¹⁸ 'Majaari seetanujuanaa cua tiujianu quiniutianiya niajaniya juhua japueyojuaca nia quiniuria. Janiyacuajaari tacatenutaniuhuani niaata cua quiniuhuara. ¹⁹ Pueyaso tojitiaashijiaca pueyari quiari naataja cua niquiyaquinutianiya socua. Niaa cutaraari cua niquijiaca quiniutianiya. Samiitianijiojua cua quiniuucua, niaari pueyaracaanu quiijiaca quiniutaniyajuhuaj. ²⁰ Jiyacaritij, niaari niishiniutianiya janiyari cua Que jiuujia rupuejani, niaari coojia rupuejacahuaj. Janiyari saniniuujia nioojajinia quijani. ²¹ Cante cua rootasano niishijiani, nojuaja jaara na tojijia quirijiuhuaj, nojuajaari cua panijia cutara. Cante cua panijiani, cua Queeri na panijia quiniutaniyajuhuaj. Janiyari na panijia quiniutaniyajuhuaj. Janiyari cua panijiaacua niniutaniyani, seetanujuanaa na niishiniuria janiyari nata quiyani.

²² Canaa cojinia Judasni, nooj, Judas Iscariote sesaanucuatej, nojuajaari Jesu nequesotaree:

—Jiyanjijiana, ¿casaara saaja canaacua quia niniutaniyarini, maja puetunu mijiria quiniae pueyacuajanaa?

²³ Jesuuri na riucuaree:

—Cante cua panijiani, cua rootasano tojijia-jaariuhuaj. Cua Queeri jiyano pueyano pani-jia. Naaratej, canaari nocua niniutianiyani, noo-jiajinia canaa quiniuria, canaa quiquirora canaa jiyatenura nojuaja. ²⁴ Saniniujujia, cante cua paniyaquijiani, jiyano pueyari cua rootasano tojiyashijiacahuaj. Puetunu cua rootasanojua-naa, niaa na tojiquiaani, cunoori maja tama cua niishishanojuaaja. Cunoori cua Que niishitishano janiya, cante mijiria cua jiyaroquiaaricuajani.

²⁵ Janiyari puetunu niojuanaa nia pohuataani, niaata cua quishacarijia mijiria. ²⁶ Cua Que jiyarosocoriquiano na Sohuanuuri nia cumaquiriquiano. Nojuajaari nia niishitiojonutaniya puetunu cua niishitionu panishanojuanaa niajaniya. Naajuhuaj, nojuajaari nia niishitiniutianiuhua puetunu tari cua pohuatasano niajaniyajanaa.

²⁷ Janiyari nioojia cajitiniutianiyani. Janiyari coojia nianutaniya nioojiajiniani, juhuajaniya quijiaca nia quiniuria taa cua quiyacuaani. Naacuajitij, niaari seetanujuanaa juhuajaniya quiniutianiya. Mijiria quiniaa pueyari maja na niishiniu cumanijianu juhua janiya. Naaratej, maja nia tacaaniu. Majaari puerenujuhuaj. ²⁸ Tari nia sequereecuajanija: “Janiya quera quiohuani. Janiyari na nuhuaji tacatenutaniuhuani niaata cua quiniuria”. Niaa jaara seetanujuanaa cua panijiaca quiriquia, niaa maara shuquiriri nia niishishacari janiyari cua Queecua quiohuani. Nojuajaari seetanu Jiyani-ijiajanaa cutara janijainiji. ²⁹ Janiyacuajaari juhuacarijia nio nia sequeyani. Naacuajitij,

niaa jaara niquiri tohuateyano cua sequesano niajaniya, niaari niishiniutianiya puetunu cua pohuatasanojuanaari seetanujuanaa.

³⁰ 'Majaari puera cua pocoojonu quiniutianiya niaata tari. Cua Paraca cucua quenaacoya tarini, na miiniuria janiya taa na paniyacuajani. Nojuajaari Pueyaso tojitiaashijiaca jiyaniijia. Pueyaracaanu cua Que Pueyaso tojijia cua quiniuucua, cua Paraca maara naquiya cua miyaquiri janiya jaara cucua na shanacuyaquirini. Na cumaacaari maja na shocotanu cua cumaaca cutara. ³¹ Naajaa, na miishanojiniji janiya, puetunu pueyajanaari niishiniutianiya, janiyari puetunu cua Que sequesanojuanaa tojijiani, na panijia cua quiniuucua.

'Nia sanetare. Niiquiji pa quiaare.

15

Jesu pueyari juhua Jesu cashacucua, Jesu quishacari juhua neyona

¹ Jesuuri naa pohuataquiaari socua canaa niquiara:

—Janiyari juhua uva jiyonani, cua Que natau.

² Cua pueyari juhua cua cashacucua. Tamonu cua cashacucuajinijinio jaara muetuyashijia quiri, cua Queeri na piyotaja. Teyano cua cashacucuajinijinote muetujua saniniunijia, cua Queeri na nacareetaja, socua queraatia na muetunura. ³ Nia tojiniuucua cua rootasano, niaari tari juhua nacareetasano quiya.

⁴ Pueyaracaanu coojia nia rupuere, taa cua

rupueya nioojiacuaani, niaa mariqui juhua uva cashacucua piyotasaareeri. Jaara neyonaacuaaji piyotasaare, majaari na naata muetunu tari. Naajuhuaj, majaari nia naata muetuua quiniu, niaa jaara coojia rupueyashijiaca quiri.

⁵ 'Janiyari juhua nia jiyonani. Niaari juhua cua cashacucua. Cante coojia rupuejani, taa cua rupueya niajaniyacuaani, naacuajitij, niaari juhua queraatia muetuua quiniutianiya. Cu- cuaji rupatejacaari maja na naata casaa miiniu janiyaju. ⁶ Cante cua rupueyashijiani, nojuajaari taraatia miishaanutaniya juhua uva cashacucua piyotasano neyonajiniji, tamocora jaquerootasano. Jaara sorere, tatcuusaarohuari manijinia quejoosocoriquiano. Tii cateyari.

⁷ 'Niaa jaara coojia rupuejaca quiri, niaa jaara cua rootasano tojijiaca quirijiuhuaj, puetunu nia panishanoocuarajanaa nia secojore Pueyaso. No- juacuajaari nia masesano miiniutianiya. ⁸ Naa cua Que miishacari nia panishanotej, niaari juhua queraatia muetuua quiniutianiya. Naacuajitij, cua Queeri jiyanohua timitiasaanutaniya. Naacuajitij, niishishaanutaniyajaariuhua niaari cua tojitiajaca pueyanijoja. ⁹ Janiyari nia pani- jiani, taa cua Que paniya janiyacuaani. Coojia rupuejaca nia quiri pueyaracaanu, cua panishano pueya nia quiniuria. ¹⁰ Janiyari cua Que panis- hanoni, pueyaracaanu cua miiniuucua na panis- hanon. Naajuhuaj, niaa jaara cua rootasano tojijiaca quiriquia, niaari pueyaracaanu cua panis- hanon pueya quiniutianiya juhuaj.

¹¹ 'Janiyari naa nia sequeyani, shuquiriaatia quiijiacaa nia quiniuria, taa shuquiriaatia quiija

cua quiyacuaani. Naacuajitij, niaari tojetaarucua-janaa shuquiriaatia quijiaca quiniutianiya. ¹² Cua tojiri. Nioori cua sequenceso niaara: “¡Pueyaracaanu panitoojuaca nia quiriquia, taa cua paniya nia-janiyacuaani!” ¹³ Cante tama na cuaqueyajaaja panitiaja na cusonura na rupuenaa nitini, naa miijia cutaraari seetanujuanaa jiyano hua narta pueya panijia. ¹⁴ Niaa jaara cua sequenceso mi-ijiaca quiri, niaari cua rupuenaa. ¹⁵ Naacuajitij, majaari cua sequenu quiniutianiya tari niajaniya cua seyata. Pueyano seruuri maja na niishiniu casaa poonijiosano na camarnu miiquiaacuaani. Janiyari quiarijia nia sequeya cua rupuenaatani, cua niishitiniuucua niajaniya puetunu cua Que sequenceso juanaa janiya. ¹⁶ Majaari nia saquiriojonu quiquiaari janiya. Janiya cutaraari nia saquiriojoquiaarini cua jiyaramiquiniuria nia-janiya, cua panishano nia miiniuria. Naa nia miishacari cua panishanotej, niaari juhua queraatia muetujua naana quiniutianiya. Puetunu nia miishano juanaa cua cuma acatani, cunoori pueyara-caanu rishijia quiniutianiya. Cuno miishano orи maja najuhuanaj. Naaratej, cua Queeri puetunu nia masesano juanaa nia niquitionutaniya see-tanujuanaa coojia rupuejaca nioojia quishacari. ¹⁷ Janiyari cunora nia sequeyani: “Pueyaracaanu panitoojuaca nia quiri”.

*Pueyaso niishiyashijiaca pueyari Pueyaso
muerasu niquiniu paniyashijiaca*

¹⁸ ’Pueyaso niishiyashijiaca jaara nia niquiniu paniyaquiriquia, majaari nia tacaaniu. Cuno pojoricuajaari naa cua

niquitiuniu paniyaquijiacacuaa. 19 Niaa jaara Pueyaso muerasu quiyaquiriquia, Pueyaso niishiyashijiaca maara nia panijiaca quiriquia, taa nojori paniquiaa narta Pueyaso niishiyashijiacaculaani. Niaari Pueyaso niishiyashijiaca quiquiaarijuhuaj. Naajaa, janiyari nojori tajiniji nia saquiriojoquiaarini, cua pueya nia quiniuria. Cunora, Pueyaso niishiyashijiacaari nia niquiniu paniyaquiquiaa, maja tari nia quishacari juhua nojori. 20 Majaari nio cua sequesano nia niyajetanu: “Seruuri maja socua tojishano na camarnujiniji”. Naaratej, Pueyaso niishiyashijiaca jaara naquiya cua miiquiaacuaa, niaari naquiya miishaanutaniyajuhuaj. Naajuhuaj, nojori jaara cua rootasano tojiquiaacuaa, nojoriiri nia rootasano tojijiaca quiniutianiyyajuhuaj. 21 Nojoriiri naa naquiya miiniutianiyya niajaniyatej, cua pueya nia quiniuucua, nojori niishiyaquishacari cua Jiyarona.

22 'Janiya jaara niyaquiquiaari nojori cua pohuatanura Pueyaso rupaani, nojoriicuara maara saquiriojotaaquishaare, sesa nojori miishanojiniji. Nojori niquiara cua pohuatanuucua Pueyaso rupaa, majaari nojori naata sequenu quiniutianiyya: “Cua jiyanoori. Maja cua niishiniu quiquiaari quia rootasano”. 23 Cante cua niquiniu paniyashijiani, nojoriiri cua Que niquiniu paniyashijiajuhuaj. 24 Sesa nojori miishano maara nojoriicuara saquiriojotaaquishaare, janiya jaara cua cumaacata miyaquiquiaari nojori niquiarani. Janiyari socua jiyajeneta cassaa miijioquiaari cua cumaacata nojori niquiarani,

socua tamasaca miishanojiniji. Naajaa, naa nojori niquishacari cua cumaacata cua miishanotej, nojoriiri saaja cua niquitouniu paniyaquijiaca, cua Que niquitouniu paniyaquijiaca janiyuuhuaj.

²⁵ Naajaa, naa nojori miiniuucua janiyatej, tariucuacaanu Pueyaso Rupaajinia naajiotasano janiyajinijiiri tari tohuateeree. Naa sequeyari: “Janiyari najuhuana niquiniu paniyaquishiyani”.

²⁶’Janiya jaara cua Que shuriucua quishuhuani, janiyari tiji Pueyaso Sohuanu jiyaronutaniya mijiriani. Nojuajaari seetanu rupaajanaa jiitiaja. Nojuajaari janiyajiniji niishitiniutaniya pueya. ²⁷ Niaari janiyajiniji pohuatanutaniya pueyajuhuaj, pueyaracaanu cuata nia quiniuucua shushajanaa cua coteesacari pohuatanu Pueyaso rupaa.

16

¹’Janiyari naa nia numooteyani maja nia tarinitianura cucua tiuuniu niaa jaara naquiya miishaare. ² Cua pueya nia quiniuucua, majaari nia shanacusaanu quiniutaniya nia tiuquitianura Pueyaso secojojua tiacajinia. Pueya jaara nia puecoorejuhuaj cua tojitiajaca nia quiniuucua, nojoriiri jiyaniutaniya nojori maninia miya Pueyasora, naa nojori miishacari. ³ Nojoriiri naa miiniutaniya niajaniyatej, nojori niishiyaquiniuucua janiya, cua Quejuhuaj. ⁴ Janiyacuajaari juhuacarijia naa nia sequeyani. Naacuajitij, niaa jaara naquiya miishaare, niocua jiyacari niishiri janiyacuajaari tari naa nia sequequiaarini. Majaari quenaaja nio cua sequenu quijia niajaniya, pueyaracaanu niaata cua quiniuucua.

Pueyaso Sohuanu miishanojiniji pohuatasano

⁵ Quiarijiani, janiyari cua Jiyaronaacua quiohuani. Quiarijiani, majaari quenaaja niajaniyajinijinio nequesotanu janiya: “¿Tee quia quiohuarin?” ⁶ Janiya jaara nia sequereeni janiya quianutaniuhuani, niaari saaja taraajequee. ⁷ Seetanujuanaa nia sequeyanijia, socua maninia quiniutaniya niaaraari, janiya jaara quiaarohuani. Janiya jaara quiaaquiyarohuani, majaari Pueyaso Sohuanu niniu quiniutaniya niaacua, na cumaquinuria niajaniya. Janiya jaara quiaarohua cutarani, janiyari niaacua na jiyaronutaniyani. ⁸ Mijiria na tiuquishacari, nojuajaari pueya jiuujiajinia poonijionutaniya, nojori na niishitiniuria nojoriiri seetanujuanaa sesa miijiaca. Nojori niishitiniutaniyayaariuhua nojoriiri na naata sesa miyashijiacara jiyatesaanu. Naajuhuaj, nojori niishitiniutaniyari Pueyasoori na naata jiyanooni nojori, maja Sesaacata nojori cojiritiasaanura mani quiquojinia quejoonu. ⁹ Seetanujuanaa, Pueyasora, nojoriiri sesa miijiaca nojori tiuyaquiniiucua cucua. ¹⁰ Jiyocuacaanu cua tacasacariuhua cua Queecua, majaari socua nia niquiniu quiniutaniya janiya. Naacuajitij, Pueyaso Sohuanuuri pueya niishitiniutaniya, janiyari seetanujuanaa cua Que Pueyaso jiyanoootijia cucua tiuuriquiano pueyani. ¹¹ Cua shocotasacari Sesaaca, Pueyaso Sohuanuuri pueya niishitiniutaniya, nojoriiri saniitiosaanutaniya. Naacuajitij, nojori jiyaniijia Satanás jaara tari saniitiosocoriquiano quiyacuaa, nojoriiri saniitiosaanutaniyajuhuaj,

cucua nojori tiuyaquiniuucua.

12 'Janiyari queraatia jiitiaajaa cua pohuatanura niajaniyani. Naajaa, majaari cua pohuatanu quiniutianiya quiarijia niajaniyani. Juhuanojuaja maja nia naata na niishiniu. Pueraruhua.

13 Pueyaso Sohuanu tiuquishacari niaacua, nojuajaari nia niishitiniutianiya puetunujuanaa cutara. Nojuajaari seetanu rupaajanaa jiitiaja. Nojuajaari maja tama na niishishanojuaja na niishitiniu quiniutianiya niajaniyani. Puetunu na tojishanojuanaa janiyajiniji, cuno nia niishitiniutianiya cutaraari. Nia niishitiniutianiya jaariuhua taate nio pa quishacari nuhuaji quiniutianiyan. **14** Niaari cua shuquiritanutaniya, nojuaja niishitiniuucua niajaniya janiyajiniji. **15** Puetunu cua Que jiitiasanojuanaani, cunoori cua casaajuhuaj. Naaratej, janiyari nia sequreeni, Pueyaso Sohuanuri janiyajiniji masenutaniya cua jiitiasano niaara, na caminiujiuniuria niajaniyarajuhuaj.

16 'Niaari saaja quiarijia cua niquiya. Na nuhuaji cutara, majaari socua nia niquiniu quiniutianiya janiya. Pasa naataja na nuhuaji, niaari cua niquiniuutianiuhuacuhuaj.

Nia tarajenuuri jatanutaniya shuquiriaatia nia quiniuria

17 Jiyacaritij, noojiaqueya canaa na saquiriosano pueyajinjinioori tama nequesoreetooreejaaaja:

—¿Casaa na sequenu paniyarini, nojuaja jaara sequeree: “Niaari saaja quiarijia cua niquiya. Na nuhuaji cutara, majaari socua nia niquiniu quiniutianiya janiya”? ¿Casaa na sequenu

paniyajaaraniuhua na sequesacari: “Pasa naataja na nuhuaji niaari cua niquinutianiuahuacuhuaj”, na sequesacarijiuhuaj: “Cua Queecua quianutaniuhuanijia”? ¹⁸ Naajuhuaj, ¿casaa na sequeyarini na sequesacari “quiarijiani”, mariyata “pasa naataja na nuhuaji”? ¡Majaari pa niishiniu casaaraqui na sequeyatejaj!

¹⁹ Jesuuri tari canaa nequesotanu panishano nojuaja niishirii. Cunora naa canaa sequereeri:

—Janiyari nia sequereeni: “Niaari quiarijia cua niquiya, na nuhuaji cutara maja socua nia niquiniu quiniutianiya janiya. Pasa naataja na nuhuaji, niaari cua niquinutianiuahuacuhuaj”. ¿Niaatejaara niojiniji nequesoreetoya tama niajaniyajaaja? ²⁰ Seetanujuanaa nia sequeyanijia, niaari nujuquenutaniya. Niaari taraajeconutaniyajuhuaj. Jiyacaritij, Pueyaso niishiyashijiacaari taquiya shuquiriaatia quiniutianiyyacuuaa niajaniyajiniji. Naajaa, cuno nia taraajenuuri jatanutaniya shuquiriaatia nia quiniuria. ²¹ Naajaariuhuaj, maaji ranu panishacari na mueya, jiyanolhua naquiya miyari. Naajaa, mueya na ranu nuhuaji, naquiya na miiniu niyajetaqueeri, na mueya na timitiasacari. ²² Quiarijiani, niaari naa taraatia quiyajuhuaj. Naajaa, niaacua tacatenutaniuhuanijia. Niaari jiyanolhua shuquiriniutianiya nia niquishacari janiya. Majaari quenaaja tamasaca pueya naata quiniutianiya cuno nia shuquiriniu jaariutianu.

²³ Jiyacaritij, majaari socua nia nequesotanu quiniutianiya janiya. Seetanujuanaa nia sequeyanijia, cua Queeri nia niquitionutaniya puetunu nia masesanojuanaa nojuaja,

seetanujuanaa coojia rupuejaca nioojia quishacari. ²⁴ Majaari juhuanojuaja nia secojonu Pueyaso seetanujuanaa taa cua sequeyacuajani, seetanujuanaa coojia rupuejaca nioojia quishacari. Naa nia secojoretej. Niocua nia panishano niquitiosaare, seetanujuanaa shuquiriaatia nia quiniuria.

Jiyaniijia Jesuuri Sesaaca shocotana

²⁵ 'Janiyari pueyaracaanu nia pohuataquiaa miriquini. Janiya quera nia pohuatanutaniya maatia seetanujuanaa cua Quejiniji cutarani. ²⁶ Jiyacaritij, niaari cua Que secojonutaniya coojia rupuesano nia quishacari. Jiyacaritij, majaari na panishaanu quiniutianiya cua shiniujiuniuria cua Que, na tojiniuria niajaniya. ²⁷ Cua Quejanaacuajaari nia panijia, nia paniniuucua janiya, nia niishiniuucuajuhuaj janiyari na jiyarosanoni. ²⁸ Niaacuajaari niishiya, janiyari cua Que shuriucuaji niquiaarini pueyanora cua quiniuria mijiria. Quiarijia saniniuujia, janiyari nio jiya tiujianutaniyani, cua Queecua cua quianuhuara.

²⁹ Naa Jesu sequencesacari canaatej, canaari na sequereeni:

—Quiarijia cutara, quiaari maatiajanaa sequeree, maja miriqui. ³⁰ Quiarijia cutara, canaari niishiyani quiaari puetunu casaajanaa niishijia. Majaari quenaaja na panishaanu pueya nequesoreenura quiajaniya. Naacuajitij, canaari niishiyani, quiaacuajaqui Pueyaso Jiyarosano.

³¹ Jesuuri canaa sequeree:

—¿Naatee? ¿Niaate shusha cucua tiuyaruhua?
 32 Tari quenaacoyari naquiya cua miishaanura. Seetanujuanaa quiarijiaari. Niaari cucuaji cocuatasaanutaniya puetunujuanaa. Niaari tamajaaja cua tiujianutaniya. Naajaa, seetanujuanaa majaa cua quiniu tamajaaja. Cua Quecua-jaari cua cojiyani. ³³ Janiyari puetunu niojua-naa nia sequeyani, nioojia nia cajitiniuria nio cua pohuatasanocua nia tiuushacari. Mijiria nia quishacari, niaari seetanujuanaa naquiya miiniutianiya. Naajaa, janiyacuajaari mijiria jiyaniijia shocotareeni. Naacuajitij, nioojia nia cumaquiri tamajaaja.

17

Jesu secojosacari na pueyacuara

¹ Naa Jesu sequenu nuhuajitij, jiyocuacaanu na mausacari, naa na Que sequereeri:

—Cua Quenaa, janiya nio juuca naquiya miishaanutaniyani taa quia sequequiaaricuajani. Cua tojiniuucua quiajaniya, quia Jiyarosano quia jiyatere pueya timitiasano cua quiniuria. Naacuajitij, janiyacuua saniniuu{jia quia jiyatere pueya timitiasano quia quiniuriani, tojetaarucuajanaa maninia mijiia quia quiniuucua. ² Quiaacuajaari quia cumaaca cua niquitioquiaari puetunu pueyajanaa cua jiitianura. Naacuajitij, janiyari saniniuu{jia nojori jiyatenutaniya pueyaracaanu quijiaca nojori quiniuriani, teyano pojori quia niquitioquiaari janiyacuajani. ³ Nojori niishishacari saaja quiajaniyari seetanujuanaa Pueyasocuaja,

naajuhuaj, nojori niishishacari janiyari quia jiyarosanoni, naacuajitij, nojoriiri pueyaracaanu quiijara quiniutianiya shuquiriaatia.

⁴ *Janiyari tari tucuataree quia sequencesano cua miiniuria mijiriani. Naa cua miiniuucua puetunu quia panishanojuanaatej, pueyari quia timitiaa.*

⁵ *Jiya shipiniyaquishacarijia, janiyari jiyanohua shuquiriaatia quijia quiquiaari quia shuriucuani, jiyanijijajanaa cua quishacari. Cua Quenaa, naa quiijara cua jiyaterohua quiarijiani, quia shuriucua cua quiniuhuara.*

⁶ *Quia niquitosano pueya janiya, quia saquiri-
ojosano pueya quia niishiyashijiaca pueyajini-
jioni, quiarijia cutara, nojoriiri niishiya cante
quiajaniyani. Nojoriiri quia niishiya, nojori
niquinuucua cua miijosano quia cumaacata, cua
pohuatasano quiajaniyajiniji nojori tojiniuucua-
juhuaj. Nojoriiri quia pueya quijia. Quiaari
saniniuujia nojori cua niquitioquiaari. Nojoriiri
quiarijia quia rupaa tojitiajaca cutara.* ⁷ *Nojoriiri
niishiya puetunu cua jiitiasanojuanaani, cunoori
quia niquitosano janiya.* ⁸ *Janiyari quia rupaa
rootacanu nojorini, quia niishitishano janiyani.
Nojoriiri seetanujuanaa nocua tiurii. Nojoriiri
seetanujuanaa niishiya, janiyari quia shuriucuaji
niquiaarini. Niishitiuyaajaariuhuaj, janiyari see-
tanujuanaa quia jiyarosanoni.*

⁹ *Janiyari cunora nojoriicuara quia secojiyani,
seetanujuanaa quia pueya nojori quiniuucua.
Majaari cua secojonu quia niishiyashijiaca
pueyacuara. Saaja noo pojoriicuara quia
secojiyanijia, quiaa na niquitioquiaari janiyatej.*
¹⁰ *Naaratej, puetunu cua jiitiasano pueyajanaari*

quia pueyajuhuaj. Mariyata puetunu quia jiitiasano pueyajanaari cua pueyajuhuaj. Nojori tiuuniuucua cucua, nojoriiri jatanishano pueya quiniutianiya. Naacuajitij, queraatia pueyari cua timitianutaniyajuhuaj, naa nojori niquishacari cua cumaaca.

¹¹ 'Majaari puera cua tarishiniu quiniutianiya mijiria. Cua pueya cutaraari mijiria quiniutianiyyajaara, janiya jaara quiaarohua quiocuani. Jiyano hua maninia cua Quenaa, nojori quia cojuare quia cumaacata, tezano pojori quia niquioquiaari janiyacuajani. Naa quia jiitiare nojori, jatiqui nojori quiniuria juhua niquiriyatu jiuujiaraca, taa pa quiyacuaani. ¹² Mijiria cua quishacari nojoritia, janiyari nojori cojuajani quia cumaacata, quia rupaacua tiuujiacu nojori quishacari. Majaari quenaaja niquiriyatu nojorijinijinio cua juurequetenu quiquiaari. Saa noojuari juurequecanu cutara, tariucua juurequeriquiano quiyacuajatej. Naacuajitij, tariucuacaanu quia rupaajinia naajiotasanoori tohuateecanu.

¹³ 'Quiarijiani, janiyari quiocua quianutaniyani, tee quia quiyacuaani. Niya cua quishacarijia, janiyari nio sequeya nojori niquierani, nojori jiitianura cua shuquiriniuijuhuaj, tojetaarucuajanaa shuquiriaatia quiyacu nojori quiniuriajuhuaj. ¹⁴ Janiyari nojori niishitiocanu quia rupaani. Naa nojori tojishacari quia rupaatej, quia niishiyashijiaca pueyari nojori niquinii paniyaquiquiaa. Cua pueya nojori quishacari, nojoriiri maja saaja mijiria quiyacu na quiniu tari, taa janiyacuani.

Naaratej, mijiria quijiaca pueyari nojori niquiniu paniyaquiquiaa. ¹⁵ Naa cua secojosacari quiarijia nojoriicuaratej, majaari cua sequenu quiajaniya nojori quia rijionura niiquipi. Saaja quia secojiya cutaranijia, nojori quia cojuanura Sesaacaacuaji. ¹⁶ Nojoriiri maja mijiria quijiaca na quiniu tari cua pueya nojori quishacari, taa nio jiyajinjinio cua quiyaquiyacuaani. ¹⁷ Quia rupaa quia poonijiotere nojori jiuujiajinia, tojetaarucuajanaa quia tojijiaca nojori quiniuria. Quia rupaari seetanu rupaajanaa cutara. ¹⁸ Quiaacuajaari cua jiyaroquiaari mijiria quiniaa pueya niquiara cua pohuatanura quia rupaa. Naajuhuaj, janiyari cua pueya jiyaramiquiyani mijiria quiniaa pueyacuajuhuaj. ¹⁹ Quia tojijiaca nojori quiniuria seetanujuanaa, janiyari tama cua cuaqueyajaaja jiyateya puetunu quia panishanojuanaa miijia cua quiniuriani. Naacuajitij, nojori niishishacari seetanu rupaajanaa janiyajiniji, nojoriiri tojetaarucuajanaa maninia miijiacara jatanishaanutaniya.

²⁰ Majaari saaja cua secojonu nio pojoriicuara, tariucua quia tojitiajacacuaani. Janiyari secojiyajuhuaj na nuhuaji cucua tiuuriqiano pueyacuara, noo pojoriicuara cante cucua tiuuniutianiya na nuhuajini, nojori tojishacari nio pojori pohuatasano janiyajiniji. ²¹ Cucua tiuuriqiano pueyacuara secojiyanijia puetunu cucua tiuuniaajanaa cuaara quiuria jatiqui, juhua rupuetotesano, taa pa quiyacuaani, cua Quenaa. Naatej, taa cua quiya quioojiajinacuaani, quiaari saniniuujia coojiajinia quiyacujua.

Nojori jiuujia cuaara juhua rupuetootesano quiuria poojiatajuhuaj, mijiria quiniaa pueya niishiniuria, quiaari cua jiyaroquiaari mijiria. ²² Janiyari nojori cumaquiya quia Sohuanutani, quia niquitosano janiyacuaa, juhua niquiriyatu jiuujiaraca nojori quiniuria, naatej, taa niquiriyatu jiuujiaraca pa quiyacuaani. ²³ Quiaari coojiajinia quiya. Naajuhuaj, janiyari nojori jiuujiajinia quiyajaacuhuaj. Naacuajitij, paari nojoritia juhua niquiriyatu quiniutianiyani. Naacuajitij, mijiria quijiacaari niishiniutiani, quiaari seetanujuanaa mijiria cua jiyaroquiaari. Nojoriiri niishiniutiani yahuaj, quiaari jiyano hua cua pueya panijia, taa quia paniya janiyacuaani.

²⁴ Cua Quenaa, cuno pueya quia niquitosano janiyani, janiyari paniyani nojori quiniuria cuata quia shuriucua, nojori niquiniuria cua shacantuca cumaaca. Quiaari cuno cumaaca cua niquitioquiaari pueyaracaanu quia paniniuucua janiya, jiya shipiniyaquishacarija.

²⁵ Tojetaarucuajanaa sesa miyashijia cua Quenaa, mijiria quihiaca pueyari maja na niishiniu quiajaniya. Janiya cutaraari quia niishiyani. Nio cua pueyari niishiyahuaj, janiyari seetanujuanaa quia jiyarosanoni.

²⁶ Janiyari nojori niishitiocanucuajani cante quiajaniya. Janiyari naa pueyaracaanu nojori jiuujiajinia niishitiniutiani quiajaniyajiniji, seetanujuanaa nojori niishiniuria quiajaniya. Naacuajitij, taa quia paniya janiyacuaani, nojori cuaara cuno paniniu jiitiaara nojori jiuujiajinia yahuaj. Naa nojori niishishacari

quiajaniyatej, janiyari nojori jiuujiajinia quiniutianiyajuhuaj.

18

*Na paraa quiasacari Jesu
(Mt 26.47-56; Mr 14.43-50; Lc 22.47-53)*

¹ Naa Jesu secojonu nuhuaji na Quetej, nojuajaari canaa puetaaree Cederón surocono taquijiria. Tii quiquiaari olivo cuhuariquia. Cuno cuhuariquiaari matacosano quijia puetunu na shocuajanaa. Jesuuri tii tiuquitiamaa canaa, na Que Pueyaso na secojonura. ² Jesuuri tii jiitiquiaari canaata na rerejonura. Naacuajitij, na paraa na quiateriquiano Judasri cuno cuhuariquia niishiquiaarijuhuaj. ³ Canaa quishacari tii, Judasri jiyacari soldadohua tiuquitiassee, Pueyaso Secojojua tia cojuanaa pueyanio. Cuno pojoriiri pueyacuara secojonaa jiyaniijianucua jiyaramiquishano pueya quiriquiaa, Fariseocuaca jiyaramiquishano pueyanio. Nojoriiri pueya na miaquetaja pooriquiaa, nocuaji na nunutaja jayoco, samarinio. ⁴ Jesuuri tari puetunujuanaa niishiriquiaacuaja taa nojuaja miishaanutaniyani. Naaratej, nojuajaari cuhuariquia matacajiniji tohuatamaa, na paraa na naacunura. Na naacusacari nojori, nojori nequesotareeri:

—¿Cana nia pajeyani?

⁵ Na paraari na riucuaree:

—Canaa Nazaret tiacajinjinio Jesu pajeyani.

Jesuuri nojori riucuaree:

—Janiyacuaja nojuajani.

Jesu tacartana Judasri cuno pojoritia quiriquiaa tii. ⁶ Jesu sequencesacari, “Janiyacuaja nojuajani”, na paraari na nijiniara pojotuquee. ⁷ Jesuuri socua nojori nequesotarohua:

—¿Cana nia pajeyani?

Nojoriiri socua pacuterohua sequenu:

—Canaa Nazaret tiacajinijinio Jesu pajeyani.

⁸ Jesuuri nojori riucuaree:

—Janiyacuaja tari nia sequereeni, janiyacuaja nojuajani. Niaa jaara cua pajeya, nareja nia niquiri nio, cua cojiniaani.

⁹ Naacuajitij, tama Jesu sequencesanojuaarijia tohuateequiaari, nojuaja jaara naa na Que sequequiaari: “Majaari quenaaja niquiriyatu pueyano cua juurequetenu quiquiaari quia niquitiosano pueyajinijinio janiya”. ¹⁰ Jiyacaritij, Simón Pedroori tama na mueruujuaja shitiaree na shucuaji shiyano. Nata, pueyacuara secojonaa jiyaniijia seru numoco jaatereeri, na miaquetajara na numoco. Cuno seru sesa quiquiaari Malco.

¹¹ Jesuuri Pedro sequeree:

—Na co jiniacuma quia shiiriohua quia mueruu. Cua Que jaara paniya naa cua miishaanura naquiyatej, ¿janiyatucua nio pojoriria tama cua cuaqueyajaaja tarinitiaaquiri naquiya cua miishaanurani? ¡Taaquiriirinij!

Anás nequesoreesacari Jesu

(Mt 26.57-58; Mr 14.53-54; Lc 22.54)

¹² Jiyacaritij, na paraari Jesu quiaree. Nojoriiri quiquiaari Romano soldadohua, nojori jiyaniijiajuhuaj, Pueyaso Secojoua tiaco cojuanaa pueyanio. Nojoriiri Jesu morojoturee. ¹³ Na

nuhuaji, nojoriiri coteenu na jaatucutaquiaari Anáscua, canaa pueyacuara secojonaa jiyaniijia Caifás cama na quiniuucua. Cuno marijilara, Caifásri pueyacuara secojonaa jiyaniijiajanaa quiriquiaa. ¹⁴ Cuno Caifás cuajaari tari naa sequequiaari narta Judiocuaca camarucua: “Maniniacuajaari niquiriyatu pueyano mosaanura puetunu pueya nitijianaa, maja najuhuana puetunu pueyajanaa puecoosaanura”.

*Pedro coteesacari seetanu Jesujiniji
(Mt 26.69-70; Mr 14.66-68; Lc 22.55-57)*

¹⁵ Simón Pedroori cuata Jesu nuhuajiriquiaa tucuacaanuji. Janiya cutaraari pueyacuara secojonaa jiyaniijiajanaa niishishano pueyano quiquiaarini. Naacuajitij, janiyari tiuquinishaaree cutara Jesutani, jiyaniijia tia shocua mataca jiniacuma. ¹⁶ Saaja Pedro cutaraari tohuateyaji jateesee. Jiyaniijiajanaa niishishano pueyano cua quiniuucua, janiyari tohuateyaji cojuana niyacoota pocoojoseeni, Pedro na tiuquininiuriajuhuaj. ¹⁷ Cuno niyacoori Pedro nequesotaree:

—¿Majate quiajaniya cuno Jesu pueyajinijinio-juhuaj?

Pedroori na riucuaree:

—¡Maja janiya!

¹⁸ Shiniquiaari jiyacari jaanujuriquiaa. Nocuaji cuno jiyaniijia seyari Pueyaso Secojosua tiajinia cojuanaa pueyata mani naatequiaari. Nojoriiri na jitiuriquiaa. Pedroori nojoritia tii quiriquiaa-juhuaj. Mani jitiuriquiaari.

Pueyacuara secojonaa jiyaniijia nequesoreesacari Jesu

(Mt 26.59-66; Mr 14.55-64; Lc 22.66-71)

¹⁹ Jiyacaritij, pueyacuara secojonaa jiyaniijia Anásri Jesu nequesoreenu coteeree canaa na saquiriojosano pueyajiniji. Jesu niishitiosanojiniji Jesu nequesoreerejaariuhuaj. ²⁰ Jesuuri na sequeree:

—Janiyacuajaari pueyaracaanu puetunu pueya niquiarajanaa maatia niishitiojoquiaani. Janiyari pueyaracaanu tiquiyocua Pueyaso secojonuujuaca tiacajiniaqueya niishitiojoquia pueyani. Naajuhuaj, janiyari niya Jerusalén tiacajinia Pueyaso Secojojua tiajinia niishitioriquiaani, tee puetunu parta Judiocuacajanaa rerejoquiaacuajani. Majaari quenaaja jiyasohua cua rootanu quiquiaa pueya. ²¹ ¿Casaara quia nequesoreya janiyani? Quia nequesoreere juhuari cuno pojori, canapuete cua pohuatasano tojiquianuni. Nojoricuajaari quia sequenutaniya casaa cua rootaquiaa nojorini.

²² Jiyacaritij, Pueyaso Secojojua tiaco cojuana pueyanoori Jesu shuriucua nujuariquia. Naa Jesu riucuasacari jiyaniijia Anástej, Secojonuujuua tiaco cojuana pueyanoori Jesu jiquioco maseteree. Naa Jesu sequereeri:

—¿Naa riucuasanote pueyacuara secojonaa jiyaniijia?

²³ Jesuuri na riucuaree:

—Janiya jaara sesa riucuareeni, cua sequere casaate sesa quiriini. Saniniujia, janiya jaara maninia sequereeni, ¿casaara quia maseteree cua jiquiococuaraarini?

24 Canaa pueyacuara secojonaa jiyaniijiajanaa Caifás quiniuucua, jiyacaritij, Anásri Jesu moronucua jiyarotaree Caifáscua.

*Pedro pacutesacari seetanu Jesujiniji
(Mt 26.71-75; Mr 14.69-72; Lc 22.58-62)*

25 Anás nequesoreesacarijia Jesu, Pedroori tii jitiuriquiaajaa. Tii quiniaa pueyari jiyacari na nequesotaree:

—¿Majate quiajaniya cuno pueyano pueyajinijiniojuhuaj?

Pedroori saaja seetaree. Sequereeri:

—¡Maja janiya!

26 Pueyacuara secojonaa jiyaniijia seruuri Pedro niquirii. Nojuajaari noo pueyano cuna quiriquiaa, Pedro jaatesano na numocotej. Nojuajaari Pedro sequeree:

—¡Janiyacuajaruha quia niquirii cuno pueyanota quia quishacari olivo cuhuariquiajinian!

27 Pedroori na seetarohuacuhuaj. Caacarajaari jiyacari niunijioquee.

*Jiya jiyaniijia Pilato nequesoreesacari Jesu
(Mt 27.1-2, 11-14; Mr 15.1-5; Lc 23.1-5)*

28 Caifás tiajiniji, Jesuuri jaatucusaaquiaari Romano jiyaniijia tiajiniara. Cuno tiaari jiyahoua puereetuua quiriquiase, jiyaniijiaacua ji tiasano. Cuno jiyaniijian, nojuajaari Romano jiyaniijiajanaa César jiyatesano quiquiaari jiyaniijiajanaa na quiniuria Judea jiyajinia. Na sesa quiquiaari Pilato. Canaa Judiocuaca jaara tiuquijioquiaari Jesuta Pilato tia carijiniacuma, shusha juhuaqueriquiaari. Nojoriiri maja na tiuquitianu quiquiaari Pilato tiaco, nojori mariqui

juhua curuushiriiri Pueyaso niquiara, nojori tiuquitianuucua tahue tiajinia. Nojori jaara juhua curuutuuca quiri Pueyaso niquiara, naacuajitij, nojori maara Pascuara miaquesano borrego miaqueyaquirij. ²⁹ Naaratej, Pilatoori nojoriicua tohuataquiaari. Nojori nequesotareeri:

—¿Casaa nio pueyano miiriucuaani, miji nia nitianura cucuani?

³⁰ Nojoriiri saaja riucuaree:

—Jaara sesa miyashijia quiriquia, ¿canaatucua casaara quiocua na nitiamani?

³¹ Pilatoori nojori sequeree:

—¡Niiquiji nia jiyataarohua! ¡Tama nia nequesoreesuhuajaaja, taa nia supuetanaa rootasano sequeyacuajani!

Canaa Judiocuaca camarucuaari Pilato riucuaree:

—¡Niajaniya Romano pueyani, niaacuajaari canaa sequecanu maja canaa monura pueyano!

³² Naacuajitij, naa tarrijia Jesu sequesanoori tohuateeriquiano quiquiaari, nojuaja jaara sequequiaari taa na mosaanutaniya niyacutesanojiniani. Saaja Romano pueyari naa monu niishiquiaari niyacutesanojinia. ³³ Jiyacaritij, Pilatoori na tiaco tiuquiyarohua. Jesu piiriiri nocua na niniuria. Tii Jesu nequesotareeri:

—¿Quiaate seetanujuanaa Judiocuaca jiyaniijia?

³⁴ Jesuuri Pilato sequeree:

—¿Cunote tama quia niishishanojuuaaja naa quia nequesotanura janiyatej? ¿Tamonu soj quia pohuatacanu janijajiniji?

³⁵ Pilatoori Jesu juaarii. Na sequereeri:

—¡Quiaa jaara Judiocuaca jiyaniijiarano quiri, janiyara naajaa! ¿Janiyateeri quiarta Judio pueyanoni? ¡Tama quiarta Judiocuacacuajaari cucua nitiamaa quiajaniya, nia pueyacuara secojonaa jiyaniijianucuata! ¡Cua sequere casaa quia miiriucuaani!

³⁶ Jesuuri na riucuaree:

—Janiyacuajaari Jiyaniijiani, maja juhua mi-jiria jiyaniijia. Janiya jaara mijiria jiyaniijia quiriquiani, cua pueya maara cua quiatunaa cuarta Judiocuacata miaquetoore, maja nojori quiatunura janiya. Majaari jiyaniijia cua quiniu mijiria, taa quia quiyacuaani.

³⁷ Pilatoori Jesu nequesotaree:

—¿Naatee? ¿Quiaateeri jiyaniijia?

Jesuuri na riucuaree:

—Jaa. Janiyacuaja Jiyaniijiani. Janiyacuajaari cunora rasaaquiaarini. Janiyari mijiria niquiaarini seetanu rupaajanaa cua niishitiniuria pueya. Cante seetanu rupaajanaa panijiani, nojoriiri cua sequesano tojitiajaca.

³⁸ Pilatoori najuhuana na nequesotaree:

—¿Casaateeri cuno seetanu rupaajanaani?

Naa na nequesotanu nuhuajitij, Pilatoori tohu-atamohuacuhua canaa Judiocuacaacua.

Pueya sequesacari Jesu cuaara mosaaria

(Mt 27.15-31; Mr 15.6-20; Lc 23.13-25)

Pilatoori jiyacari pueya sequeree:

—Nio pueyano nequesoreereecuajanija. Nojuajaqui maja sesa na miiniu quiqianu. ³⁹ Niajanija Judiocuacani, niaari puetunu Pascua juucarajanaa cua nenecojoquiaa cua cartenura

nujuatejojuajiniji nujuatesano pueyano.
 Quiarijiani, ¿cana nia paniya cua cartenura
 nio Pascua juucarani? ¿Niarta Judiocuaca
 jiyanijiatee?

⁴⁰ Puetunu pueyajanaari naa jiyanohua na-
 coorohuacuhuaj:

—¡Maja cuno cartenu! ¡Barrabás quia cartere
 cutara!

Cuno Barrabásri nohuasejojua quijia.

19

¹ Jiyacaritij, Pilatoori na soldadohua maja-
 cuteree Jesu, coqueeca casaata. ² Soldadohuari
 juhuaccontucua maaturee Jesu nacaquera. Na
 nuhuaji cushitishaarohuari. Na macaatiniuria,
 shaaruque toque cushitishaarohuari, juhua
 jiyanijija toque. ³ Naa nojori miiniu nuhuaji
 Jesutej, nojoriiri nocua catecanoquiaari. Na
 sequetureeri:

—¡Judiocuaca jiyanijianaa! ¡Quia timiri, Ju-
 diocuaca jiyanijianaa!

Naa nojori sequencesacari Jesutej, nojoriiri na
 jiquioco piqutiuri.

⁴ Pilatoori socua tohuataquiaari canaa
 Judiocuacaacua. Nojori sequereeri:

—¡Nia niquiri! Janiya na tohuateya
 niaacuani, nia niishiniuria janiyacuaja tari na
 nequesoreereeni. Janiyari quiarijia niishiyani,
 nio pueyanoqui maja sesa na miiniu quiriucaa.

⁵ Jesu muetasacari nojoriicua, juhuaccontucua-
 jiniji nacaque cushiriquiaari, shaaruque toque-
 nio. Pilatoori Judiocuaca sequeree:

—Nia niquiri niarta pueyano.

6 Canaa pueyacuara secojonaa jiyanijianucua, Pueyaso Secojosua tiaco cojuanaa pueyajuhuaj, nojori jaara Jesu niquiquiaari, naa nacoonu coteetureeri:

—¡Niyacutesanojinia quia teetere tii na cusionura!
¡Niyacutesanojinia quia teetere!

Pilatoori nacoyano riucuaree saaja:

—¡Maja! ¡Janiyacuajaari niishiyani, nio pueyano maja sesa na miiniu quiquianu! ¡Niaa jaara na monu paniri, nia teetere tama niajaniyajaaja!

7 Canaa Judiocuacaari Pilato riucuaree:

—¡Canaari Pueyaso Rootasano naajionee jiiti-aani! ¡Canaari cunojiniji niishiyani, nio pueyano cuaara mosaaria tama na cuaqueyajaaja na jiyatenuucua Pueyaso Niyanura!

8 Pilato tojishacari naa canaa Judiocuaca sequesanotej, nojuaajaari socua puerequiaari. **9** Pilatoori na tiaco tiuquiyarohua Jesuucua. Na nequesotareeri:

—¿Tejenotejaara quiajaniyani?

Jesuuri maja na riucuanu quirii. **10** Pilatoori na sequeree:

—¡Cua riucuarejaj! ¿Quiaate niishiyaquia, janiya jiyaniijiani? ¡Janiya jaara panirini, cua naata cua pueya sequenu na teetenura quiajaniya! ¡Janiya jaara paniyaquirijiuahuaj, cua naata quia cartenujuhuaj!

11 Jesuuri saaja na riucuaree:

—Jiyocuacaanu Quijia jaara quia jiyateyaquiajiaari jiyaniijia quia quiniuria, quiaa maara quia cumaaca paareetaaquiri cucuaj. Naaratej, cante niyara cua nitiamaa

quiocuani, nojuajaari socua jiyanohua sesa miirii quiajaniyajiniji.

¹² Naa Pilato tojishacari Jesu sequencesanotej, nojuajaari socua shiriiquipuaari. Nocuaji, Jesu cartenu saniniuijuriquiaa juucuaari. Judiocuacaari saa nacooreejaa. Naa Pilato sequetureeri:

—¡Cante tama na cuaqueyajaaja jiyateja jiyaniijiarani, nojuajaari pa jiyaniijia César paracara quijia! ¡Naaratej, quiaa jaara cuno pueyano cartere, majaari socua pa jiyaniijiajanaa César rupuena quia quiniu quiniutianiya!

¹³ Naa Pilato tojishacari pueya sequencesano nojuajatej, nojuajaari na soldado sequeree na tohuatenuhuara Jesu pueya niquiara. Pilatoori jiyacari cajirii pueya na nequesoreesaquiji cajitiujinia. Pilato tii cajiriquiaani, na tacoji pueya nujuatusaquini, cunoori shanohua saitia shipinishano quiquiaari. Naaratej, na sesa quiquiaari “Saitia maniniushitishano”. Judiocuaca rupaajinia saniniujia, cunoori quiquiaari “Gábata”. ¹⁴ Jiyacariiri panacari quiriquiaa. Cuno juuca, canaa Judiocuacaari juhuacarijia jeenucuarquiaa Pascuara juucajinia. Pilatoori jiyacari tii quiniaa Judiocuaca sequeree:

—¡Nia niquiri nia jiyaniijia!

¹⁵ Pueyari saa nacooreejaa:

—¡Cunoori maja canaa panishano canaa jiyaniijia na quiniuria! ¡Niyacutesanojinia quia teetere!

Pilatoori nojori sequeree:

—¿Janiyatucua nia jiyaniijia teetereni? ¡Maja!

Pueyacuara secojonaa jiyaniijianucuaari Pilato sequeree:

—¡Jiyaniijia Césarcuajaari canaa jiyaniijiajanaa!
¡Maja socua tamonu jiyaniijia canaa jiitianu!

¹⁶ Pilatoori socua Judiocuaca niquitioree Jesu, nojori teetesocoriquiano. Naaratej, nojoriiri na jiyataquiaari na teetenuucua.

Jesu teetesacari

(Mt 27.32-44; Mr 15.21-32; Lc 23.26-43)

¹⁷ Jesuuri tama na teejaranojuuaaja canujutaaree pueya puecoosaquiria. Puecoosaqui sesa quiquiaari “Pueyano nacaco tuhuananu”. Judiocuaca rupaajinia saniniuujia, “Gólgota”. ¹⁸ Jesuuri tii teetesaaquiaari, socua caapiqui pueyanio. Jesuuri cuno pojori tajinia nujuaretasaaree. ¹⁹ Pilatoori naa naajiotequiaarijuhuaj Jesu nacaacuma rupotasocoriquiano: “Nazaret tiacajinijinio Jesu, Judiocuaca jiyaniijia”. ²⁰ Naajiosano quiriquiaari canaa Judiocuaca rupaajinia, Romano pueya rupaajiniajuhuaj, Griego rupaajinianio. Jesuuri catecaja teetesaaquiaari Jerusalén tiacajiniji. Naacuajitij, queraatia Judiocuacaari cuno naajio serojoquiaari. ²¹ Naaratej, Judiocuacaacuara secojonaa jiyaniijianucuaari Pilato juatiurii:

—¿Casaara naa quia naajiotereeni: “Judiocuaca jiyaniijia”? Cuaara naajiosaaria cutara: “Tama na cuaqueya sequejajaaja, Judiocuaca jiyaniijianijia”.

²² Pilatoori nojori riucuaree saaja:

—Janiyacuajaari naa naajiotereeni. ¡Cuaara naa quiiriatej!

²³ Cuno cuatro soldadohua teetenu nuhuaji Jesu, nojoriiri Jesu toqueya seraatiaree. Socua

quiriquiaari Jesu tucuaque cacojoqui. Cuno toqueeri shitiasano quiquiaari na riquiajiniji jiyocuara. Maja cusupuesano. ²⁴ Naaratej, cuno soldadohuari sequetooquiaari:

—Maja pa surenu nio toque. Coteenu pa tacuarishijiore, pa niishiniuria cante nera na panutaniyani.

Naacuajitij, tariucuacaanu Pueyaso Rupaajinia naajiotasanoori tohuateequiaari. Naa naajiotasano quiyari:

“Cua toqueeri seraatiasaaree. Cua tucuaque toqueecuara tacuarishiyonuureeri, na pasocoriquiano”.

Seetanujuanaa, naa miitiuquiaariiri cuno soldadohua.

²⁵ Niyacutesano shuriucua tee Jesu teeriquiaacuajani, tii nujuaturiquiaari na nucua, na nucua tarajanujuhuaj, Cleofas niquiocua Maríajuhuaj, María Magdalenanio. ²⁶ Jiyano huia Jesu panishano pueyanoori Jesu nucua shuriucua nujuariquiaa. Cuno pueyanocuajaari janiya. Jesu niquishacari canaa, na nucua sequereeri:

—Maajiniae, cua panishano pueyano cuaara quiiria juhua quia mueya cua niti.

²⁷ Na nuhuaji, cua sequereejaariuhuaj:

—Juannaa, cua nucua cuaara quiiria juhua quia nucua.

Naaratej, janiyari María riquiaari cua tiajiniarani, tii na quiniuria canaata.

Jesu cusosacari

(Mt 27.45-56; Mr 15.33-41; Lc 23.44-49)

²⁸ Na nuhuaji, Jesuuri niishiquiaari puetunu nojuajiniji naajiotasanojuanaari tari tohuateeere.

Naajuhuaj, tariucuacaanu Pueyaso Rupaajinia naajiotasano tohuatenurajuhuaj, Jesuuri sequenciaari:

—¡Jiyamueyanijia!

²⁹ Cuniqui, vino jereeccaari patacojinia mishaja cajitiariquiaa. Jiyacaritij, namasu casaari jereecca vinojinia shishaaree. Naajuaacua na morotatureeri. Na nuhuaji, Jesu rupaama shitiasaareeri. ³⁰ Jesu ratunu nuhuaji cuno jereecca vino, naa sequerohuari:

—¡Tari tucuataree puetunujuanaacuajanijia!

Naa na sequenu nuhuajitij, naniquiiri. Cusoqueeri.

Soldado jitiasacari Jesu shuucuaji na cashanata

³¹ Cuno juucaari canaa Judiocuaca jeenucuasacari quiriquiaa Pascuaacuara juucajinia. Cuno marijiara, Pascua juucaari Sábado juucajinia quiriquiaajuhuaj, samaatenu juuca. Naaratej, canaa Judiocuaca camarucuaari maja na paniniu quiquiaari samaatenu juuca macunucua jaasuconura na niyacutesanojinia. Naaratej, nojoriiri Pilato sequeree cuno teetejosano pueya cashacucua na shuniitianiniuria, ritia nojori cusionuunura, na roshinijiosaanura cuno juucaja. ³² Naaratej, Pilatoori na soldadohua jiyaramiquirii. Cuno soldadohuari coteenu shuniitiaree niquiriyatu pueyano cashacucua. Na nuhuaji, tamonu cashacucua shuniitiatureejaariuhuaj. ³³ Saniniuujia, nojori pacusacari Jesuucua, Jesuuri tariucua macu quiriquiaa cutara. Nojoriiri cunora na cashacucua shuniitiaaquirii.

³⁴ Naajaa, tamonu soldadoori Jesu shuucuaji jitiaree na cashanata najuhuanaj. Ritia shooqueeri nanaca, mohuacanio. ³⁵ Cuno pueyano, na naajiojinia naa nia pohuataani, cunocuajaari janiya. Janiyajanaari na niquiquiaarini. Naarate janiyari seetanujuanaa nia pohuataani. Tama janiyajarijia niishiyani cua sequencesanoori seetanujuanaa, nocua nia tiuuniuria. ³⁶ Jesuuri naa mishaaquiaaritij, tariucuacaanu nojuajiniji naajotasano tohuateenura. Naa sequeyacuajaari juhuacarijia nojuajiniji naajotasano:
 “Majaari quenaaja na nucu shuniiitiasaanu quiniutianiya”.
³⁷ Tamaquiiiri nojuajiniji naa naajotasano quiyajuhuaj:
 “Cashanata na shuucuaji na jitiatusano niquitiuniutianiyari”.

Jesu quete niasacari raaco

(Mt 27.57-61; Mr 15.42-47; Lc 23.50-56)

³⁸ Na nuhuaji, Arimatea tiacajinijinio Joseeri Pilato sequencesee:
 —Cua niquitiore Jesu quete raaco cua niasocoriquiano.

Nio Joseeri jiyasohuaja Jesuucua tiuujia quiquiaari, na pueresacari narta Judiocuaca. Pilatoori na sequequiaari na panura Jesu quete. Naacuajitij, Joseeri quiaaree. Macu paquiaariiri.
³⁹ Nicodemojuhuaj, noo pueyano Jesuucua quiquiaari niucua nata pocoojonuratej, nojuajaari jiyacari tiuquishii Joseecua. Nojuajaari queraatia shanohua jaanutaja nitriquiaaa, macuucua niojosocoriquiano. Na niiquiaari

quiquiaari cuarenta y cinco kilo. Cuno shanohua jaanutajaari quiquiaari mirra, aloeta cojitijiosano. ⁴⁰ Joseeri Nicodemota Jesu jiuniocoree toqueneecajinia. Nojori jiuniocosacari, nojoriiri nocua niojoriquiaa cuno shanohua jaanutaja. Canaa Judiocuacaari naa miitiujiaca quiquiaari, na macu na niatunura raaco. ⁴¹ Tee Jesu teetesaaquiaaricuajani, cuniquijia na shuriucua quiquiaariiri cuhuariquia. Cuno cuhuariquiajiniani, quiarinio jiuitiasano raari quiriquiaa, macunucua niojouara. Cuno raaconi, juhuanojuaja maja macu niasaanu quiquiaari. ⁴² Macuuri cuno raaco niasaaquiaari, cateca na quiniuucua. Naajuhuaj, quera puequeriquiaari canaa Judiocuaca jeenucuanu juuca. Cunoori, Pascuaacuara juuca.

20

*Jesu samiitiasacariuhua
(Mt 28.1-10; Mr 16.1-8; Lc 24.1-12)*

¹ Domingo, coteenujuanaa semaana juucani, María Magdalenaari tariquiicuaji quiaquiaari Jesu raajiniara. Ninishiquirri quiriquiaajaa. Na tiuquishacari, cuno puereetuua saajia niquishiiri tariucua tamocora ruutinishano, teyanota raa tiosaaquiaaricuajani. ² Naa na niquishacaritij, nojuajaari neterohua Simón Pedroocua, cucuanio. Canaa sequesuhuari:

—¡Pueyanaa, pa Jiyanjijaqui na raajiniji pasaa-re! ¡Majaari canaa niishiniu teeriquitijia na ni-asaareetejaj!

³ Naaratej, janiyari Pedrota netequiaari raajiniarajuhuaj. ⁴ Canaari mariyata netecuaturiquiaa coteenuni. Janiya cutaraari socua ritia netequiaari Pedrojinijini. Naacuajitij, janiyari coteenu tiuquishii raajiniani. ⁵ Janiyari raaco cuuqueseeni. Janiyari saaja Jesu jiuniocotaja toque niquirii maanoni tee Jesu quete niasaarucuaacuajani. Majaari cua tiuquiniu quimiaa raaco. ⁶ Simón Pedroori cua nuhuaji tiuquishii. Cami tiuquimiaajanaa cutaraari. Nojuajaari Jesu jiuniocotaja toque niquishii tii maanojuhuaj. ⁷ Jesu naca jiuniocotaja niquirijiaariuhuaj tamoco maano, maninia mariquiosano. Majaari na manu quiriquiaa Jesu cuaqueya jiuniocotaja toqueta. ⁸ Pedro tiuquiniu nuhuaji raaco, janiyari shusha jiyacari tiuquimiaajaaniuhuaj. Cua niquishacari Jesu jiuniocotaja toque, janiyari niishiquiini Jesuqui tari samiitiarohua. ⁹ Canaari juhuanojuaja maja canaa niishiniu quiriquiaa tariucuacaanu Pueyaso Rupaajinia naajiotasano Jesujiniji. Tii sequeyacuajaari Jesuuri samiitianutaniuhua macujiniji. ¹⁰ Na nuhuaji, canaari tiajinia quiaarohuani.

*Jesu muetasacari María Magdalenaacua
(Mr 16.9-11)*

¹¹ Canaa quiojosacariuhua raajiniji, María Magdalenaari tijia jateequaari. Raa shuriucua nujuqueriquiaari. Na nujuquenuta, raaco cuuquereeri. ¹² Raaco na niquishacari, caapiqui Pueyaso seja niquiriiri, cohuaque toqueyaraca. Nojoriiri macu niasaqui cajitiuriquiaa, tamonu

na nacaacora, tamonu na cashacuucumara.

¹³ Pueyaso seyari María Magdalena sequeree:

—Maajiniae, ¿casaara quia nujuqueyani?

Nojuajaari Pueyaso seja riucuaree:

—Cua jiyaniijia quete niiquiji pasaarucuua.

Majaari cua niishiniu teeriquitijia na niasaaru-cuaatejaj.

¹⁴ Naa na sequenu nuhuajitij, na nijiniara tacaterohuari. Saaja Jesu niquirii na shuriucua nujuuaanoori. Maja cutaraari na niishiniu quiriquiaa nojuaja Jesu.

—Jesuuri na nequesotaree:

—Maajiniae, ¿casaara quia nujuqueyani? ¿Cana quia pajeyani?

Maríari na jiyanirii cuno cuhuariquia cojuana pueyano naasucua. Cunora, naa na sequereeri:

—Pueyanonaa, quiaa jaara canaa macu parucuua, cua sequere tee quia niarucuaanoj. Janiyacua nocua quiaare na panurani.

—Jesuuri na sequeree:

—¡Maríanaa!

Jiyacaritij, Maríari nocua tacatequee na niishishacari nojuajaari Jesu. Hebreo rupaajinia na sequereeri:

—¡Rabuni!

Cunoori sequeya, “Cua Niishitiojonanaa”.

¹⁵ Jesuuri María sequeree:

—Maja cua quianu. Juhuanojuaja maja cua tacanu quiquioo cua Queecua. Quia quiaarohua. Cua tapueyocuaca quia sequencesuhua: “Janiya cua Que Pueyasoocua tacanutaniuhuani. Nojuajaari nia Quejuhuaj. Nojuajaari cua Jiyaniijia, nia Jiyaniijiajuhuaj”.

Jesuuri naa na saquiriojosano pueya sequeree na tapueyocuacata, na Que Pueyaso na jiyatesacari nojori Quejuhuaj. ¹⁸ Jiyacaritij, María Magdalenaari nimiohua canaacua, Jesu saquiriojosano pueyacuani. Nojuajaari canaa pohuatasuhua taa Jesu na niquiriini. Naajuhuaj, Jesu sequesano caminiuijurií canaaraari.

*Jesu muetasacari na saquiriojosano pueyacua
(Mt 28.16-20; Mr 16.14-18; Lc 24.36-49)*

¹⁹ Cuno domingo juucajani, shusha ninishacari, canaa, Jesu saquiriojosano pueyani, canaari jatiqui quiriquiaa tiaconi. Canaari tia tohuateya mishiquiojoquiaari cumaatiani, canaa pueresacari Jesu motenaa Judiocuaca. Naa tia tiootiu mishiquiojosano quishacaritij, Jesuuri saaja canaacua tiuquimiaa. Canashiyaquiji nujuasee canaa tajiniaari. Naa canaa sequereeri:

—¿Niaate quiyajaa? Juhuajaniya nia quiri.

²⁰ Naa canaa na sequenu nuhuajitij, canaa niquitioree na juaashiquiaari, na shuucuaji cashana jiyonio. Canaari jiyanolua timiriini canaa niquishacari canaa Jiyanijia. ²¹ Jesuuri socua pacuterohua sequenu:

—¡Juhuajaniya nia quiri! Naatej, taa cua Que jiyaroquiaari janiya mijiria na rupaa cua pohutanuracuaani, janiyari naa nia jiyaramiquiniutianiyajuhuaj.

²² Naa canaa na sequenu nuhuajitij, canaa caco nooriiri. Sequereeri:

—Pueyaso Sohuanu nia tiuquiniri nioojiajinia.

²³ Niaa jaara pueyano jiyanoori sesa na miishanojiniji, seetanujuanaa jiyanooshano

quiniutaniyari. Saniniuuquia, niaa jaara pueyano jiyanoquaquiri sesa na miishanojiniji, Pueyasora, jiyanooshoo quiniutaniyajaariuhuaj.

Tomás niquishacari Jesu, saminio seetanujuanaa

²⁴ Majaari Tomás quiniu quiriquiaa canaata, narta saquiriojosano pueyatani, Jesu muetasacari canaacua. ²⁵ Naaratej, canaari Tomás seququiaari na nuhuajini:

—¡Caapueyanonaa, canaa pa Jiyaniijia niquiriicuaani!

Tomásri saa canaa sequereejaa:

—Majaari cua tiuuniu quiniutaniya nia sequesanoocua, janiya jaara Jesu juaashiquiajinia niquiyaquiri clavo jiyacani. Janiya jaara cua juaashiquia shiyaquiri clavo jiyamani, janiya jaara cashana jiyama pueraaquiri na shuucuajijiuhuaj, janiyari nia cuaracashitiniutaniyani.

²⁶ Cuno nuhuaji, socua tamonu domingora, canaa, Jesu saquiriojosano pueyani, canaari rerejoquiaariuhuani. Tomásri jiyacari canaata quiriquiaa cutara. Tia tiootiuuri maninia mishiquiojosano quiriquiaa. Naajaa, Jesuuri saaja canaacua tiuquiquiaari. Canashiyaquiji canaa tajinia nujuaseeri. Canaa sequereeri:

—¿Niaate quiyajaa? Juhuajaniya nia quiri.

²⁷ Jiyacari Tomás sequereeri:

—Miji, Tomásnaa. Cua juaashiquia quia niquiri. Quia juaashiquia quia shiri clavo jiyama. Cashana jiyama cua shuucuaji quia puerarejuhuaj. ¿Casaara cucuaji quia taacanuyajaani? Cucua quia tiuuri.

²⁸ Tomásri jiyacari Jesu sequeree:

—¡Cua Jiyaniijjanaa! ¡Cua Pueyasonaa!

²⁹ Jesuuri na sequeree:

—Quia niquishacari janiya, quiaari shusha cu-cua tiuya. Socua shuquiriaatia quiniutianiya cutaraari noo pojori, canapuete cucua tiuuniutianiya saaja nojori tojishacari janiyajinijini, nojori niquiyaquishacari janiya.

Casaara Juan naajioquiaari nio naajioneeni

³⁰ Jesuuri jiyanoqua socua queraatia casaa mi-quiaari na cumaacata canaa na saquiriojosano pueya niquiara. Cunoori nio nequesoreetunee-jinia naajiotasoo. ³¹ Janiyari secaja saquiriojoree niya cua naajiotasocoriquianoni, nia niishiniuria Jesuuri seetanujuanaa Pueyaso Jiyarosano, Pueyaso Niyanutuhuaj. Janiyari nio naajioreeni nocua nia tiuuniuria, Pueyaso muerasura nia jiyatesaanura, pueyaracaanu rishijiaca nia quiniuria.

21

Tiberias caminajinia Jesu muetasacari na saquiriojosano pueyacua

¹ Na nuhuaji, Jesuuri canaa na saquiriojosano pueyacua muetaquiaariuhua Tiberias caminajinia. Naa quiquaariti na muetasacari canaacua. ² Nio pojoriiri jiyacari mariyata quiriquiaa: Simón Pedro, Tomás (Caapueyano jiyaniishano), Natanaeljuhuaj. Nojuajaari Caná tiacajinijinio quiquaari, Galilea jiyajinijinio. Janiyari cua tarajanuta tii quiriquiaajaaniuhuaj. Canaari Zebedeo niquiohuani. Socua caapiqui Jesu saquiriojosano pueyajinijinioori tii

quiriquiaajuhuaj. ³ Simón Pedroori jiyacari canaa sequeree:

—Sapitiaajara quejootaseera shiyaru.

Canaari na riucuareeni:

—Canaa quiata quiaajuhuaj.

Naacuajitij, canaari quiojiyareeni. Canaari botejinia tacataseeni. Canaari puetunu cuno niucuajanaa shiyaru quejootariquiaa sapitiaajara juucuani. Canaari shaa juhuaquetumaani. ⁴ Jiyacaritij, Jesuuri caminia casaqueyaji jaaquiajinia nujuariquiaa. Majaari canaa niishiniu quiquiaari cante nojuajani. ⁵ Jesuuri canaa ji-iquiooree. Canaa nequesotareeri:

—¡Sanajoorinia! ¿Niaate na quiaree?

Canaari na riucuareeni:

—¡Maja! ¡Shaaqui sacaj!

⁶ Jesuuri canaa sequeree:

—¡Nia shiyaru nia jartare nia miaquetajara bote tamajiria! ¡Niaari cuniqui na quianutaniya cutara!

Canaari naa miiriini taa na sequeree canaacua-jani. Na nuhuaji, majaari canaa naata canaa shiyaru jaatianu quiriquiaa, queraatia sapitiaaja canaa ritiasacari. ⁷ Jiyacaritij, janiyari Pedro se-quereeni:

—¡Pa Jiyanijjaqui!

Naa Pedro tojishacari cua sequencesanotej, nojuajaari ritia na toque cushirii. Nojuajaari juhuasu quiriquiaa. Na toque na cushiniu nuhuaji, caminiajinia jaataareeri Jesuucua na quianura. Jiritiuuri quiriquiaa. ⁸ Canaari na nuhuaji jaatiariquiaa shiyaru botejinijini. Jaaquiaari namitia maja tucuacaanu na quiniu quiriquiaa, saaja cien metroruhua.

⁹ Canaa rosetasacari botejiniji, canaari na mani niquishiini. Sapitiaajaari tii majeeriquiaa, pannio. ¹⁰ Jesuuri canaa sequeree:

—Nia sapitiaajajiniji mijji nia riri rarishocoriquiano.

¹¹ Simón Pedroori ritia botejinia tacamaa. Shiyaru tacanitiaree jaaquiajiniaari. Queraatia sapitiaajaari quiriquiaa. Ciento cincuenta y tres sapitiaaja, saa puereetunucuaja. Naa queraatia sapitiaaja quishacaritij, naajaa, majaari shiyaru turejetanu quirii quenaaja. ¹² Jesuuri canaa sequeree:

—Pueyanaa, mijji. Nia miaquesee.

Majaari quenaaja niquiriyatu canaaajinijino nequesotanu quiriquiaa, cantejaaranojoni. Canaacuajaari niishiriquiaani nojuacuajaari canaa Jiyaniijia Jesu. ¹³ Jiyacaritij, Jesuuri pan rishii manijiniji. Canaa na serotareeri. Sapitiaaja rariquia canaa niquitiojoreejaariuhuaj.

¹⁴ Jiyacari Jesu muetasacari canaa na saquiriosano pueyacuatej, cunota tari quiquiaari jiuujianaraca na muetasacari canaacua na samiitianu nuhuaji.

Jesu pocoojosacari Simón Pedrona

¹⁵ Canaa miaquenuunu nuhuaji, Jesuuri Simón Pedrona pocoojoriquiaa. Na nequesotareeri:

—Juan niyanu Simónnaa, ¿quiaate cua panijia socua nio quiarta saquiriosano pueyajiniji?

Pedroori na riucuaree:

—Jaa, Jiyaniijianaa, quiaacuajaari niishiya janiyari quia paniyani.

Jesuuri na sequeree:

—Cua borregohua niquiohuaniyojua cojuanara quia quiriqui.

Naa Jesu sequencesacari Pedrotej, nojuajaari miriqui na sequeriquiaa maninia na jiitianura narta Pueyaso muerasu. ¹⁶ Jesuuri Pedro nequesotarohuacuhuaj:

—Juan niyanu Simónnaa, ¿quiaate cua panijia?

Pedroori Jesu riucuaree:

—Jaa, Jiyaniijianaa. Quiaacuajaari niishiya janiyari quia paniyani.

Jesuuri na sequeree:

—Cua borregohua cojuanara quia quiriqui.

¹⁷ Jesuuri socua camiriohua Pedro nequesotanu:

—Juan niyanu Simónnaa, ¿quiaate cua paniya?

Pedroori socua taraajequee pueyaracaanu Jesu nequesoreesacari nojuaja. Seetanujuanaa Jesu riucuareeri:

—¡Jiyaniijianaa, quiaacuajaari puetunujuanaa niishijia! ¡Quiaari niishiya janiyari quia paniyani!

Jesuuri na sequeree:

—Cua borregohuaniyojua cojuanara quia quiriqui. ¹⁸ Seetanujuanaa quia sequeyanija, mashaja quia quishacari, tama quiajanijayaarijia quia toque cushijia, quia quianura quia panishaqui. Saniniujia, quia jaara saaquiano quiri, quiaari nareja quia numatucua shiitionutaniya tamasaca cushitiniuria quia toque. Na nuhuaji, quiaari canujutesaanutaniya quia paniyaquishaquiria.

¹⁹ Naa Jesu pohuatasacari miriqui Pedrotej, nojuajaari Pedro numooteriquiaa taa nojuaja

mosaanutaniyani. Pedro jaara naa mosaare, nojuajaari Pueyaso timitiniutianiya na mosaanuu-cua. Na nuhuaji, Jesuuri na sequeree:

—¡Pueyaracaanu cua tojijia quia quiri! Pa quiaarej.

Juanjiniji pohuatasano

²⁰ Pedro tacatesacari na nijiniara, Jesu panishano pueyano niquirii na nuhuaji sacuaanoori. Nojuacuajaari janiya. Janiyari noo pueyanocuajani, canaa miaquenuusacari Pascuara, Jesu shuriucua cua cajishacari na nequesotaquiaaritij: “¿Cantejaara cunoni, quia quiatenutaniyani?” ²¹ Quiarijiani, Pedro niquishacari janiya saniniujia, Jesu nequesotareeri:

—Jiyanjianaa, janiya jaara naa mosaanutaniy-acuaani, ¿nojuajaarijataj, taa na miishaanutani-yarini?

²² Jesuuri Pedro riucuaree:

—Janiya jaara paniri nojuaja rishiniuria pueyaracaanuni, janiya jaara jiyocuacaanuji tiuquiriohuajaatijia, quiara, naajaa. Quiajaniya cutara, pueyaracaanu cua tojijia quia quiri.

²³ Naa Jesu sequenuucua Pedrotej, puetunu cuarta Jesu pueyajanaari jiyaniriquiaa janiya naasucua shaajeyaquiriquianoni. Jesuuri see-tanujuanaa maja naa na sequenu quiquiaari janiyajiniji. Nojuajaari saaja naa sequequiaari Pedro: “Janiya jaara paniri pueyaracaanu na rishiniuriani janiya jaara jiyocuacaanuji tacate-mohuajaatijia, quiajaniyara naajaa”.

24 Janiyacuajaari nojuajani, Jesucristo panishano pueyanoni. Nio cua naajiojiniani, janiyari nojuajiniji cua niquishano pohuataani. Cua pohuatasanoori seetanujuanaa.

25 Jesuuri jiyanohua queraatia socua casaa miquiaari na cumaacata mijiria. Puetunu na mishanojuanaa jaara naajiotasaare, naa naasucua nio jiyajinia maara quiquo quiyaquiri puetunu cuno nequesoreetuneecaacuajijianaa.

**Quiarinio pueyaso rupaa pa jiyaniijia
Jesucristojiniji pueyano rupaajinia
New Testament in Arabela (PE:arl:Arabela)**

copyright © 2008 Wycliffe Bible Translators, Inc.

Language: Arabela

Translation by: Wycliffe Bible Translators, Inc.

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Arabela

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

cxxxix

2014-04-21

PDF generated using Haiola and XeLaTeX on 11 Nov 2022 from source files
dated 29 Jan 2022

90034700-94c6-5f48-ae9c-2383843fed68